

AVESTA
THE SACRED BOOKS OF THE
ZOROASTRIANS
PART IV. Vendidad.



This edition 1995. by Joseph H. Peterson, avesta.org.

License CC-BY 4.0.

Last updated Feb 26, 2021.

Based on edition of Karl F. Geldner, *Avesta, the Sacred Books of the Parsis, Volume III - Vendidad*, Stuttgart, 1896.

This book of the *Avesta* contains myths, code of purification, and other religious observances.

pa nām ī yazdā

Fargard 1.

1. mraoṭ ahurō mazdā spitamāi zaraθuštrāi, azəm daḍaṃ spitama zaraθuštra asō rāmō-dāitīm nōiṭ kudaṭ ṣaitīm, yeidi-zī azəm nōiṭ daiḍyaṃ spitama zaraθuštra asō rāmō-dāitīm nōiṭ kudaṭ ṣaitīm vīspō aṇhuṣ astvā airyanəm vaējō frāšnvāt.

2. paoirīm asaṇḥaṃca ṣōiθraṇaṃca vahištəm frāθwərəsəm azəm yō ahurō mazdā airyanəm vaējō vaṇhuyā dāityayā. āaṭ ahe paityārəm frākərəṇtaṭ aṇrō mainyuṣ pouru-mahrkō aẓimca yim raoiḍitəm zyāṃca daēvō-dātəm,

3. dasa avaθra māṅhō zayana dva ḥaṃina taēca ḥəṇti sarəta āpō sarəta zəmō sarəta urvarayā aḍa zimahe maiḍim aḍa zimahe zarədaēm aḍa zyāsciṭ pairi-pataiti aḍa fraēštəm vōiṅnanəm.

4. bitīm asaṇḥaṃca ṣōiθraṇaṃca vahištəm frāθwərəsəm azəm yō ahurō mazdā

gāum yim suḡḍō-ṣayanəm,

āaṭ ahe paityārəm frākərəṇtaṭ aṇrō mainyuṣ pouru-mahrkō skaitīm yaṃ gavaca dayaca pouru-mahrkəm.

5. θritīm asaṇḥaṃca ṣōiθraṇaṃca vahištəm frāθwərəsəm azəm yō ahurō mazdā

mōurum sūrəm aṣavanəm,

āaṭ ahe paityārəm frākərəṇtaṭ aṇrō mainyuṣ pouru-mahrkō marəḍaṃca vīθuṣāṃca.

6. tūirīm asaṇḥaṃca ṣōiθraṇaṃca vahištəm frāθwərəsəm azəm yō ahurō mazdā

bāxḍīm srīraṃ ərəḍwō-draḡṣāṃ,

āaṭ ahe paityārəm frākərəṇtaṭ aṇrō mainyuṣ pouru-mahrkō bravarəṃca usaḍasca.

7. puxḍəm asaṇḥaṃca ṣōiθraṇaṃca vahištəm frāθwərəsəm azəm yō ahurō mazdā nisāim yim aṇtarə mōurumca bāxḍimca, āaṭ ahe paityārəm frākərəṇtaṭ aṇrō mainyuṣ pouru-mahrkō aḡəṃca vīmanō-hīm.

8. xštūm asaṇḥaṃca ṣōiθraṇaṃca vahištəm frāθwərəsəm azəm yō ahurō mazdā

harōyūm yim viṣ-harəzanəm,

āaṭ ahe paityārəm frākərəṇtaṭ aṇrō mainyuṣ pouru-mahrkō saraskəṃca driwikāca.

9. haptaθəm asaṇḥamca šōiθranamca vahištəm frāθwərəsəm azəm yō ahurō mazdā vaēkərətəm yim dūžakō-sayanəm, āaṭ ahe paityārəm frākərəntaṭ aṇrō mainyuš pouru-mahrkō pairikəm yaṃ xnaθaite yā upaṇhacaṭ kərəsāspəm.

10. aštəməm asaṇḥamca šōiθranamca vahištəm frāθwərəsəm azəm yō ahurō mazdā urvaṃ pouru-vāstrəm, āaṭ ahe paityārəm frākərəntaṭ aṇrō mainyuš pouru-mahrkō aya aiwištāra.

11. nāuməm asaṇḥamca šōiθranamca vahištəm frāθwərəsəm azəm yō ahurō mazdā xnəntəm yim vəhrkānō-šayanəm, āaṭ ahe paityārəm frākərəntaṭ aṇrō mainyuš pouru-mahrkō aya anāpərəθa šyaθna yā narō-vaēpaya.

12. dasəməm asaṇḥamca šōiθranamca vahištəm frāθwərəsəm azəm yō ahurō mazdā harax^vaitīm srīraṃ, āaṭ ahe paityārəm frākərəntaṭ aṇrō mainyuš pouru-mahrkō aya anāpərəθa šyaθna yā nasuspaya.

13. aēvaṇdasəm asaṇḥamca šōiθranamca vahištəm frāθwərəsəm azəm yō ahurō mazdā haētumaṇtəm raēvaṇtəm x^rarənaṇuṇaṇtəm, āaṭ ahe paityārəm frākərəntaṭ aṇrō mainyuš pouru-mahrkō aya yātava,

14. aēmca ahe ciθrō daxštō aṇḥaṭ aēm ciθrō-paiti-dayō yaθa kavaciṭ jasən zaoyehe yātuməntəm aḍa hənti yātumastəma aḍa taēcīṭ uzjasənti yā mərəṇcyāica zaraḍaṇnyāica xštamicatca maḍaxaheca.

15. dvadasəm asaṇḥamca šōiθranamca vahištəm frāθwərəsəm azəm yō ahurō mazdā raṇaṃ θrizantūm, āaṭ ahe paityārəm frākərəntaṭ aṇrō mainyuš pouru-mahrkō aṇəmca uparō-vīmanō-hīm.

16. θridasəm asaṇḥamca šōiθranamca vahištəm frāθwərəsəm azəm yō ahurō mazdā

caxrəm sūrəm ašavanəm,

āaṭ ahe paityārəm frākərəntaṭ aṇrō mainyuš pouru-mahrkō aya anāpərəθa šyaθna yā nasuspaya.

17. caθrudasəm asaṇḥamca šōiθranamca vahištəm frāθwərəsəm azəm yō ahurō mazdā varənəm yim caθru-gaošəm yahmāi zayata θraētaonō jaṇta ažōiš dahākāi, āaṭ ahe paityārəm frākərəntaṭ aṇrō mainyuš pouru-mahrkō araθwyāca daxšta anairyāca daiṇhuš-aiwištāra.

18. paṇcadasəm asaṇḥamca šōiθranamca vahištəm frāθwərəsəm azəm yō ahurō mazdā yō hapta həṇdu, āaṭ ahe paityārəm frākərəntaṭ aṇrō mainyuš pouru-mahrkō araθwyāca daxšta araθwīmca garəmāum.

19. xšvaš-dasəm asaṇḥamca šōiθranamca vahištəm frāθwərəsəm azəm yō ahurō mazdā upa aodaēšu raṇhayā yō asārō aiwyāxšayeinti, āaṭ ahe paityārəm frākərəntaṭ aṇrō mainyuš pouru-mahrkō zyamca daēvō-dātəm taozyāca daiṇhuš-aiwištāra.

20. hēnti anyāsciṭ asāsca šōiθrāsca srīrāsca gufrāsca bərəxδāsca frašāsca
bāmyāsca.

ašəm vohū.....

2.

1. pərəsaṭ zaraθuštrō ahurəm mazdām,
ahura mazda mainyō
spēništa dātarə gaēθanəm
astvaitinəm ašāum
kahmāi paoiryō mašyānəm apərəsə-tūm yō ahurō mazdā anyō mana yaṭ
zaraθuštrāi,
kahmāi fradaēsayō daēnəm
yaṃ āhūrīm zaraθuštrīm.

2. āaṭ mraoṭ ahurō mazdā,
yimāi srīrāi hvəθwāi ašāum zaraθuštra ahmāi paoiryō mašyānəm
apərəse azəm yō ahurō mazdā
anyō θwaṭ yaṭ zaraθuštrāṭ,
ahmāi fradaēsaēm daēnəm
yaṃ āhūrīm zaraθuštrīm.

3. āaṭ hē mraoṭ zaraθuštra
azəm yō ahurō mazdā,
vīsaṅha mē yima srīra vīvaṅhana
mərətō bərətaca daēnayāi,
āaṭ mē aēm paityaoxta
yimō srīrō zaraθuštra,
nōiṭ dātō ahmi nōiṭ cistō
mərətō bərətaca daēnayāi.

4. āaṭ hē mraom zaraθuštra
azəm yō ahurō mazdā,
yezi mē yima nōiṭ vīvīse
mərətō bərətaca daēnayāi
āaṭ mē gaēθā frādaya āaṭ mē gaēθā varədaya āaṭ mē vīsāi gaēθanəm θrātāca
harətāca aiwyāxštaca.

5. āaṭ mē aēm paityaoxta
yimō srīrō zaraθuštra,
azəm tē gaēθā frādayeni azəm tē gaēθā varədayeni azəm tē vīsāne gaēθanəm
θrātāca harətāca aiwyāxštaca,
nōiṭ mana xšaθre bvaṭ aotō vātō nōiṭ garəmō nōiṭ axtiš nōiṭ mahrkō.

6. āaṭ hē zaya frabarəm
azəm yō ahurō mazdā
suwraṃ zaranaēnīm aštraṃca zaranyō-paēsīm.

7. yimō asti bərəθe xšaθrayā.

8. āaṭ yimāi xšaθrāi θrisatō-zima hanjasənti,
 āaṭ hē im zā bvaṭ pərəne
 pasvaṃca staoranəṃca
 mašyānaṃca sūnaṃca vayəṃca
 āθraṃca suxraṃ saociṇṭaṃ
 nōiṭ hīm gātvō viṇḍəṇ
 pasvasca staorāca mašyāca.

9. āaṭ yimāi paiti-vaēdaēm,
 yima srīra vīvaṇhana
 pərəne im zā haṅgata
 pasvaṃca staoranəṃca
 mašyānaṃca sūnaṃca vayəṃca
 āθraṃca suxraṃ saociṇṭaṃ
 nōiṭ hīm gātvō viṇḍəṇṭi
 pasvasca staorāca mašyāca.

10. āaṭ yimō frašusaṭ raocā ā upa rapioṭwəṃ hū paiti adwanəṃ,
 hō iməṃ zəṃ aiwišvaṭ
 suwrya zaranaēnya
 avi dim sifaṭ aštraya
 uityaojanō,
 friθa spəṇta ārmaite
 fracā šva vīca nəmaṇha
 bərəθre pasvaṃca staoranəṃca mašyānaṃca.

11. āaṭ yimō iməṃ zəṃ višāvayaṭ aēva θrišva ahmāṭ masyehīm yaθa para
 ahmāṭ as, təm iθra fracarəṇta pasvasca staorāca mašyāca hvəṃ anu uštīm
 zaošəṃca
 yaθa kaθaca hē zaošō.

12-14. āaṭ yimāi xšaθrāi xšvaš-satō-zima hanjasənti, āaṭ hē im zā bvaṭ
 pərəne¹ ... mašyānaṃca.

15. āaṭ yimō iməṃ zəṃ višāvayaṭ dva θrišva ahmāṭ masyehīm yaθa para
 ahmāṭ as, təm iθra fracarəṇta pasvasca staorāca mašyāca hvəṃ anu uštīm
 zaošəṃca yaθa kaθaca hē zaošō.

16. āaṭ yimāi xšaθrāi nava-satō-zima hanjasənti, āaṭ hē im zā bvaṭ pərəne
 pasvaṃca staoranəṃca mašyānaṃca sūnaṃca vayəṃca āθraṃca suxraṃ
 saociṇṭaṃ, nōiṭ hīm gātvō viṇḍəṇ pasvasca staorāca mašyāca.

17. āaṭ yimāi paiti-vaēdaēm, yima srīra vīvaṇhana pərəne im zā haṅgata
 pasvaṃca staoranəṃca mašyānaṃca sūnaṃca vayəṃca āθraṃca suxraṃ
 saociṇṭaṃ, nōiṭ hīm gātvō viṇḍəṇṭi pasvasca staorāca mašyāca.

¹ = Parr. 8-10.

18. āaṭ yimō frašūsaṭ raocā ā upa rapiθwam hū paiti adwanəm, hō imam zəm aiwišvaṭ suwrya zaranaēnya avi dim sifaṭ aštraya uityaojanō, friṭa spənta ārmaite fracā šva vīca nəmaṅha barəθre pasvamca staoranamca mašyānamca.

19. āaṭ yimō imam zəm višāvayaṭ θribyō θrišvaēibyō ahmāt masyehīm yaṭa para ahmāt as, təm iṭra fracarənta pasvasca staorāca mašyāca hvam anu uštim zaošəmca yaṭa kaṭaca hē zaošō.

20. haṅjamanəm frabarata yō daḍvā ahurō mazdā haṭra mainyaoibyō yazataēibyō srūtō airylene vaējahi vaṅhuyā dāityayā, haṅjamanəm frabarata yō yimō xšaētō hvəθwō haṭra vahištaēibyō mašyākaēibyō srūtō airylene vaējahi vaṅhuyā dāityayā.

21. ā-taṭ haṅjamanəm paiti-jasaṭ yō daḍvā ahurō mazdā haṭra mainyaoibyō yazataēibyō srūtō airylene vaējahi vaṅhuyā dāityayā, ā-taṭ haṅjamanəm paiti-jasāt yō yimō xšaētō hvəθwō haṭra vahištaēibyō mašyākaēibyō srūtō airylene vaējahi vaṅhuyā dāityayā.

22. āaṭ aoxta ahurō mazdā yimāi, yima srīra vīvaṅhana avi ahūm astvaṅtəm aḡəm zimō jaṅhəntu yahmaṭ haca staxrō mrūrō zyā, avi ahūm astvaṅtəm aḡəm zimō jaṅhəntu yahmaṭ haca paurvō snaoḍō vafra snaēžāt barəzištaēibyō gairibyō bašnubyō arəduyā.

23. θrižaṭca ida yima gōuš apa-jasaṭ yaṭca aṅhaṭ θwyəštəmaēšu asaṅham yaṭca aṅhaṭ barəšnuš paiti gairinam yaṭca jaṅnušva raonam paxrumaēšu nmānaēšu.

24. parō zimō aētaṅhā
daṅhuš aṅhaṭ bərətō vāstrəm
təm āfš paurva vazaiḍyāi
pasca vītaxti vafrahe

abdaca ida yima aṅuhe astvaite sadayāt yaṭ ida pasōuš anumayehe padəm vaēnāite.

25. āaṭ təm varəm kərənava carətu-drājō kəmcit paiti caṭrušanam haṭra taoxma upa-bara pasvamca staoranamca mašyānamca sūnamca vayamca āṭramca suxram saocinam, āaṭ təm varəm kərənava carətu-drājō kəmcit paiti caṭrušanam naram aiwi-xšōiθne carətu-drājō kəmcit paiti caṭrušanam gavam gāvayanəm.

26. haṭra āpəm frātaṭ-caya
hāθrō-masaṅhəm adwanəm
haṭra marəḡā avastaya,
avi maṭ zairi-gaonəm maṭ x^vairyeite ajaminəm,
haṭra nmānā avastaya
katəmca fraskəmbəmca fravārəmca pairi-vārəmca.

27. haθra vīspanaṃ naṛaṃ nāirinaṃca taoxma upa-bara yōi hēṇti aiṅhā zēmō mazištaca vahištaca sraēštaca, haθra vīspanaṃ gōuš sarədanāṃ taoxma upa-bara yōi hēṇti aiṅhā zēmō mazištaca vahištaca sraēštaca.

28. haθra vīspanaṃ urvaranaṃ taoxma upa-bara yōi hēṇti aiṅhā zēmō barəzištaca hubaoiđitəmaca, haθra vīspanaṃ xʷarəθanaṃ taoxma upa-bara yōi hēṇti aiṅhā zēmō xʷarəzištaca hubaoiđitəmaca, tē kərənava miθwaire ajyamnəm vīspəm ā ahmāt yaṭ aēte narō varəfšva aṅhən.

29. mā aθra frakavō mā apakavō mā apāvayō mā harədiš mā driwiš mā daiwiš mā kasviš mā vīzbāriš mā vīmītō-daṇtānō mā paēsō yō vītərətō-tanuš māda-cim anyaṃ daxstanāṃ yōi hēṇti aṅrahe mainyōuš daxštəm mašyāišca paiti niđātəm.

30. fratəməm daiṅhēuš nava pərəθwō kərənava madəməđ xšvas nitəmō tišrō, fratəməm pərəθwō hazarəm naṛaṃ nāirinaṃca taoxma upa-bara madəməđ xšvas sata nitəmō tišrō sata, aiwica tē varəfšva suwrya zaranaēnya

apica təm varəm marəza
dvarəm raocanəm xʷāraoxšnəm aṅtarə-naēmāt.

31. āaṭ mašta yimō, kuθa tē azəm varəm kərənāvāne yā mē aoxta ahurō mazdā, āaṭ aoxta ahurō mazdā yimāi, yima srīra vīvaṅhana aiṅhā zēmō pāšnābya vīspara zastaēibya vīxada maṅayən ahe yaθa nū mašyāka xšivisti zēmē višāvayeiṇte.

32. āaṭ yimō avaθa kərənaoṭ yaθa dim išaṭ ahurō mazdā aiṅhā zēmō pāšnābya vīsparaṭ zastaēibya vīxadaṭ maṅayən ahe yaθa nū mašyāka xšivisti zēmē višāvayeiṇte.

33. āaṭ yimō varəm kərənaoṭ carətu-drājō kəmcit paiti caθrušanaṃ, haθra taoxma upa-baraṭ pasvaṃca staoranāṃca mašyānaṃca sūnaṃca vayāṃca āθraṃca suxraṃ saociṇṭaṃ, āaṭ yimō varəm kərənaoṭ carətu-drājō kəmcit paiti caθrušanaṃ naṛaṃ aiwi-xšōiθne carətu-drājō kəmcit paiti caθrušanaṃ gavaṃ gāvayanəm.

34. haθra āpəm frātaṭ-cayaṭ
hāθrō-masaṅhəm ađwanəm
haθra marəγā avastayaṭ
avi maṭ zairi-gaonəm maṭ xʷairyeite ajyamnəm,
haθra nmānā avastayaṭ
katəmca fraskəmbəmca fravārəmca pairi-vārəmca.

35. haθra vīspanaṃ naṛaṃ nāirinaṃca taoxma upa-baraṭ yōi hēṇti aiṅhā zēmō mazištaca vahištaca sraēštaca, haθra vīspanaṃ gōuš sarədanāṃ taoxma upa-baraṭ yōi hēṇti aiṅhā zēmō mazištaca vahištaca sraēštaca.

36. haθra vīspanaṃ urvaranaṃ taoxma upa-baraṭ yōi hēṇti aiṅhā zēmō barəzištaca hubaoiđitəmaca, haθra vīspanaṃ xʷarəθanaṃ taoxma upa-baraṭ

yōi hēnti aiṛjhā zēmō xʷarəzištaca hubaoiḍitēmaca, tē kərənaoṭ miθwaire aṣyamnəm vīspəm ā ahmāt yaṭ aēte narō varəfšva aṇhən.

37. nōiṭ aθra frakavō nōiṭ apakavō nōiṭ apāvayō nōiṭ harəḍiṣ nōiṭ driwiš nōiṭ daiwiš nōiṭ kasviš nōiṭ vizbāriš nōiṭ vīmītō-daṇtānō nōiṭ paēsō yō vītərətō-tanuš naēḍa-cim anyam daxštanam yōi hēnti aṇrahe mainyōuš daxštəm mašyāišca paiti niḍātəm.

38. fratəməm daiṛjhēuš nava pərəθwō kərənaoṭ madəmō xšvas nitəmō tišrō fratəməm pərəθwō hazarəm narəm nāirinamca taoxma upa-baraṭ madəmō xšvas sata nitəmō tišrō sata, aiwica hō varəfšva suwrya zaranaēnya apica hō varəm marəzaṭ dvarəm raocanəm xʷāraoxšnəm aṇtarə-naēmāt.

39. dātarə gaēθanam astvaitinam ašāum cayō āaṭ aēte raocā aṇhən ašāum ahura mazda yō avaθa ā-raocayeite aētaēšva varəfšva yō yimō kərənaoṭ.

40. āaṭ aoxta ahurō mazdā, xʷadātaca raocā stiḍātaca, hakərət zī irixtahe saḍayaca vaēnaite starasca māasca hvarəca.

41. taēca ayarə mainyēnte yaṭ yarə, caθwarəsətəm aiwi-gāmanam dvaēibya haca nərəbya dva nara us-zayeinte miθwana strica nairyasca aθa aētaēšam yōi gēuš sarəḍanam, taēca narō sraēšta gaya jvaiṇti aētaēšva varəfšva yō yimō kərənaoṭ.

42. dātarə gaēθanam astvaitinam ašāum, kō avaθa daēnam māzdayasnīm vī-baraṭ aētaēšva varəfšva yō yimō kərənaoṭ, āaṭ aoxta ahurō mazdā, viš karšipta spitama zaraθuštra.

43. dātarə ... ašāum, kō aēšam asti aṇhuca ratušca, āaṭ mraoṭ ahurō mazdā, urvataṭ-narō zaraθuštra tūmca yō zaraθuštrō. ašəm vohū.....

3.

1. dātarə gaēθanam astvaitinam ašāum, kva paoirīm aiṛjhā zēmō šaištəm, āaṭ mraoṭ ahurō mazdā, yaṭ bā paiti nā ašava frayaṭ spitama zaraθuštra aēsmō-zastō barəsmō-zastō gao-zastō hāvanō-zastō āxštaēḍa daēnaya vaca framrū miθrəmca vouru-gaoyaoitīm jaiḍya rāmca xʷāstrəm.

2. dātarə ... ašāum, kva bitīm aiṛjhā zēmō šaištəm, āaṭ mraoṭ ahurō mazdā, yaṭ bā paiti nā ašava nmānəm uzdasta āθravaṭ gaomavaṭ nāirivaṭ puθravaṭ hvəθwavaṭ.

3. āaṭ pascaēta ahe nmānahe frapiθwō gāuš frapiθwō ašəm frapiθwō vastrəm frapiθwō spā frapiθwō nāirika frapiθwō apərənāyūkō frapiθwō ātarš frapiθwō vīspam hujyāitiš.

4. dātarə ... ašāum, kva θritīm aiṛjhā zēmō šaištəm, āaṭ mraoṭ ahurō mazdā, yaṭ bā paiti fraēštəm kārayeiti spitama zaraθuštra yavanamca vāstranamca urvaranamca xʷarəθō-bairyanam yaṭ vā anāpəm āi āpəm kərənaoiti yaṭ vā āpəm āi anāpəm kərənaoiti.

5. dātarə ... ašāum, kva tūirīm aiñhā zəmə šaištəm, āaṭ mraoṭ ahurō mazdā, yaṭ bā paiti fraēštəm us-zīzəṇti pasvasca staorāca.

6. dātarə ... ašāum, kva puxdəm aiñhā zəmə šaištəm, āaṭ mraoṭ ahurō mazdā, yaṭ bā paiti fraēštəm maēzəṇti pasvasca staorāca.

7. dātarə ... ašāum, kva paoirīm aiñhā zəmə ašāištəm, āaṭ mraoṭ ahurō mazdā, yaṭ arəzūrahe grīvaya spitama zaraθuštra yaṭ ahmya daēva haṇdvarəṇti drujō haca gərədāda.

8. dātarə ... ašāum, kva bitīm aiñhā zəmə ašāištəm, āaṭ mraoṭ ahurō mazdā, yaṭ bā paiti fraēštəm sairi nikaṇte spānasca irista naraēca irista.

9. dātarə ... ašāum, kva θiritīm aiñhā zəmə ašāištəm, āaṭ mraoṭ ahurō mazdā, yaṭ bā paiti fraēštəm daxma uzdaēza kiryeiṇte yahmya narō irista niḍayeiṇte.

10. dātarə ... ašāum, kva tūirīm aiñhā zəmə ašāištəm, āaṭ mraoṭ ahurō mazdā, yaṭ bā paiti fraēštəm bavaiṇti aṇrō-mainyavanəm gərədəm.

11. dātarə ... ašāum, kva puxdəm aiñhā zəmə ašāištəm, āaṭ mraoṭ ahurō mazdā, yaṭ bā paiti narš ašaonō spitama zaraθuštra nāirikaca apərənāyūkasca varaiθīm paṇṭəm azōiṭ pašnvāṇhəm hikvāṇhəm jarəzīm baraiti vācim.

12. dātarə ... ašāum, kō paoirīm iməm zəm mazišta xšnaoma xšnāvayeiti, āaṭ mraoṭ ahurō mazdā, yaṭ bā paiti fraēštəm uskəṇti yahmya sairi nikaṇte spānasca irista naraēca irista.

13. dātarə ... ašāum kō bitīm iməm zəm mazišta xšnaoma xšnāvayeiti, āaṭ mraoṭ ahurō mazdā, yaṭ bā paiti fraēštəm daxma uzdaēza vikaṇti yahmya narō irista niḍayeiṇte.

14. mā-ciš barō aēvō yaṭ iristəm, āaṭ yezi-šē barāṭ aēvō yaṭ iristəm upa vā nasuš raēθwāt nāṇhanaṭ haca cašmanaṭ haca hizumaṭ haca paitiš-x'arənāda fravāxšaṭ haca frašumakaṭ haca tē, aēšəm paiti sruye aēša druxš yā nasuš upa-dvəšaiti, ayaoždya pascaēta bavaiṇti yavaēca yavaētātaēca.

15. dātarə ... ašāum kva aētahe narš gātuš aṇhaṭ yaṭ iristō-kašahe, āaṭ mraoṭ ahurō mazdā, yaṭ aṇhaṭ aiñhā zəmə vi-āpō-təməmca vi-urvarō-təməmca yaoždātō-zəmōtəməmca hušō-zəmōtəməmca kambišəmca aēte paθā frayaṇ pasvasca staorāca ātrəmca ahurahe mazdā barəsmaca ašaya frastarəṭəm narəmca yim ašavanəm.

16. dātarə ... ašāum cvaṭ drājō haca āθraṭ cvaṭ drājō haca apaṭ cvaṭ drājō haca barəsmən frastairyāt cvaṭ drājō haca nərəbyō ašavabyō.

17. āaṭ mraoṭ ahurō mazdā, θrisata-gāim haca āθraṭ θrisata-gāim haca apaṭ θrisata-gāim haca barəsmən frastairyāt θrigāim haca nərəbyō ašavabyō.

18. aētaḁa hē aēte mazdayasna aiṛhā zēmō pairi-daēzaṇ pairi-daēzayaṇ, xʷarəθaēibyō pascaēta āstayaṇta aēte yōi mazdayasna vāstraēibyō pascaēta āstayaṇta aēte yōi mazdayasna.

19. draējištōtəmaēšvaca niuruzdōtəmaēšvaca aētā xʷarəθā xʷaratu aētā vāstrā vaṇhatu vīspəm ā ahmāt yaṭ hanō vā zaururō vā pairištā-xšudrō vā bavāt.

20. āaṭ yaṭ hanō vā zaururō vā pairištā-xšudrō vā bavāt aojištəmca dim pascaēta mazdayasna taṇcištəmca vaēdyōtəməmca upa-maitīm barəzaṇḁam paštō-fraθaṇḁam hē kamərəḁəm vīnāθayən aš-xʷarətəmaēibyō spəṇtō-mainyavanam dāmanam kərəfš-xʷarəm kərəfš paiti nisrinuyāt vayam kahrkāsam uityaojanō, avā hīm paiti miθnāiti vīspəm dušmatəmca dužuxtəmca dužvarštəmca

21. yezica hē anya aya šyaoθna fravaršta paitita hē ciθa āaṭ yezi-šē anya aya šyaoθna nōiṭ fravaršta paititəm ahe narš yavaēca yavaētātaēca.

22. dātarə ... ašāum kō θritīm imam zəm mazišta xšnaoma xšnāvayeiti, āaṭ mraoṭ ahurō mazdā, yaṭ bā paiti fraēštəm vīkəṇte anrō-mainyavanam gərəḁam.

23. dātarə ... ašāum kō tūirīm imam zəm mazišta xšnaoma xšnāvayeiti, āaṭ mraoṭ ahurō mazdā, yaṭ bā paiti fraēštəm kārayeiti spitama zaraθuštra yavanamca vāstranamca urvaranamca xʷarəθōbairyanam yaṭ vā anāpəm āi āpəm kərənaoiti yaṭ vā āpəm āi anāpəm kərənaoiti.

24. nōiṭ zī im zā šā yā darəya akaršta saēta yā karšya karšivata aibiš taṭ vaṇhəuš aiwi-šōiθna
iḁa carāiti huraoda
yā darəya apuθra aēti
aibiš taṭ vaṇhəuš aršānō.

25. yō imam zəm aiwi-vərəzeyeiti spitama zaraθuštra
hāvōya bāzvō dašinaca
dašina bāzvō haoyaca
upa hē gaonəm baraiti
maṇayən ahe yaθa-nā fryō fryāi vaṇtaoe starəta gātuš sayamanō puθrəm vā
gaonəm vā avi ava-baraiti.

26. yō imam zəm aiwi-vərəzeyeiti spitama zaraθuštra hāvōya bāzvō
dašinaca dašina bāzvō haoyaca
āaṭ aoxta im zā, nara
yō maṇ aiwi-vərəzeyeih
hāvōya bāzvō dašinaca
dašina bāzvō haoyaca

27. bāda ida āfrasāne dajhubyō
 bāda ida aēni bərəθi
 vīspā xʷarəntīš para-barəṇ
 haṃbərəθwəṃ parō yavahe.

28. yō iməṃ zəṃ nōiṭ aiwi-vərəzyeiti spitama zaraθuštra hāvōya bāzvō
 dašīnaca dašīna bāzvō haoyaca

āaṭ aoxta īm zā, nara
 yō məṃ nōiṭ aiwi-vərəzyeīhi
 hāvōya bāzvō dašīnaca
 dašīna bāzvō haoyaca

29. bāda ida hištahe anyeche dvarə srayanō xʷarəntīš
 pərəsəmnāēšuca,
 bāda θwəṃ tarasca aṅhānō
 srasciṇtīš xʷarəθā bairyeiṇte
 tē ābya bairyeiṇte
 yaēšəṃ dim frāyō vohunəṃ.

30. dātərə gəēθanəṃ astvaitinəṃ ašāum kaṭ asti daēnayā māzdayasnōiš
 uruθwarə, āaṭ mraoṭ ahurō mazdā, yaṭ uyṛəṃ paiti yaokaršti spitama
 zaraθuštra.

31. yō yaom kārayeiti hō ašəm kārayeiti, hō daēnəṃ māzdayasnīm
 fravāza vazaitē, hō iməṃ daēnəṃ māzdayasnīm frapinaoiti satəm
 paitištənəṃ hazarəṃ paiti-daranəṃ baēvarə paiti yasnō-kərəitinəṃ.

32. yaṭ yavō dayāt āaṭ daēva xʷīsən yaṭ suđuš dayāt āaṭ daēva tusən yaṭ
 pištrō dayāt āaṭ daēva uruθən yaṭ guṇdō dayāt āaṭ daēva pərəðən, ida miθnāt
 daēva aipi-jaiṇti nmāne aiṅhāi guṇdayāi

zafarə tafsəṇ aya masō
 haṃ-urvīsvāṅhō sadayeiti
 yaṭ yavō pouruš bavāt.

33. aḍa məθrəṃ taḍa mairyāt,
 nāēciš axʷarəṇtəṃ tva

nōiṭ uyṛəṃ ašayəṃ nōiṭ uyṛəṃ vāstryəṃ nōiṭ uyṛəṃ puθrōištim, xʷāšaya
 zī vīspō aṅhuš astvā jvaiṇti axʷāše framiryēite.

34. dātərə gəēθanəṃ astvaitinəṃ ašāum kō puxðəm iməṃ zəṃ mazišta
 xšnaoma xšnāvayeiti, āaṭ mraoṭ ahurō mazdā, yaṭ bā paiti spitama zaraθuštra
 aiṅhā zəṃō naire ašaone vərəzyāt ašaya dadāiti.

35. yaṭ bā paiti spitama zaraθuštra aiṅhā zəṃō naire ašaone vərəzyāt
 ašaya vaṅhuya nōiṭ dadāiti avi təm spayāt spəntayā āmatōiš təmō āca vaēšō
 āca acištəm āca ahūm ā vīspaca avi tiṅra nimata.

36. dātarə gaēθanəm astvaitinəm ašāum yaṭ aiṅhā zəmə nikaṇte spānasca irista naraēca irista naēməm yārə-drājō anuskaṇte kā-hē asti ciθa, āaṭ mraoṭ ahurō mazdā, paṇca sata upāzananəm upāzōiṭ aspahe aštraya paṇca sata sraoṣō-caranaya.

37. dātarə ... ašāum yaṭ aiṅhā zəmə nikaṇte spānasca irista naraēca irista yārə-drājō anuskaṇte kā hē asti ciθa, āaṭ mraoṭ ahurō mazdā, hazaṅrəm upāzananəm upāzōiṭ aspahe aštraya hazaṅrəm sraoṣō-caranaya.

38. dātarə ... ašāum yaṭ aiṅhā zəmə nikaṇte spānasca irista naraēca irista byārə-drājō anuskaṇte kā hē asti ciθa kā-hē asti āpərətiš kaṭ hē asti yaozdāθrəm.

39. āaṭ mraoṭ ahurō mazdā, nava-hē asti ciθa nava-hē asti āpərətiš nōiṭ hē asti yaozdāθrəm anāpərəθa haca šyaoθna yavaēca yavaētātaēca.

40. kva aēva, yezi aṅhaṭ āstūtō vā aiwi-sravanō vā daēṇəm māzdayasnīm āaṭ yezi aṅhaṭ anāstūtō vā anaiwi-sravanō vā daēṇəm māzdayasnīm, aētāciṭ aēibyō spāṅhaite āstavanaēibyō daēṇəm māzdayasnīm əvərəzənbyō pascaēta araθwya šyaoθna.

41. spayeite zī spitama zaraθuštra daēna māzdayasniš narš āstavanahe baṇdəm spayeite draoṣəm spayeite ašavaṅnīm spayeite nasuspaēm spayeite anāpərəθəm šyaoθnəm spayeite dərəzānō-pərətəm pārəm spayeite vīspa tā šyaoθna yā-cica vərəzeyeiti.

42. maṅayən ahe spitama zaraθuštra daēna māzdayasniš narš ašaonō framərəzaiti vīspəm dušmatəmca dužuxtəmca dužvarštəmca yaθa vātō dərəzi-takaθrō θwāšəm dašināṭ pairi framərəzōiṭ, [vohu iḏa zaraθuštra hvarštəm šyaoθnəm vərəzimməm vaṅuhi daēna māzdayasniš pərənāyus ciθəm θwərəsaiti].

ašəm vohū.....

4.

1. yō naire nəmaṅhəṇte
nōiṭ nəmō paiti-baraiti
tāyus nəmaṅhō bavaiti
hazaṅha nəmō-barahe
aēšamciṭ iθra vā asni iθra vā xšafne maēθanahe x'āi pairi-gəurvayeite.

2. dātarə gaēθanəm astvaitinəm ašāum caiti aēte miθra tava yaṭ ahurahe mazdā, āaṭ mraoṭ ahurō mazdā, xšvaš ašāum zaraθuštra paoiryō vacahinō bityō zastā-marštō θrityō pasu-mazō tūiryō staorō-mazō puxdō vīrō-mazō xštvo daiṅhu-mazō, [yō daiṅhave hu-vaxšai fraðəmnahe varəðəmnahe xraθwəmnahe suyamnahe].

3. vacō paoirīm miθrēm kərənaoiti zastō-masō adāṭ framarəzaiti zastō-masō adāṭ aṅtarə urvaitya fradaθaiti, pasu-zamō adāṭ framarəzaiti pasu-zamō adāṭ aṅtarə urvaitya fradaθaiti.

4. staorō-mazō adāṭ framarəzaiti staorō-mazō adāṭ aṅtarə urvaitya fradaθaiti, vīrō-mazō adāṭ framarəzaiti vīrō-mazō adāṭ aṅtarə urvaitya fradaθaiti, daijhu-mazō adāṭ framarəzaiti daijhu-mazō adāṭ aṅtarə urvaitya fradaθaiti.

5. dātarə ... ašāum cvaṭ aēšō miθrō aiwi-druxtō āstāraiti yō vacahinō, āaṭ mraoṭ ahurō mazdā, θriš satāiš haḍa-ciθanəm narəm nabānazdištanəm para-baraiti.

6. dātarə ... ašāum cvaṭ aēšō miθrō aiwi-druxtō āstāraiti yō zastā-marštō, āaṭ mraoṭ ahurō mazdā, xšvaš satāiš haḍa-ciθanəm narəm nabānazdištanəm para-baraiti.

7. dātarə ... ašāum cvaṭ aēšō miθrō aiwi-druxtō āstāraiti yō pasu-mazō, āaṭ mraoṭ ahurō mazdā, hapta satāiš haḍa-ciθanəm narəm nabānazdištanəm para-baraiti.

8. dātarə ... ašāum cvaṭ aēšō miθrō aiwi-druxtō āstāraiti yō staorō-mazō, āaṭ mraoṭ ahurō mazdā, ašta satāiš haḍa-ciθanəm narəm nabānazdištanəm para-baraiti.

9. dātarə ... ašāum cvaṭ aēšō miθrō aiwi-druxtō āstāraiti yō virō-mazō, āaṭ mraoṭ ahurō mazdā, nava satāiš haḍa-ciθanəm narəm nabānazdištanəm para-baraiti.

10. dātarə ... ašāum cvaṭ aēšō miθrō aiwi-druxtō āstāraiti yō daijhu-mazō, āaṭ mraoṭ ahurō mazdā, hazaṅrəm haḍa-ciθanəm narəm nabānazdištanəm para-baraiti.

11. dātarə ... ašāum yō miθrēm aiwi-družaiti yim vacahinəm kā-hē asti ciθa, āaṭ mraoṭ ahurō mazdā, tišrō sata upāzananəm upāzōiṭ aspahē aštraya tišrō sata sraošō-caranaya.

12. dātarə ... ašāum yō miθrēm aiwi-družaiti yim zastā-marštēm kā-hē asti ciθa, āaṭ mraoṭ ahurō mazdā, xšvaš sata upāzananəm upāzōiṭ aspahē aštraya xšvaš sata sraošō-caranaya.

13. dātarə ... ašāum yō miθrēm aiwi-družaiti yim pasu-mazēm kā-hē asti ciθa, āaṭ mraoṭ ahurō mazdā, hapta sata upāzananəm upāzōiṭ aspahē aštraya hapta sata sraošō-caranaya.

14. dātarə ... ašāum yō miθrēm aiwi-družaiti yim staorō-mazēm kā-hē asti ciθa, āaṭ mraoṭ ahurō mazdā, ašta sata upāzananəm upāzōiṭ aspahē aštraya ašta sata sraošō-caranaya.

15. dātarə ... ašāum yō miθrəm aiwi-družaiti yim vīrō-mazəm kâ-hē asti ciθa, āaṭ mraoṭ ahurō mazdâ, nava sata upāzananəm upāzōiṭ aspahe aštraya nava sata sraoṣō-caranaya.

16. dātarə ... ašāum yō miθrəm aiwi-družaiti yim daiṛḡhu-mazəm kâ-hē asti ciθa, āaṭ mraoṭ ahurō mazdâ, hazarəm upāzananəm upāzōiṭ aspahe aštraya hazarəm sraoṣō-caranaya.

17. yō narš snaθəm usəhištaiti aētaṭ hē āgərəptəm yaṭ frašusaiti aētaṭ hē avaoirištəm yaṭ dim aēnō-manarḡha paiti-ašnaoitī aētaṭ hē arəduš, puxdəmcit nā arədušəm tanūm piryeite.

18. dātarə gaēθanəm astvaitinəm ašāum yō narəm āgərəptəm āgəurvayeyiti kâ-hē asti ciθa, āaṭ mraoṭ ahurō mazdâ, paṅca upāzana aspahe aštraya paṅca sraoṣō-caranaya bitīm dasa upāzana aspahe aštraya dasa sraoṣō-caranaya θritīm paṅca-dasa upāzana aspahe aštraya paṅca-dasa sraoṣō-caranaya.

19. tūirīm θrisatəm upāzananəm upāzōiṭ aspahe aštraya θrisatəm sraoṣō-caranaya puxdəm paṅcāsātəm upāzananəm upāzōiṭ aspahe aštraya paṅcāsātəm sraoṣō-caranaya xštūm haptāitīm upāzananəm upāzōiṭ aspahe aštraya haptāitīm sraoṣō-caranaya haptaθəm navaitīm upāzananəm upāzōiṭ aspahe aštraya navaitīm sraoṣō-caranaya.

20. aštəməm aētaēšəm šyaoθənanəm vərəzimnəm anuzvarštāṭ paiti paurvāt kâ-hē asti ciθa, āaṭ mraoṭ ahurō mazdâ, aētahe paiti pəšō-tanuye duye saite upāzananəm upāzōiṭ aspahe aštraya duye saite sraoṣō-caranaya.

21. dātarə ... ašāum yezi nōiṭ uzvarəzyāṭ yō narəm āgərəptəm āgəurvayeyiti kâ-hē asti ciθa, āaṭ mraoṭ ahurō mazdâ, aētahe paiti pəšō-tanuye duye saite upāzananəm upāzōiṭ aspahe aštraya duye saite sraoṣō-caranaya.

22. dātarə ... ašāum yō narəm avaoirištəm avaurvaēsaite kâ-hē asti ciθa, āaṭ mraoṭ ahurō mazdâ, dasa upāzana aspahe aštraya dasa sraoṣō-caranaya bitīm paṅca-dasa upāzana aspahe aštraya paṅca-dasa sraoṣō-caranaya.

23. θritīm θrisatəm upāzananəm upāzōiṭ aspahe aštraya θrisatəm sraoṣō-caranaya tūirīm paṅcāsātəm upāzananəm upāzōiṭ aspahe aštraya paṅcāsātəm sraoṣō-caranaya puxdəm haptāitīm upāzananəm upāzōiṭ aspahe aštraya haptāitīm sraoṣō-caranaya xštūm navaitīm upāzananəm upāzōiṭ aspahe aštraya navaitīm sraoṣō-caranaya.

24. haptaθəm aētaēšəm šyaoθənanəm vərəzimnəm anuzvarštāṭ paiti paurvāt kâ-hē asti ciθa, āaṭ mraoṭ ahurō mazdâ, aētahe paiti pəšō-tanuye duye saite upāzananəm upāzōiṭ aspahe aštraya duye saite sraoṣō-caranaya.

25. dātarə ... ašāum yezi nōiṭ uzvarəzyāṭ yō narəm avaoirištəm avaurvaēsaite kâ-hē asti ciθa, āaṭ mraoṭ ahurō mazdâ, aētahe paiti pəšō-

tanuye duye saite upāzananam upāzōiṭ aspahē aštraya duye saite sraoṣō-caranaya.

26. dātarə ... ašāum yō narəm arəduša snaθa jaiṇti kā-hē asti ciθa, āaṭ mraoṭ ahurō mazdā, paṇca-dasa upāzana aspahē aštraya paṇca-dasa sraoṣō-caranaya

27. bitīm θrisatəm upāzananam upāzōiṭ aspahē aštraya θrisatəm sraoṣō-caranaya θritīm paṇcāsātəm upāzananam upāzōiṭ aspahē aštraya paṇcāsātəm sraoṣō-caranaya tūirīm haptāitīm upāzananam upāzōiṭ aspahē aštraya haptāitīm sraoṣō-caranaya puxdōm navaitīm upāzananam upāzōiṭ aspahē aštraya navaitīm sraoṣō-caranaya.

28. xštūm aētaēšam šyaoθənanam ... sraoṣō-caranaya.

29. dātarə ... ašāum yezi nōiṭ uzvarəzyāṭ yō narəm arəduša snaθa jaiṇti kā-hē asti ciθa, āaṭ mraoṭ ahurō mazdā ... sraoṣō-caranaya.

30. dātarə ... ašāum yō narəm vīxrūməntəm xʻarəm jaiṇti kā-hē asti ciθa, āaṭ mraoṭ ahurō mazdā,

31. θrisatəm upāzananam upāzōiṭ aspahē aštraya θrisatəm sraoṣō-caranaya bitīm paṇcāsātəm upāzananam upāzōiṭ aspahē aštraya paṇcāsātəm sraoṣō-caranaya θritīm haptāitīm upāzananam upāzōiṭ aspahē aštraya haptāitīm sraoṣō-caranaya tūirīm navaitīm upāzananam upāzōiṭ aspahē aštraya navaitīm sraoṣō-caranaya.

32. puxdōm aētaēšam šyaoθənanam ... sraoṣō-caranaya.

33. dātarə ... ašāum yezi nōiṭ uzvarəzyāṭ yō narəm vīxrūməntəm xʻarəm jaiṇti kā-hē asti ciθa, āaṭ mraoṭ ahurō mazdā ... sraoṣō-caranaya.

34. dātarə ... ašāum yō narəm tacaṭ-vohunīm xʻarəm jaiṇti kā-hē asti ciθa, āaṭ mraoṭ ahurō mazdā, paṇcāsātəm upāzananam upāzōiṭ aspahē aštraya paṇcāsātəm sraoṣō-caranaya bitīm haptāitīm upāzananam upāzōiṭ aspahē aštraya haptāitīm sraoṣō-caranaya θritīm navaitīm upāzananam upāzōiṭ aspahē aštraya navaitīm sraoṣō-caranaya.

35. tūirīm aētaēšam šyaoθənanam ... sraoṣō-caranaya.

36. dātarə ... ašāum yezi nōiṭ uzvarəzyāṭ yō narəm tacaṭ-vohunīm xʻarəm jaiṇti kā-hē asti ciθa, āaṭ mraoṭ ahurō mazdā ... sraoṣō-caranaya.

37. dātarə ... ašāum yō narəm astō-biḍəm xʻarəm jaiṇti kā-hē asti ciθa, āaṭ mraoṭ ahurō mazdā, haptāitīm upāzananam upāzōiṭ aspahē aštraya haptāitīm sraoṣō-caranaya bitīm navaitīm upāzananam upāzōiṭ aspahē aštraya navaitīm sraoṣō-caranaya.

38. θritīm aētaēšam šyaoθənanam ... sraoṣō-caranaya.

39. dātarə ... ašāum yezi nōiṭ uzvarəzyāṭ yō narəm astō-biḍəm xʻarəm jaiṇti kā-hē asti ciθa, āaṭ mraoṭ ahurō mazdā ... sraoṣō-caranaya.

40. dātarə ... ašāum yō narəm frazābaodaḡhəm snaθəm jaiṅti kā-hē asti ciθa, āaṭ mraoṭ ahurō mazdā, navaitīm upāzananəm upāzōiṭ aspahe aštraya navaitīm sraošō-caranaya.

41. bitīm aētaēšam šyaoθənanəm ... sraošō-caranaya.

42. dātarə ... ašāum yezi nōiṭ uzvarəzyāṭ yō narəm frazābaodaḡhəm snaθəm jaiṅti kā-hē asti ciθa, āaṭ mraoṭ ahurō mazdā ... sraošō-caranaya.

43. hāmō-šyaoθna tē pascaēta bavaiṅti ašahe paiti paṅṭam ašahe paiti maθrəm ašahe paiti frasastīm.

44. yaēca ida narō hāmō-daēna jašan brāθra vā haxaya vā šaētō-cinaḡhō vā nāiri-cinaḡhō vā xratu-cinaḡhō vā yezi šaētō-cinaḡhō jašan ḡm ida šaētəm ḡm-bārayən yezi nāiri-cinaḡhō jašan upa vā nāirikəm vādayaēta.

45. yezi xratu-cinaḡhō jašan upa vā maθrəm spəṅtəm maraēta pourumca naēme asne aparəmca pourumca naēme xšafne aparəmca uxšne xraθwe vīdrvānahe ašāṭ ašica nəmaḡhāna uxšne xraθwe yaonəm āste, maiḡyāi asṅmca xšafṅmca avaḡhabdaēta paiti asne paiti xšafne vīspəm ā ahmāṭ yaṭ tā sraṅ vā drəṅjayaṅ yā paourva aēθrapatayō drəṅjayaṅ.

46. ḡm-taptibyō aiwyō cāxrare nərəbyō zaraθuštra, mā ḡuš mā vastrahe hatō adāitīm vaocōiṭ.

47. aḡaēca uiti nāirivaite zī-tē ahmāṭ pourum framraomi spitama zaraθuštra yaθa maḡavō fravāxšōiṭ vīsāne ahmāṭ yaθa əvīsāi puθrāne ahmāṭ yaθa apuθrāi šaētavatō ahmāṭ yaθa ašaētāi.

48. hāuca ayā narā vohu manō jāḡerəbuštarō aḡhaṭ yō ḡuš uruθwarō ḡm-pāfrāiti yaθa hāu yō nōiṭ iθa hō upa-mərətō hāu aspərənō-mazō hāu anumayō-mazō hāu staorō-mazō hāu vīrō-mazō.

49. aēšō zī narō paityeiṅti astō vīdōtuš pəšānaiti yasca išuš x'āθaxtō pəšānaiti yasca zəmakō pəšānaiti kamnəm vaste vaḡhanəm yasca mašīm drvaṅtəm sāstārəm kamərəḡaja pəšānaiti yasca ašəmaoḡəm anašavanəm aḡuharəstātəm pəšānaiti.

50. paoirīm aētaēšam šyaoθənanəm vərəzimmnəm nōiṭ bitīm, avada aētaḡa aētahe šyaoθnahe yaθa vaēθəṅti yaθa aētahmi aḡhvō yaṭ astvaiṅti ayaḡhaēnāiš karətāiš azdibīš paiti ava-kərəθyāṭ aošḡḡhaiθyāsə-tanvō masyō vā ahmāṭciṭ.

51. avada aētaḡa aētahe šyaoθnahe yaθa vaēθəṅti yaθa aētahmi aḡhvō yaṭ astvaiṅti ayaḡhaēnāiš fšəbīš azdibīš paiti ava-pašāṭ aošḡḡhaiθyāsə-tanvō masyō vā ahmāṭciṭ.

52. avaða aētaða aētahe šyaoθnahe yaθa vaēθənti yaθa aētahmi aṅhvō yaṭ astvaiṅti satō-vīrəm vaēməm anusō paiḍyāite aošaṅhaiθiyāsō-tanvō masyō vā ahmāṭciṭ.

53. avaða aētaða aētahe šyaoθnahe yaθa vaēθənti yaθa aētahmi aṅhvō yaṭ astvaiṅti anusō pārəm marəzəm ava-hištāt.

54. avaða aētaða aētahe šyaoθnahe yaθa vaēθənti yaθa aētahmi aṅhvō yaṭ astvaiṅti āpəm saokəntavaitīm zaranyāvaitīm vīθušavaitīm draogəm vīθuš apāiθiš rašnaošca paiti-saṅhəm miθraheca aiwi-druxtəm.

55. dātarə ... ašāum yō āpəm saokəntavaitīm zaranyāvaitīm vīθušavaitīm draogəm vīθuš apāiθiš rašnaošca paiti-saṅhəm miθraheca aiwi-druxtəm kā-hē asti ciθa, āaṭ mraoṭ ahurō mazdā, hapta sata upāzananəm upāzōiṭ aspahe aštraya hapta sata sraoṣō-caranaya. ašəm vohū.....

5.

1. nā-taṭ para-iriθyeiti avi jaṅfnavō raonəm ā-taṭ mərəγəm uzvazaitē haca barəšnavō gairinəm avi jaṅfnavō raonəm upa-təm kəhrpəm fraṅuharaiti yəm iristahe mašyehe, ā-taṭ mərəγəm uzvazaitē haca jaṅfnavō raonəm avi barəšnavō gairinəm upa-təm vanəm vazaitē xraoždvanəmca varədvānəmca avi dim vaṅta avi dim irita avi dim patita.

2. nā-taṭ frašusaiti haca jaṅfnavō raonəm avi barəšnavō gairinəm upa-təm vanəm aēiti yəm hō mərəγō āθre aēsmən iṣaiti, avi dim janaiti avi dim θwərəsaiti avi dim tāšti avi dim aiwi-raocayēiti āθrō ahurahe mazdā puθrəm kā-hē asti ciθa.

3. āaṭ mraoṭ ahurō mazdā, nōiṭ spō-bərətō nōiṭ vayō-bərətō nōiṭ vəhrkō-bərətō nōiṭ vātō-bərətō nōiṭ maxši-bərətō nasuš narəm nōiṭ āstryēiti.

4. yezica aēte nasāvō yā spō-bərətaca vayō-bərətaca vəhrkō-bərətaca vātō-bərətaca maxši-bərətaca nasuš narəm āstryēiṅtīm aṅhāt iṣarə-štāitya mē vīspō aṅhuš astvā iṣasəm jiṭ-ašəm xraodaṭ-urva pəšō-tanuš frēna aṅhəm nasunəm yā paiti āya zəmə iririθarə.

5. dātarə ... ašāum nā-taṭ āpəm hiṅcāiti avi yavō-carānīm ana-tā vaidīm ayā ana bitīm ana θritīm pasca tūirīm nasāum ava-karəšənti spānəm vā raožəm vā vəhrkəm vā kā-hē asti ciθa.

6. āaṭ mraoṭ ahurō mazdā, nōiṭ spō-bərətō nōiṭ vayō-bərətō nōiṭ vəhrkō-bərətō nōiṭ vātō-bərətō nōiṭ maxši-bərətō nasuš narəm nōiṭ āstryēiti.

7. yezica aēte nasāvō yā spō-bərətaca vayō-bərətaca vəhrkō-bərətaca vātō-bərətaca maxši-bərətaca nasuš narəm āstryēiṅtīm aṅhāt iṣarə-štāitya mē vīspō aṅhuš astvā iṣasəm jiṭ-ašəm xraodaṭ-urva pəšō-tanuš frēna aṅhəm nasunəm yā paiti āya zəmə iririθarə.

8. dātarə ... ašāum āfš narəm jaiṅti vā, āaṭ mraoṭ ahurō mazdā, āfš narəm nōiṭ jaiṅti astō vīdōtuš dim baṇdayeiti vayō dim bastəm nayeiti āfš uzvazaiti āfš nivazaiti āfš paiti-raēcayeiti vayō dim pascaēta fraṇuharəṅti,

aθra aḍāṭ frajasaiti
baxta aḍāṭ nijasaiti.

9. dātarə ... ašāum ātarš narəm jaiṅti vā, āaṭ mraoṭ ahurō mazdā, ātarš narəm nōiṭ jaiṅti astō vīdōtuš dim baṇdayeiti vayō dim bastəm nayeiti ātarš haṇdažaiti asta uštānəmca,

aθra aḍāṭ frajasaiti
baxta aḍāṭ nijasaiti.

10. dātarə ... ašāum frā hama saciṅte aθa aiwi-gāme kuθa tē vərəzyaṅ aēte yōi mazdayasna, āaṭ mraoṭ ahurō mazdā, nmāne nmāne vīsi vīsi θrāyō kata uzdaioṅaṅ aētahe yaṭ iristahe.

11. dātarə ... ašāum cvaṅtō aṅhən aēte kata aētahe yaṭ iristahe, āaṭ mraoṭ ahurō mazdā, yaṭ hē nōiṭ ərədvō aṅhanəm vaṅḍanəm upa-janyāṭ nōiṭ fraša pādaēibya nōiṭ zastaēibya vitarəm, aēšō zī asti dāityō kata aētahe yaṭ iristahe.

12. aētaḍa hē uzbaodəṅ tanūm nidaiṅaṅ bixšaparəm vā θrixšaparəm vā māzdrājahīm vā vīspəm ā ahmāṭ yaṭ frā vayō paṭaṅ frā urvara uxšyaṅ nyāṅcō apa-tacin us vātō zəṅ haēcayāṭ.

13. āaṭ yaṭ hiš frā vayō paṭaṅ frā urvara uxšyaṅ nyāṅcō apa-tacin us vātō zəṅ haēcayāṭ aētaḍa hē aēte mazdayasna aētəm kəhrpəm hvarə-darəsīm kərənaoṭ.

14. yezi nōiṭ aēte mazdayasna aētəm kəhrpəm hvarə-darəsīm kərənavəṅ yārə-drājō avavaṅtəm ašavaṅnyāi təṅ ciθəṅ daēsayō vīspəm ā ahmāṭ nasuṅaṅca aiwi-varštanəṅ daxmanəṅca aiwi-varštanəṅ hixranəṅca aiwi-varštanəṅ vayanəṅca fraṇuharətanəṅ.

15. dātarə ... ašāum āpəm zazāhi tūm yō ahurō mazdā zrayaṅhaṭ haca vouru-kašāṭ haθra vātəmca dunmaṅca,

16. avi nasūm vazāhi tūm yō ahurō mazdā upa daxməm vazāhi tūm yō ahurō mazdā upa hixrəm vazāhi tūm yō ahurō mazdā upa astəm frazayayāhi tūm yō ahurō mazdā aṅhaiθīm frafrāvayāhi tūm yō ahurō mazdā tā haθra frafrāvayāhi avi zrayō pūitikəm.

17. āaṭ mraoṭ ahurō mazdā,
aēvaθa bā zaraθuštra
yaθa tūm ərəzvō vašəṅhe,
āpəm zazāmi azəm yō ahurō mazdā zrayaṅhaṭ haca vouru-kašāṭ haθra
vātəmca dunmaṅca,

18. avi nasūm vazāmi azəm yō ahurō mazdā upa daxməm vazāmi azəm yō ahurō mazdā upa hixrəm vazāmi azəm yō ahurō mazdā upa astəm frazayayāmi azəm yō ahurō mazdā aṅhaiθim frafrāvayāmi azəm yō ahurō mazdā tā haθra frafrāvayāmi avi zrayō pūitikəm.

19. tē hištənti γžarə-γžarəntiš aṅtarə arəðəm zrayaṅhō, yaoždya taciṅti āpō zrayaṅhaṭ haca pūitikāṭ avi zrayō vouru-kašəm avi vanəm yaṃ hvāpim, aθra mē urvarā raodənti vīspā vīspō-sarəðō satavaitinəm hazajravaitinəm baēvarə baēvaranəm,

20. tā haθra vīvārayemi
azəm yō ahurō mazdā
x'arəθəmca naire ašaone
vāstrəmca gave huḍāṅhe,
yavō mē mašyō x'arāt vāstrəm gave huḍāṅhe.

21. imaṭ vaṅhō imaṭ srayō
yaθa tūm ərəzvō vašaṅhe,
ā-dim tā vaca rāmayat
ahurō mazdā ašava
ašavanəm zaraθuštrəm,
yaoždā mašyāi aipi-zaθəm vahišta, hā yaoždā zaraθuštra yā daēna
māzdayasniš yō hvəm aṅhvəm yaoždāite humatāišca hūxtāišca hvarštāišca.

22. dātərə ... ašāum cū asti masyō vaṅhō srayō aētəm dātəm yim vīdōyūm zaraθuštri upairi anyāiš sravāiš masanaca vaṅhanaca srayanaca.

23. āat mraoṭ ahurō mazdā, maṅayən bā spitama zaraθuštra aētəm dātəm yim vīdōyūm zaraθuštri upairi anyāiš sravāiš masanaca vaṅhanaca srayanaca yaθa zrayō vouru-kašəm upairi anyā āpō.

24. maṅayən bā spitama zaraθuštra aētəm dātəm yim vīdōyūm zaraθuštri upairi anyāiš sravāiš masanaca vaṅhanaca srayanaca yaθa masyayā āfš kasyaṅham aṅəm avi-frādavaiti, maṅayən bā spitama zaraθuštra aētəm dātəm yim vīdōyūm zaraθuštri upairi anyāiš sravāiš masanaca vaṅhanaca srayanaca yaθa masyayā vana kasyaṅham vanəm aiwi-vərənvaiti.

25. maṅayən bā spitama zaraθuštra aētəm dātəm yim vīdōyūm zaraθuštri upairi anyāiš sravāiš masanaca vaṅhanaca srayanaca yaθa iməm zəm āca pairica bvāva.

26. aoxtō ratuš aoxtō sraošāvarəzō uzgərəptāt paiti draonāt nava uzgərəptāt dātāt paiti draonāt nava dātāt nisritāt paiti draonāt nava nisritāt xšayeite hē pascaēta aēša yō ratuš θrišum aētahe ciθā aṅaṅharštə, yezica hē anya aṅa šyaoθna fravaršta paitita hē ciθa, āat yezi-šē anya aṅa šyaoθna nōiṭ fravaršta paititəm ahe narš yavaēca yavaētātaēca.

27. dātārə ... ašāum yō narō hāmō-gātvō nipaidyeiņte hām vā paiti stairiš hām vā paiti barəziš paitica hē anya dva vā nara aņhən paņca vā paņcāsatəm vā satəm vā hām nāirinām āať aēšām narām aēvō iriθyāť cvať aņtarə nərōš aēša druxš yā nasuš axtica pivatica āhitica frāšnaoiti.

28. āať mraoť ahurō mazdā, yezi aņhať āθrava frā-zī dvāšaiti spitama zaraθuštra aēša druxš yā nasuš yezi aēvaņdasō frāšnaoiti dasəməm paiti-raēθwayeiti, āať yezi aņhať raθaēštā frā-zī dvāšaiti spitama zaraθuštra aēša druxš yā nasuš yezi dasəməm frāšnaoiti nāuməm paiti-raēθwayeiti, āať yezi aņhať vāstryō fšuyas frā-zī dvāšaiti spitama zaraθuštra aēša druxš yā nasuš yezi nāuməm frāšnaoiti aštəməm paiti-raēθwayeiti.

29. āať yezi aņhať spā pasuš-haurvō frā-zī dvāšaiti spitama zaraθuštra aēša druxš yā nasuš yezi aštəməm frāšnaoiti haptaθəm paiti-raēθwayeiti, āať yezi aņhať spā viš-haurvō frā-zī dvāšaiti spitama zaraθuštra aēša druxš yā nasuš yezi haptaθəm frāšnaoiti xštūm paiti-raēθwayeiti.

30. āať yezi aņhať spā vohunazgō frā-zī dvāšaiti spitama zaraθuštra aēša druxš yā nasuš yezi xštūm frāšnaoiti puxdəm paiti-raēθwayeiti, āať yezi aņhať spā taurunō frā-zī dvāšaiti spitama zaraθuštra aēša druxš yā nasuš yezi puxdəm frāšnaoiti tūirīm paiti-raēθwayeiti.

31. āať yezi aņhať spā sukurənō frā-zī dvāšaiti spitama zaraθuštra aēša druxš yā nasuš yezi tūirīm frāšnaoiti θritīm paiti-raēθwayeiti, āať yezi aņhať spā jažuš frā-zī dvāšaiti spitama zaraθuštra aēša druxš yā nasuš yezi θritīm frāšnaoiti bitīm paiti-raēθwayeiti.

32. āať yezi aņhať spā aiwizuš frā-zī dvāšaiti spitama zaraθuštra aēša druxš yā nasuš yezi bitīm frāšnaoiti paoirīm paiti-raēθwayeiti, āať yezi aņhať spā vīzuš frā-zī dvāšaiti spitama zaraθuštra aēša druxš yā nasuš yezi paoirīm frāšnaoiti paoirīm paiti-raēθwayeiti.

33. dātārə ... ašāum āať yezi aņhať spā urupiš cvať aēšō spā yō urupiš spəņtahe mainyōuš dāmanām hām-raēθwayeiti cvať paiti-raēθwayeiti.

34. āať mraoť ahurō mazdā, nōiť aēša spā yō urupiš spəņtahe mainyōuš dāmanām hām-raēθwayeiti nōiť paiti-raēθwayeiti anyō ahmāť yō janaiti fracā kušaiti ā dim ā-hišhaxti yavaēca yavaētātaēca.

35. dātārə ... ašāum āať yezi aņhať mairyō drvā bizaņgrō avaθa ašəmaoγō anašava cvať spəņtahe mainyōuš dāmanām hām-raēθwayeiti cvať paiti-raēθwayeiti.

36. āať mraoť ahurō mazdā, yaθa vazayaciť viš-hušō tarō yārə mərətō, jvō zī spitama zaraθuštra mainyō drvā bizaņgrō avaθa ašəmaoγō anašava spəņtahe mainyōuš dāmanām hām-raēθwayeiti jvō paiti-raēθwayeiti,

37. jvō āpəm jaiņti jvō ātrəm frāvayeiti jvō gām varatām azaitē jvō narəm ašavanəm frazābaodaņhəm snaθəm vīkərəť-uštānəm jaiņti nōiť avaθa mərətō,

38. jvō zī spitama zaraθuštra mairiyō drvā bizaṅgrō avaθa ašəmaoγō anašava narəm ašavanəm haṅhuš xʷarəθaheca vastraheca draošca nimataheca ayaṅheca apa-baraiti nōiṭ avaθa mərətō.

39. dātarə ... ašāum yōi nmānā haṃ-barāmahi ašāum ahura mazda ahmi aṅhvō yaṭ astvaiṅti ātrəmca barəsmaca taštaca haomaca hāvanaca āaṭ pascaēta ahe nmānahe spā vā nā vā iriṭyāṭ kuθa tē vərəzyaṇ aēte yōi mazdayasna.

40. āaṭ mraoṭ ahurō mazdā, us haca aēibyō nmānaēibyō barayən spitama zaraθuštra ātrəmca barəsmaca taštaca haomaca hāvanaca us haca iristəm barayən maṇayən ahe yaθa nā dāityō dāityayāi bairyeteca xʷairyeteca.

41. dātarə ... ašāum kuθa tē aēte mazdayasna aētəm ātrəm aiti barəṇ ava aētəm nmānəm yaṭ aēšō nā para-iriṭyāṭ.

42. āaṭ mraoṭ ahurō mazdā, nava-xšaparəm upa-maṇayən aēte yōi mazdayasna aiwi-gāme āaṭ hama māzdrājahīm, pascaēta aēte mazdayasna aētəm ātrəm aiti barəṇ ava aētəm nmānəm yaṭ aēšō nā para-iriṭyāṭ.

43. dātarə ... ašāum yezica aēte mazdayasna aētəm ātrəm aiti barəṇ ava aētəm nmānəm yaṭ aēšō nā para-iriṭyāṭ aṅtarāṭ naēmāṭ nava-xšaparahe aṅtarāṭ naēmāṭ māzdrājahīm kā hē asti ciθa.

44. āaṭ mraoṭ ahurō mazdā, aētahe paiti pəšō-tanuye duye saite upāzananəm upāzōiṭ aspahē aštraya duye saite sraošō-caranaya.

45. dātarə ... ašāum yaṭ ahmi nmāne yaṭ māzdayasnōiš nāirika upaspuθrīm jasāṭ aēvō-māhīm vā bimāhīm vā θrimāhīm vā caθru-māhīm vā paṅca-māhīm vā xšvaš-māhīm vā hapta-māhīm vā ašta-māhīm vā nava-māhīm vā dasa-māhīm vā aētaða aēša nāirika taða apuθrīm nijasāṭ uzuštana kuθa tē vərəzyaṇ aēte yōi mazdayasna.

46. āaṭ mraoṭ ahurō mazdā, yaṭ ahmi nmāne yaṭ māzdayasnōiš fraēštəm yaozdātō-zəmōtəməmca hušō-zəmōtəməmca kambištəmca aēte paθā frayaṇ pasvasca staorāca ātrəmca ahurahe mazdā barəsmaca ašaya frastarətəm narəmca yim ašavanəm.

47. dātarə ... ašāum cvaṭ drājō haca āθraṭ cvaṭ drājō haca apaṭ cvaṭ drājō haca barəsmən frastairyāṭ cvaṭ drājō haca nərəbyō ašavabyō.

48. āaṭ mraoṭ ahurō mazdā, θrisata-gāim haca āθraṭ θrisata-gāim haca apaṭ θrisata-gāim haca barəsmən frastairyāṭ θrigāim haca nərəbyō ašavabyō.

49. aētaða hē aēte mazdayasna aiṅhā zəmō pairi-daēzaṇ pairi-daēzayaṇ xʷarəθaēibyō pascaēta āstayaṅta aēte yōi mazdayasna vastraēibyō pascaēta āstayaṅta aēte yōi mazdayasna.

50. dātarə ... ašāum ciš aēša nāirika paoirīm xʷarəθanəm xʷarāṭ.

51. āaṭ mraoṭ ahurō mazdā, gōuš maēsmana ātryō-paiti-iristēm θriš vā šāmaṇ yaṭ vā xšvaš yaṭ vā nava aēte daxma upaṇharəzaēta aṇtarāṭ naēmāṭ barəθrišva uruθwō-hva,

52. āaṭ pascaēta aipi-γžaurvatəm aspayanəmca payaṇḥəm gāvayanəmca maēšinanəmca buzyanəmca ḥəm-vaoirinəm us-vaoirinəm gəmca xʼāstēm anāpəm yaomca ašəm anāpəm maḍuca anāpəm.

53. dātarə ... ašāum cvaṭ drājō upa-maṇayən cvaṭ drājō upa-maitīm āste xʼarəṇti gəmca yaomca maḍuca.

54. āaṭ mraoṭ ahurō mazdā, θrixšaparəm upa-maṇayən θrixšaparəm upa-maitīm āste xʼarəṇti gəmca yaomca maḍuca, āaṭ pasca θrixšaparāṭ us tanūm snayaēta us vastrāṭ gōuš maēsmana apāca nava upa maγəm paiti avaθa yaoždayaṇ.

55. dātarə ... ašāum cvaṭ drājō upa-maṇayən cvaṭ drājō upa-maitīm āste pasca θrixšaparāṭ yūtō gātuš yūtō xʼarəθa yūtō vastra yūtō anyaeibyō mazdayasnaēibyō.

56. āaṭ mraoṭ ahurō mazdā, nava-xšaparəm upa-maṇayən nava-xšaparəm upa-maitīm āste pasca θrixšaparāṭ yūtō gātuš yūtō xʼarəθa yūtō vastra yūtō anyaeibyō mazdayasnaēibyō, āaṭ pasca nava-xšaparāṭ us tanūm snayaēta us vastrāṭ gōuš maēsmana apāca paiti avaθa yaoždayaṇ.

57. dātarə ... ašāum kaṭ tā vastra ḥəm-yūta pasca yaoždāiti frasnāiti zaoθre vā hāvanāne vā ātravaxše vā frabərəθre vā ābərəte vā āsnāθre vā raēθwiškare vā sraošāvarəze vā aθaurune vā mašyāi raθaēštāi vā vāstryāi vā fšuyante.

58. āaṭ mraoṭ ahurō mazdā, nōiṭ tā vastra ḥəm-yūta pasca yaoždāiti frasnāiti zaoθre nōiṭ hāvanāne nōiṭ ātravaxše nōiṭ frabərəθre nōiṭ ābərəte nōiṭ āsnāθre nōiṭ raēθwiškare nōiṭ sraošāvarəze nōiṭ aθaurune mašyāi nōiṭ raθaēštāi nōiṭ vāstryāi fšuyante.

59. yaṭ ahmi nmāne yaṭ māzdayasnōiš nāirika daxstavaiti aṇḥaṭ yaṭ vā skəndō aipi-jatō pištrō aipi-iritō gātuš aētaḍa aētahe āste stairišca barəzišca ḥəm-vərənāṇte vīspəm ā ahmāṭ yaṭ ḥəm-ci zastō frīne nižbarāṭ.

60. nōiṭ zī ahurō mazdā yaṇhuyanəm avarətanəm paiti-ricya daiθe nōiṭ aspərənō-mazō nōiṭ avacinō-mazō yavaṭ aēša carāitika avi məm ḥarəkō ḥarəcayāṭ.

61. yezica aēte mazdayasna upairi aētəm iristēm avi məm ḥarəkō ḥərəzyāṭ yavaṭ aēša carāitika avi məm ḥarəkō ḥarəcayāṭ jvasciṭ nōiṭ bvāṭ ašava məšasciṭ nōiṭ baxšaiti vahištahe aṇḥōuš,

62. təm ahūm paiθyāiti yim drvatəm təmaṇḥaēnəm təmasciθrəm təmaṇḥəm təm vā ahūm drvaṇtō šyaoθnāiš xʼāiš xʼā-daēna nisirinuyāṭ acištāi aṇuḥe.

ašəm vohū....

6.

1. cvañtəm drājō zrvānəm aiñhā zəmō anaiðya yať ahmi spānasca narasca para-iriθiñti, āať mraoť ahurō mazdā, yārə-drājō ašāum zaraθuštra aiñhā zəmō anaiðya yať ahmi spānasca narasca para-iriθiñti,

2. māca pascaēta mazdayasna təm zəm kārəyən mā āpō hərəzəyən yať ahmi spānasca narasca para-iriθiñti aňtarāť naēmāť yārə-drājō vasō pascaēta mazdayasna təm anyəm zəm kārəyən vasō āpō hərəzəyən.

3. yezi mazdayasna təm zəm kārəyən yezi āpō hərəzəyən yať ahmi spānasca narasca para-iriθiñti aňtarāť naēmāť yārə-drājō nasuspaēm pascaēta āstryāñte aēte yōi mazdayasna apasca zəmasca urvarayāasca.

4. dātarə ... ašāum yezi mazdayasna təm zəm kārəyən yezi āpō hərəzəyən yať ahmi spānasca narasca para-iriθiñti aňtarāť naēmāť yārə-drājō kā-hē asti ciθa.

5. āať mraoť ahurō mazdā, aētahe paiti pəšō-tanuye duye saite upāzananəm upāzōiť aspahe aštraya duye saite sraošō-caranaya.

6. dātarə ... ašāum yezi vasən mazdayasna zəm raodəyəm hixtəyāēca karštəyāēca parakaňtəyāēca kuθa tē vərəzyən aēte yōi mazdayasna.

7. āať mraoť ahurō mazdā, aētaða hē aēte mazdayasna aiñhā zəmō pairišəyāñta aētaňhəm aštəmca varəsəmca spāməmca mūθramca vanhutātəmca.

8. dātarə ... ašāum yezi nōiť pairišəñte aētaňhəm aštəmca varəsəmca spāməmca mūθramca vanhutātəmca kā-hē asti ciθa.

9. āať mraoť ahurō mazdā, aētahe paiti pəšō-tanuye duye saite upāzananəm upāzōiť aspahe aštraya duye saite sraošō-caranaya.

10. dātarə ... ašāum yō astəm upaňharəzaiti sūnō vā para-iristahe mašyehe vā avavať aipi yaθa kasištahe ərəzvō fratəməm t̥bišiš yezi ahmya iriθyeiti ūθəm vā ūθō-tās vā kā-hē asti ciθa.

11. āať mraoť ahurō mazdā, θrisatəm upāzananəm upāzōiť aspahe aštraya θrisatəm sraošō-caranaya.

12. dātarə ... ašāum yō astəm upaňharəzaiti sūnō vā para-iristahe mašyehe vā avavať aipi yaθa maðəmahe ərəzvō fratəməm t̥bišiš yezi ahmya iriθyeiti ūθəm vā ūθō-tās vā kā-hē asti ciθa.

13. āať mraoť ahurō mazdā, pañcāsətəm upāzananəm upāzōiť aspahe aštraya pañcāsətəm sraošō-caranaya.

14. dātarə ... ašāum yō astəm upaṅharəzaiti sūnō vā para-iristahe mašyehe vā avavaṭ aipi yaθa masištahe ərəzvō fratəməm t̄bišiš yezi ahmya iriθyeiti ūθəm vā ūθō-tās vā kā-hē asti ciθa.

15. āaṭ mraoṭ ahurō mazdā, haptāitīm upāzananəm upāzōiṭ aspahē aštraya haptāitīm sraoṣō-caranaya.

16. dātarə ... ašāum yō astəm upaṅharəzaiti sūnō vā para-iristahe mašyehe vā ərəzu-stavaṅhəm vā pərəsu-masaṅhəm vā yezi ahmya iriθyeiti ūθəm vā ūθō-tās vā kā-hē asti ciθa.

17. āaṭ mraoṭ ahurō mazdā, navaitīm upāzananəm upāzōiṭ aspahē aštraya navaitīm sraoṣō-caranaya.

18. dātarə ... ašāum yō astəm upaṅharəzaiti sūnō vā para-iristahe mašyehe vā baēərəzu-stavaṅhəm vā bipərəsu-masaṅhəm vā yezi ahmya iriθyeiti ūθəm vā ūθō-tās vā kā-hē asti ciθa.

19. āaṭ mraoṭ ahurō mazdā, aētahe paiti pəṣō-tanuye duye saite upāzananəm upāzōiṭ aspahē aštraya duye saite sraoṣō-caranaya.

20. dātarə ... ašāum yō astəm upaṅharəzaiti sūnō vā para-iristahe mašyehe vā bāzu-stavaṅhəm vā sraoni-masaṅhəm vā yezi ahmya iriθyeiti ūθəm vā ūθō-tās vā kā-hē asti ciθa.

21. āaṭ mraoṭ ahurō mazdā, caθwārō sata upāzananəm upāzōiṭ aspahē aštraya caθwārō sata sraoṣō-caranaya.

22. dātarə ... ašāum yō astəm upaṅharəzaiti sūnō vā para-iristahe mašyehe vā avavaṭ aipi yaθa narš vaγdanəm yezi ahmya iriθyeiti ūθəm vā ūθō-tās vā kā-hē asti ciθa.

23. āaṭ mraoṭ ahurō mazdā, xšvaš sata upāzananəm upāzōiṭ aspahē aštraya xšvaš sata sraoṣō-caranaya.

24. dātarə ... ašāum yō vīspəm haurvəm tanūm upaṅharəzaiti sūnō vā para-iristahe mašyehe vā yezi ahmya iriθyeiti ūθəm vā ūθō-tās vā kā-hē asti ciθa.

25. āaṭ mraoṭ ahurō mazdā, hazaṅrəm upāzananəm upāzōiṭ aspahē aštraya hazaṅrəm sraoṣō-caranaya.

26. dātarə ... ašāum yaṭ aēte yōi mazdayasna pāda ayaṅtəm vā taciṅtəm vā barəmnəm vā vazəmnəm vā taci-apaya nasāum frajasan kuθa tē vərəzyan aēte yōi mazdayasna.

27. āaṭ mraoṭ ahurō mazdā, maṭ aoθranəm framuxti maṭ vastranəm niḍāiti upa-mānayən zaraθuštra fraša frayōiṭ iristəm uzbarōiṭ āpō zaraθuštra ā-zangaēibysciṭ āpō ā-žnubysciṭ āpō ā-maiḍyaṅasciṭ āpō ā-nərəbərəzasciṭ āpō vīspəm ā ahmāṭ yaḍōiṭ upa-jasōiṭ iristəm tanūm.

28. dātārə ... ašāum yezica aēte nasāvō friθyeitica puyetica kuθa tē vərəzyaṇ aēte yōi mazdayasna.

29. āaṭ mraoṭ ahurō mazdā, yavaṭ cvaṭca hē zastaēibya haṅgaurvayaṇ aētavaṭ apaṭ haca nižbārayəṇ huše zəme nidaiṭyaṇ nōiṭ astam nōiṭ varsam nōiṭ spāmam nōiṭ mūθram nōiṭ vaṅhutātam pairi-spāiti apam āstryānte.

30. dātārə ... ašāum cvaṭ aētaṅhā āpō yaṭ armaēštayā aēša druxš yā nasuš axtica pivatica āhitica frāšnaoiti.

31. āaṭ mraoṭ ahurō mazdā, xšvaš-gāim kəmcit paiti caθrušanam vīspəm ā ahmāt aēša āfš ayaoždya anaiwiš-xʳarəθa yavaṭ aēša nasuš nižbərəta, us haca nasāvō aētavaṭ apaṭ haca nižbārayəṇ huše zəme nidaiṭyaṇ.

32. aiṅhā āpō para-hiṅcayəṇ yaṭ vā naēməm yaṭ vā θrišum yaṭ vā caθrušum yaṭ vā paṅtaṅhum yezi tūtava navāt tūtava, pasca nasāvō nižbərəθi pasca āpō para-hixti aēša āfš yaoždya bavaiti vasō aiwiš-xʳarəθa pasubya vīraēibya hamaθa yaθa paraciṭ.

33. dātārə ... ašāum cvaṭ aētaṅhā āpō yaṭ cātayā uzuityāasca aēša druxš yā nasuš axtica pivatica āhitica frāšnaoiti.

34-35. āaṭ mraoṭ ahurō mazdā, vīspəm ā ahmāt aēša āfš ayaoždya anaiwiš-xʳarəθa yavaṭ aēša nasuš nižbərəta, us haca² ... yaθa paraciṭ.

36. dātārə ... ašāum cvaṭ aētaṅhā āpō yaṭ snaēziṅtyāica srasciṅtyāica aēša druxš yā nasuš axtica pivatica āhitica frāšnaoiti.

37. āaṭ mraoṭ ahurō mazdā, θrigāim kəmcit paiti caθrušanam vīspəm ā ahmāt aēša āfš ayaoždya anaiwiš-xʳarəθa yavaṭ aēša nasuš nižbərəta, us haca nasāvō aētavaṭ apaṭ haca nižbārayəṇ huše zəme nidaiṭyaṇ.

38. pasca nasāvō nižbərəθi pasca āpō vītaxti aēša āfš yaoždya bavaiti vasō aiwiš-xʳarəθa pasubya vīraēibya hamaθa yaθa paraciṭ.

39. dātārə ... ašāum cvaṭ aētaṅhā āpō yaṭ frātaṭ-carətayā aēša druxš yā nasuš axtica pivatica āhitica frāšnaoiti.

40. āaṭ mraoṭ ahurō mazdā, θrigāim nyāpəm nava-gāim paityāpəm xšvaš-gāim anaiḍim vīspəm ā ahmāt ... nidaiṭyaṇ.

41. pasca nasāvō nižbərəθi pasca āθritim aiwi-varaiti aēša āfš yaoždya bavaiti vasō aiwiš-xʳarəθa pasubya vīraēibya hamaθa yaθa paraciṭ.

42. dātārə ... ašāum kaṭ tā haoma yaoždayaṇ aṅhən ašāum ahura mazda yā nasāum ava-bərəta sūnō vā para-iristahe mašyehe vā.

43. āaṭ mraoṭ ahurō mazdā, yaoždayaṇ aṅhən ašāum zaraθuštra nōiṭ haomō hutō axtiš nōiṭ mahrkō nōiṭ nasuš ava-bərətō ava aēte ahuta yaθa caθwārō ərəzvō aētaēšamca zəmə nidaiṭyaṇ aṅtarə arəḍəm nmānahe vīspəm

2 = Parr. 31-32; the Mss. with P. V. abbreviate.

ā ahmāt yaṭ hē yārē-drājō sacāite, āaṭ pasca yārē-drājō vasō xʷarəθā aṅhən nərəbyō ašavabyō hamaθa yaθa paraciṭ.

44. dātarē ... ašāum kva narəṃ iristanəṃ tanūm barāma ahura mazda kva nidaθāma.

45. āaṭ mraoṭ ahurō mazdā, barəzištaēšvaca paiti gātušva spitama zaraθuštra yaḍōiṭ dim bāidištəm avazanəṃ sūnō vā kərəfš-xʷarō vayō vā kərəfš-xʷarō.

46. aētaḍa hē aēte mazdayasna aētəm iristəm nidarəzyəṇ havaēibya pāḍaēibya xʷaēpaθyāca varsa ayaṅhaēnəm vā zarštvaēnəm vā fravāxšaēnəm vā yezi nōiṭ sūnō vā kərəfš-xʷarō vayō vā kərəfš-xʷarō aētaṅḥəṃ astəṃ avi apəṃca urvaranəṃca barəṇtəm frajasəṅ.

47. dātarē ... ašāum yezi nōiṭ nidarəzyāṇte aētaḍa hē aēte sūnō vā kərəfš-xʷarō vayō vā kərəfš-xʷarō aētaṅḥəṃ astəṃ avi apəṃca urvaranəṃca barəṇtəm frajasāt kā-hē asti ciθa.

48. āaṭ mraoṭ ahurō mazdā, aētahe paiti pəšō-tanuye duye saite upāzananəṃ upāzōiṭ aspəhe aštraya duye saite sraošō-caranaya.

49. dātarē ... ašāum kva narəṃ iristanəṃ azdibiš barāma ahura mazda kva nidaθāma.

50. āaṭ mraoṭ ahurō mazdā, uždānəm hē adāt kərənaoṭ upairi spānəm upairi raožəm upairi vəhrkəm anaiwi-varəṇtīm upara-naēmāt apō yaṭ vairyayā

51. yezi tavaṇ aēte mazdayasna yezi asānaēšva yezi vicicaēšva yezi tūtuxšva, yezi nōiṭ tavaṇ aēte mazdayasna xʷā-stairiš xʷā-barəziš raocā aiwi-varəna hvarə-darəsyā hē zəme paiti nidaiθīta. ašəm vohū.....

7.

1. pərəsaṭ zaraθuštrō ahurəm mazdəṃ, ahura mazda mainyō spōništa dātarē gaēθanəṃ astvaitinəṃ ašāum kaṭ tā nara irista aēša druxš yā nasuš upa-dvəšaiti.

2. āaṭ mraoṭ ahurō mazdā, išarē pasca para-iristīm spitama zaraθuštra us haca baodō ayāt aēša druxš yā nasuš upa-dvəšaiti apāxəḍraēibyō naēmaēibyō maxši kəhrpa ərəyāitya frašnaoš apazaḍəṅhō akaranəm driwyā yaθa zōiždištāiš xrafstrāiš.

3. dātarē ... ašāum āaṭ yaṭ aēte yā spō-jataca vəhrkō-jataca yātu-jataca t̄baēšō-jataca vaēmō-jataca mašyō-jataca zūrō-jataca ažō-jataca cvəṇtəm pascaēta zrvānəm aēša druxš yā nasuš upa-dvəšaiti.

4. āaṭ mraoṭ ahurō mazdā, asnyehe pascaēta anyehe raθwō aēša druxš yā nasuš upa-dvəšaiti.

5-8. dātarə ... ašāum yō narō hāmō-gātvō³ ... yezi puxdōm frāšnaoiti tūirīm paiti-raēθwayeiti, aētaða aētahe āste stairišca barəzišca ḥam-vəṛənaṅte.

9. dātarə ... ašāum cvaṭ aēte stairišca barəzišca aēša druxš yā nasuš axtica pivatica āhitica frāšnaoiti.

10. āaṭ mraoṭ ahurō mazdā, upōma aēte stairišca aṅtəma aiwi-varəna aēša druxš yā nasuš axtica pivatica āhitica frāšnaoiti.

11. dātarə ... ašāum kaṭ tā vastra yaoždayaṅ aṅhən ašāum ahura mazda yā nasāum ava-bəṛəta sūnō vā para-iristahe mašyehe vā.

12. āaṭ mraoṭ ahurō mazdā, yaoždayaṅ aṅhən ašāum zaraθuštra, kva aēva, yezi aṅhaṭ upaētəm vā aiwi-naptīm vā aiwi-iritīm vā aiwi-vaṅṭīm vā aētaða hē aēte mazdayasna aētā vastrā fracra kəṛəṅtən nica kanayən.

13. āaṭ yezi nōiṭ aṅhaṭ upaētəm vā aiwi-naptīm vā aiwi-iritīm vā aiwi-vaṅṭīm vā aētaða hē aēte mazdayasna aētā vastrā frasnādayəṅ maēsmana gōuš.

14. yezi aṅhaṭ izaēniš θriš frasnādayəṅ maēsmana gōuš θriš zəmə ḥaṅkanayəṅ θriš āpō frasnādayəṅ θriš māṅhō upa-baoḍayaṅ raocanəm paiti nmānahe.

15. āaṭ yezi aṅhaṭ ubdaēniš xšvaš frasnādayəṅ maēsmana gōuš xšvaš zəmə ḥaṅkanayəṅ xšvaš āpō frasnādayəṅ xšvaš māṅhō upa-baoḍayaṅ raocanəm paiti nmānahe.

16. arədvī nāma āpa spitama zaraθuštra hā mē āpō yaoždadāiti hā aršnaṅ xšudrā hā xšaθrinṅm garəwə hā xšaθrinṅm paēma.

17-22. dātarə ... ašāum kaṭ tā vastra ḥam-yūta⁴ ... acištāi aṅuhe.

23. dātarə ... ašāum kaṭ tā nara yaoždayaṅ aṅhən ašāum ahura mazda yā nasāum fraṅuharāt sūnō vā para-iristahe mašyehe vā.

24. āaṭ mraoṭ ahurō mazdā, ayaoždayaṅ aṅhən ašāum zaraθuštra, taēca narō gəṛəḍō-kəṛətāsca zəṛəḍō-kəṛətāsca taēca narō spiti-dōiθra cašmanaṭ haca nižbarəṅti tē aēšam paiti srvē aēša druxš yā nasuš upa-dvəšaiti, ayaoždya pascaēta bavaiṅti yavaēca yavaētātaēca.

25. dātarə ... ašāum kaṭ tā nara yaoždayaṅ aṅhən ašāum ahura mazda yā nasāum maṭ-gūθam āṛəm ā vā ātrəm ā vā ayaoždya frabarəṅti.

26. āaṭ mraoṭ ahurō mazdā, ayaoždayaṅ aṅhən ašāum zaraθuštra, tē sūnō maḍaxayāsca

3 = Vd. 5,27-30.

4 = Vd. 5, 57-62.

aogazdastəma bavaiṅti
yōi nasu-kərəta drvaṅtō
tē haēcaṅhō avāstrahe
aogazdastəma bavaiṅti
yōi nasu-kərəta drvaṅtō,

27. tē zəmə daēvō-dātahe
gaojanō jaiwi-vafrahe
upa-srvatō xrūtahe
aṅavatō duždāṅhahe
aogazdastəma bavaiṅti
yōi nasu-kərəta drvaṅtō,
tē aēšam paiti srvē aēša druš yā nasuš upa-dvāsaiti, ayaoždya pascaēta
bavaiṅti yavaēca yavaētātaēca.

28. dātərə ... ašāum kaṭ tā aēsma yaoždayaṅ aṅhən ašāum ahura mazda yā
nasāum ava-bərəta sūnō vā para-iristahe mašyehe vā.

29. āaṭ mraoṭ ahurō mazdā, yaoždayaṅ aṅhən ašāum zaraθuštra, kva
aēva, yezi aēša nasuš anaiwi-ṅnixta sūnō vā kərəfš-xʻarō vayō vā kərəfš-
xʻarō vītasti-drājō yaṭ hušanam frārāθni-drājō yaṭ naptanam aiṅhā zəmə
nidaiṅyaṅ kəmcit paiti caθrušanam hakərəṭ āpō vīsrascayən aθa yaoždayaṅ.

30. āaṭ yezi nasuš aiwi-ṅnixta sūnō vā kərəfš-xʻarō vayō vā kərəfš-xʻarō
frārāθni-drājō yaṭ hušanam frabāzu-drājō yaṭ naptanam aiṅhā zəmə
nidaiṅyaṅ kəmcit paiti caθrušanam hakərəṭ āpō vīsrascayən aθa yaoždayaṅ.

31. aētavaṭ hušanam aēsmanam aētavaṭ naptanam aētavaṭ xraoždvanam
aētavaṭ varōdvanam aiṅhā zəmə nidaiṅyaṅ kəmcit paiti caθrušanam hakərəṭ
āpō vīsrascayən aθa yaoždayaṅ.

32. dātərə ... ašāum kaṭ tā yavaca vāstraca yaoždayaṅ aṅhən ašāum ahura
mazda yā nasāum ava-bərəta sūnō vā para-iristahe mašyehe vā.

33. āaṭ mraoṭ ahurō mazdā, yaoždayaṅ aṅhən ašāum zaraθuštra, kva
aēva, yezi aēša nasuš anaiwi-ṅnixta sūnō vā kərəfš-xʻarō vayō vā kərəfš-
xʻarō frārāθni-drājō yaṭ hušanam frabāzu-drājō yaṭ naptanam aiṅhā zəmə
nidaiṅyaṅ kəmcit paiti caθrušanam hakərəṭ āpō vīsrascayən aθa yaoždayaṅ.

34. āaṭ yezi nasuš aiwi-ṅnixta sūnō vā kərəfš-xʻarō vayō vā kərəfš-xʻarō
frabāzu-drājō yaṭ hušanam vībāzu-drājō yaṭ naptanam aiṅhā zəmə nidaiṅyaṅ
kəmcit paiti caθrušanam hakərəṭ āpō vīsrascayən aθa yaoždayaṅ.

35. aētavaṭ hušanam yavanam aētavaṭ naptanam aētavaṭ karštanam
aētavaṭ akarštanam aētavaṭ dərətanam aētavaṭ adərətanam aētavaṭ xʻastanam
aētavaṭ axʻastanam aētavaṭ batanam aētavaṭ abatanam aētavaṭ ašanam aētavaṭ
anašanam aētavaṭ aθrəṅtam yavanam aiṅhā zəmə nidaiṅyaṅ kəmcit paiti
caθrušanam hakərəṭ āpō vīsrascayən aθa yaoždayaṅ.

36. dātarə ... ašāum yaṭ aēte yōi mazdayasna baēšazāi fravazānte katārō paurvō āmayānte mazdayasnaēibyō vā daēvayasnaēibyō vā.

37. āaṭ mraoṭ ahurō mazdā, daēvayasnaēibyō paurvō āmayayaṅta yaṭha mazdayasnaēibyasciṭ, yaṭ paoirīm daēvayasno kərəṅtāt ava hō miryāite yaṭ bitīm daēvayasno kərəṅtāt ava hō miryāite yaṭ θritīm daēvayasno kərəṅtāt ava hō miryāite anāmātō zī aēšō yavaēca yavaētātaēca.

38. māca pascaēta mazdayasna vīmāḍasciṭ vīmāḍayaṅta māca kərəṅtu mazdayasna māca kərətu irišyāt, yezi pascaēta mazdayasna vīmāḍasciṭ vīmāḍayaṅte yezi kərəṅte mazdayasna yezi kərətu irišyāt para hē irišəṅtō raēšəm cikayaṭ baodō-varštahe ciṭhaya.

39. yaṭ paoirīm daēvayasno kərəṅtāt apa hō jasāt yaṭ bitīm daēvayasno kərəṅtāt apa hō jasāt yaṭ θritīm daēvayasno kərəṅtāt apa hō jasāt āmātō zī aēšō yavaēca yavaētātaēca.

40. vasō pascaēta mazdayasna vīmāḍasciṭ vīmāḍayaṅta vasō kərəṅtu mazdayasna vasō kərətu bišazyāt.

41. āθravanəm bišazyāt dahmayāt parō āfritoiṭ nmānahe nmānō-paitīm bišazyāt nitəməm staorəm arəjō vīsō vīspaitīm bišazyāt maḍəməm staorəm arəjō zaṅtəuš zaṅtupaitīm bišazyāt aγrīm staorəm arəjō daiṅhəuš daiṅ hupaitīm bišazyāt vāšəm caθru-yuxtəm arəjō.

42. yaṭ paoirīm nmānahe nmānō-paitīm nāirikəm bišazyāt kaθwa daēnu arəjō vīsō vīspaitīm nāirikəm bišazyāt gava daēnu arəjō zaṅtəuš zaṅtupaitīm nāirikəm bišazyāt aspa daēnu arəjō daiṅhəuš daiṅhupaitīm nāirikəm bišazyāt uštra daēnu arəjō.

43. vīsō puθrəm bišazyāt aγrīm staorəm arəjō aγrīm staorəm bišazyāt maḍəməm staorəm arəjō maḍəməm staorəm bišazyāt nitəməm staorəm arəjō nitəməm staorəm bišazyāt anumaēm arəjō anumaēm bišazyāt gəuš x'arəθahe arəjō.

44. yaṭ pouru-baēšaza hanjasānte spitama zaraθuštra karətō-baēšazəsca urvarō-baēšazəsca maθrō-baēšazəsca təm iθra hanjasānte yaṭ maθrəm spəṅtəm baēšazəm, aēšō zī asti baēšazanəm baēšazyōtəmō yaṭ maθrəm spəṅtəm baēšazyō yō narš ašəonō haca uruθwəṅ bišazyāt.

45. dātarə ... ašāum cvaṅtəm drājō zrvānəm sairi mašya iriste zəmə niḍāite raocā aiwi-varəna hvarə-darəsyā zəmə bavaiṅti.

46. āaṭ mraoṭ ahurō mazdā, yārə-drājō ašāum zaraθuštra sairi mašya iriste zəmə niḍāite raocā aiwi-varəna hvarə-darəsyā zəmə bavaiṅti.

47. dātarə ... ašāum cvaṅtəm drājō zrvānəm sairi mašya iriste zəmə nikaṅte havaṭ-zəmə bavaiṅti.

48. āaṭ mraoṭ ahurō mazdā, pasca pañcāsātəm sarəḍəm spitama zaraθuštra sairi mašya iriste zəmə nikaṇte havaṭ-zəmə bavaiṇti.

49. dātarə ... ašāum cvaṇtəm drājō zrvānəm sairi mašya iriste daxme niḍāite havaṭ-zəmə bavaiṇti.

50. āaṭ mraoṭ ahurō mazdā, nōiṭ nū para ahmāt spitama zaraθuštra yaṭ aēša pašnu raēθwāt, haṣšaēša spitama zaraθuštra kəmcit aṇhəuš astvatō aētaēšva daxmaēšva vī-kaṇtəe.

51. yasca mē aētaēšəm yaṭ daxmanəm avavaṇtəm mazō vīkānayāt yaθa hē tanuš aṇhaṭ patitəm hē manō aṇhaṭ patitəm vacō patitəm šyaoθnəm uzvarštəm hē manō aṇhaṭ uzvarštəm vacō uzvarštəm šyaoθnəm.

52. nōiṭ zī ahmi paiti nairi dva mainyū rēna ava-stāṇhaṭ, fraša fraya vahištəm ā ahūm, bərəjayaṇti-šē zaraθuštra strēšca māṇhəmca hvarəca azəmca hē bərəjaēm yō daḍvā ahurō mazdā, ušta iθa tē narə yō iθyejaṇhataṭ haca aṇhaoṭ aiθyejaṇhəm ahūm ā frafrā.

53. dātarə ... ašāum kva asti daēvō kva daēvayāzō kva daēvanəm haṇdvarənō kva daēvanəm haṃ-patanō kva daēva haṇdvarəṇti pañcasyānāi sataṇnāišca sataṇnāi hazaṇraṇnāišca hazaṇraṇnāi baēvarəṇnāišca baēvarəṇnāi ahaštaynāišca.

54. āaṭ mraoṭ ahurō mazdā, aētaēšva daxmaēšva spitama zaraθuštra yōi paiti āya zəmə bavaiṇti uzdaēza uzdišta yahmya narō irista niḍayeṇte hāu asti daēvō hāu daēvayāzō hāu daēvanəm haṇdvarənō hāu daēvanəm haṃ-patanō avaṭ daēva haṇdvarəṇti pañcasyānāi sataṇnāišca sataṇnāi hazaṇraṇnāišca hazaṇraṇnāi baēvarəṇnāišca baēvarəṇnāi ahaštaynāišca.

55. maṇayən bā spitama zaraθuštra aēte yōi daēva aētaēšva daxmaēšva gaṇhəṇti apāca vaēpəṇti yaθa aētahmi aṇhvō yaṭ astvaiṇti yūžəm yōi mašyāka xʷarəθa xʷāsta huyərəš gaṃca xʷāstəm xʷaraiti nāuiti hā aēte yōi mašyāka xʷarəṇti framanyete.

56. aēšō zī asti daēvanəm rapakō vīspəm ā ahmāt yaṭ aēša gaṇtiš upaṇhacaiti.

57. aētaēšva daxmaēšva haṃ-bavaiṇti axtišca garənušca tafnušca naēzasca sārastišca aṇōstišca pourušu asti varsō.

58. aētaēšva daxmaēšva mašya haṃ mərəṇcyāstəma bavaiṇti pasca hū frāšmō-dāitīm.

59. taēca yā kasu-xratuš masyō-xraθwəm nōiṭ paitišaiti θrišum aētaēšəm axtinəm jaṇayō drəṇjaiti aoštaca paiti dumnaca θrivataca gaēsuš.

60-69. dātarə ... ašāum yaṭ ahmi nmāne yaṭ māzdayasnōiš nāirika upas-puθrīm jasāt⁵ ... apāca nava upa mayəm paiti avaθa yaoždayaṇ.

70. dātarə ... ašāum yezica hē ḥəm tafnō jasāt avi tanuye zōišnuye yezica hē dva yaska avi acištō ājasāt yasca šuđō yasca taršnō x'arāt aēša nāirika āpəm.

71. āaṭ mraoṭ ahurō mazdā, x'arāt avat hē asti masyō arəθəm yaṭ uštānəm buñjayāt para kahmāiciṭ dahmanəm dahmāhu vaēθāhu dahmaca ašavanasca, aḍa aēša nāirika zastō-maiti āpəm fraṇuharāt, āaṭ vō yūžəm yōi mazdayasna ciθəm frāθwərəsaēta aoxto ratuš aoxto sraošāvarəzō ciθəm frāθwərəsaiti.

72. kā-hē asti ciθa, āaṭ mraoṭ ahurō mazdā, aētahe paiti pəšō-tanuye duye saite upāzananəm upāzōiṭ aspahē aštraya duye saite sraošō-caranaya.

73. dātarə ... ašāum kaṭ tā tašta āṇuharəna yaoždayaṇ aṇhən ašāum ahura mazda yā nasāum ava-bərəta sūnō vā para-iristahe mašyehe vā.

74. āaṭ mraoṭ ahurō mazdā, yaoždayaṇ aṇhən ašāum zaraθuštra, kva aēva, yezi aṇhaṭ zarənaēniš hakərəṭ frasnādayən maēsmana gəuš hakərəṭ zəmə uzdāθayən hakərəṭ āpō frasnādayən aθa yaoždayaṇ.

75. āaṭ yezi aṇhaṭ ərəzataēniš biš frasnādayən maēsmana gəuš biš zəmə uzdāθayən biš āpō frasnādayən aθa yaoždayaṇ, āaṭ yezi aṇhaṭ ayaṇhaēniš θriš frasnādayən maēsmana gəuš θriš zəmə uzdāθayən θriš āpō frasnādayən aθa yaoždayaṇ, āaṭ yezi aṇhaṭ haosafinaēniš caθruš frasnādayən maēsmana gəuš caθruš zəmə uzdāθayən caθruš āpō frasnādayən aθa yaoždayaṇ, āaṭ yezi aṇhaṭ zarštvaēniš xšvaš frasnādayən maēsmana gəuš xšvaš zəmə uzdāθayən xšvaš āpō frasnādayən aθa yaoždayaṇ, āaṭ yezi aṇhaṭ zəmaēniš drvaēniš fravāxšaēniš yavaētāite ayaoždya.

76. dātarə ... ašāum kaṭ tā gəuš yaoždayaṇ aṇhən ašāum ahura mazda yā nasāum fraṇuharāt sūnō vā para-iristahe mašyehe vā.

77. āaṭ mraoṭ ahurō mazdā, yaoždayaṇ aṇhən ašāum zaraθuštra, nōiṭ payō fšuta zaoθre nōiṭ gəuš zaoθre barəsmaine paiti-baire aṇtarāt naēmāt yārə-drājō āaṭ pasca yārə-drājō vasō x'arəθā aṇhən nərəbyō ašavabyō hamaθa yaθa paraciṭ.

78. kō hō aṇhaṭ ahura mazda yō ašəm mainimnō ašəm isəmnō ašəm aparaoḍayeite ašəmca mainimnō drujimca vīnasti.

79. āaṭ mraoṭ ahurō mazdā, hō bā aṇhaṭ ašāum zaraθuštra yō ašəm mainimnō ašəm isəmnō ašəm aparaoḍayeite ašəmca mainimnō drujimca vīnasti yō nasumaitīm āpəm vīzaoθraṇ frabaraiti yō upa-naxturušu tāθraēšu vīzaoθraṇ frabaraiti.

5 Parr. 60-69 = Vd. 5, 45-54.

8.

1. āaṭ yaṭ dāuru upa-darane vā nimatō aiwi-varane vā spā vā nā vā iriṭyāt kuṭa tē vərəzyaṇ aēte yōi mazdayasna.

2. āaṭ mraoṭ ahurō mazdā, upairi daxma aēšayaṇ vī daxma caēšayaṇ, yezi aētəm iristəm upa-bərəθwōtarəm ava-zanaṇ ava aētəm iristəm barayən avaṭa nmānəm hərəzayaṇ upa aētəm nmānəm baodaṇyaṇ urvāsnaṇ vā vohugaonahe vā vohu-kərətōiš vā hadānaēpatayā vā kaṃciṭ vā hubaoiḍitəmanəm urvaranaṇ.

3. yezi aētəm nmānəm upa-bərəθwōtarəm ava-zanaṇ ava aētəm nmānəm barayən avaṭa iristəm hərəzayaṇ upa aētəm nmānəm baodaṇyaṇ urvāsnaṇ vā ... urvaranaṇ.

4. dātarə ... ašāum yaṭ ahmi nmāne yaṭ māzdayasnōiš spā vā nā vā iriṭyāt vərəṇti vā snaēžiṇti vā barəṇti vā təmaṇḥam vā aiwi-gātō ayaṇ vā varətafšō varətō-vīre jaṣəṇti kuṭa tē vərəzyaṇ aēte yōi mazdayasna.

5-7. āaṭ mraoṭ ahurō mazdā, yaṭ ahmi nmāne yaṭ māzdayasnōiš fraēštəm⁶ ... θrigāim haca nərəbyō ašavabyō.

8. aētaḍa hē aēte mazdayasna aiṇḥā zəmə ava-kanəm ava-kanayaṇ maiḍyōi paitištāne xrūždisme maiḍyōi narš varəduisme ava hē gātūm barayən ātryehe vā sairyehē vā ava hē uparāt naēmāt barayən išt̄yehē vā zaršt̄vahe vā hušō-zəmanaṇ vā pāsnūm.

9. aētaḍa hē uzbaodaṇ tanūm nidaiṭyaṇ bixšaparəm vā θrixšaparəm vā māzdrājahīm vā vīspəm ā ahmāt yaṭ frā vayō patāṇ frā urvara uxšyaṇ nyāncō apa-tacin us vātō zāṇ haēcayāt.

10. āaṭ yaṭ hiš frā vayō patāṇ frā urvara uxšyaṇ nyāncō apa-tacin us vātō zāṇ haēcayāt aētaḍa hē aēte mazdayasna ahe nmānahe upa-θwərəsaṇ upa-θwərəsayāṇ, dva dim nara isōiṭhe vīzōištāṇ vīzvārəṇtāṇ maṇna anaiwi-vastra zəməištve vā zarštve vā upa-skaṇbəm vīcicaēšva dim paiti aiṇḥā zəmə nidaiṭyaṇ yaḍōiṭ dim bāiḍištəm avazanaṇ sūnō vā kərəfš-x^varō vayō vā kərəfš-x^varō.

11. aētaḍa aēte nasukaša nišhidaēta avavaṭ haca iristaēibyō yaṭa θrigāim, āaṭ vaocāt ratuš ašava mazdayasnaēibyō, mazdayasna ḥam aēte maēsma barayən yaēibyō aēte nasukaša frasnyāṇte varəsāsca tanūmca.

12. dātarə ... ašāum cayō āaṭ aēte maēsma aṇḥən ašāum ahura mazda yaēibyō aēte nasukaša frasnyāṇte varəsāsca tanūmca pasvaṇ vā staoraṇ vā naraṇ vā nāirinaṇ vā.

13. āaṭ mraoṭ ahurō mazdā, pasvaṇ vā staoraṇ vā nōiṭ naraṇ nōiṭ nāirinaṇ paragoṭ dvaēibya yōi aṇḥən x^vaētvadaḥasca x^vaētvadaithīšca aēte maēsma maēzayaṇta yaēibyō aēte nasukaša frasnyāṇte varəsāsca tanūmca.

6 Parr. 5-7 = Vd. 5, 46-48.

14. dātarə ... ašāum yōi paθa uzbarənte spānasca irista naraēca irista kaṭ tā paθā frayaṇ pasvaṃ vā staoraṃ vā naraṃ vā nāirināṃ vā ātrəm vā ahurahe mazdā puθrəm barəsma vā ašaya frastarətəm.

15. āaṭ mraoṭ ahurō mazdā, nōiṭ tā paθā frayaṇ pasvaṃ nōiṭ staoraṃ nōiṭ naraṃ nōiṭ nāirināṃ nōiṭ ātrəm ahurahe mazdā puθrəm nōiṭ barəsma ašaya frastarətəm.

16. spānəm zairitəm caθru-cašməm spaētəm zairi-gaošəm āθritīm taða aētā paθā vivādayaṇtu, aiwi-niticiṭ spitama zaraθuštra spānəm zairitəm caθru-cašməm spaētəm zairi-gaošəm aēša druxš yā nasuš apa-dvąsaiti apāxədraēibyō naēmaēibyō.

17. yezi nōiṭ upa vī spitama zaraθuštra spānəm zairitəm caθru-cašməm nōiṭ spaētəm zairi-gaošəm xšvažayaciṭ taða aētā paθā vivādayaṇtu, aiwi-niticiṭ spitama zaraθuštra spānəm zairitəm caθru-cašməm spaētəm zairi-gaošəm aēša druxš yā nasuš apa-dvąsaiti apāxədraēibyō naēmaēibyō.

18. yezi nōiṭ upa-vī spitama zaraθuštra spānəm zairitəm caθru-cašməm nōiṭ spaētəm zairi-gaošəm nāumayāciṭ taða aētā paθā vivādayaṇtu, aiwi-niticiṭ spitama zaraθuštra spānəm zairitəm caθru-cašməm spaētəm zairi-gaošəm aēša druxš yā nasuš apa-dvąsaiti apāxədraēibyō naēmaēibyō.

19. yezi nōiṭ ... zairi-gaošəm āθrava paoirīm aētā paθā frayaṇtu vārəθraṇiṣ vacō framrū, yaθā ahū vairyō ... vāstārəm.

20. kōm-nā mazdā ... frāvaocā, kō vərəθrəm jā ... kahmāiciṭ.

21. pāta-nō ṭbišyaṇtaṭ pairi mazdāasca ārmaitišca spəṇtasca, nase daēvī druxš nase daēvō-ciθre nase daēvō-frakaršte nase daēvō-fradāiti apa druxš nase apa druxš dvāra apa druxš vīnase apāxədre apa-nasyehe māmərəṇcainiš gaēθā astvaitiš ašahe.

22. vasō pascaēta mazdayasna aētā paθā frayaṇ pasvaṃ vā staoraṃ vā naraṃ vā nāirināṃ vā ātrəm vā ahurahe mazdā puθrəm barəsma vā ašaya frastarətəm, vasō pascaēta mazdayasna ahe nmānahe myazdəm daiṭyārəš gaoməṇtəm maḍumaṇtəm yaoždayaṇ anāstərətəm hamaθa yaθa paraciṭ.

23. dātarə ... ašāum yō vastrəm upaṇharəzaiti upairi aētəm iristəm ubdaēnəm vā īzaēnəm vā avavaṭ aipi yaθa narš aoθravana kā hē asti ciθa, āaṭ mraoṭ ahurō mazdā, caθwārō sata upāzananāṃ upāzōiṭ aspahē aštraya caθwārō sata sraošō-caranaya.

24. dātarə ... ašāum yō vastrəm upaṇharəzaiti upairi aētəm iristəm ubdaēnəm vā īzaēnəm vā avavaṭ aipi yaθa karanəm vayō-gravanəm kā hē asti ciθa, āaṭ mraoṭ ahurō mazdā, xšvaš sata upāzananāṃ upāzōiṭ aspahē aštraya xšvaš sata sraošō-caranaya.

25. dātarə ... ašāum yō vastrəm upaṅharəzaiti upairi aētəm iristəm ubdaēnəm vā īzaēnəm vā avavaṭ aipi yaθa ōyum vīrō-vastrəm kā hē asti ciθa, āaṭ mraoṭ ahurō mazdā, hazarṅrəm upāzananəm upāzōiṭ aspahe aštraya hazarṅrəm sraoṣṭō-caranaya.

26. dātarə ... ašāum yaṭ anusō vifyeiti vifyeitica kā hē asti ciθa, āaṭ mraoṭ ahurō mazdā, ašta sata upāzananəm upāzōiṭ aspahe aštraya ašta sata sraoṣṭō-caranaya.

27. dātarə ... ašāum yaṭ usō vifyeiti vifyeitica kā hē asti ciθa kā hē asti āpərətiš kaṭ hē asti yaoždāθrəm, āaṭ mraoṭ ahurō mazdā, nava hē asti ciθa nava hē asti āpərətiš nōiṭ hē asti yaoždāθrəm anāpərəθa haca šyaoθna yavaēca yavaētātaēca.

28-30. kva aēva⁷ ... pərənāyuš ciθam θwərəsaiti.

31. dātarə ... ašāum kō asti daēvō kō daēvayāzō kō daēvanəm xawzō kō daēvanəm xumbō kō daēvanəm kū-nāiriš kō havṣ daēvō kō vīspō daēvō kō para mərətō daēvō kō pasca mərətō mainyava daēva frabavaiṇti.

32. āaṭ mraoṭ ahurō mazdā, aršaca vīptō aršaca vaēpayō spitama zaraθuštra hāu asti daēvō hāu daēvayāzō hāu daēvanəm xawzō hāu daēvanəm xumbō hāu daēvanəm kū-nāiriš hāu havṣ daēvō hāu vīspō daēvō hō para mərətō daēvō hō pasca mərətō mainyava daēva frabavaiṇti yaṭ mašyō mašim xšudrā avi fraṅhərəzaiti yaṭ vā mašyō mašyānəm xšudranəm para-gaurvayeiti.

33. dātarə ... ašāum kaṭ tā nara yaoždayan aṅhən ašāum ahura mazda yā nasāum ava-hištāt hišunəm tarō yārə mərətanəm.

34. āaṭ mraoṭ ahurō mazdā, yaoždayan aṅhən ašāum zaraθuštra, nōiṭ hušō hišvai sraēšyeiti, yezi hušō hišvai sraēšyeiṇtīm aṅhāt išarəštāitya mē vīspō aṅhuš astvā išasəm jiṭ-ašəm xraodaṭ-urva pəšō-tanuš frēna aṅhəm nasunəm yā paiti āya zəmə iririθarə.

35. dātarə ... ašāum kaṭ tā nara yaoždayan aṅhən ašāum ahura mazda yā nasāum ava-bərəta sūnō vā para-iristahe mašyehe vā.

36. āaṭ mraoṭ ahurō mazdā, yaoždayan aṅhən ašāum zaraθuštra, kva aēva, yezi aēša nasuš aiwi-ṅnixta sūnō vā kərəfš-x^varō vayō vā kərəfš-x^varō āaṭ hvam tanūm pairi-yaoždaiθita gōuš maēsmana apāca paiti avaθa yaoždayan.

37. āaṭ yezi nasuš anaiwi-ṅnixta sūnō vā kərəfš-x^varō vayō vā kərəfš-x^varō paoirīm taða dim mazdayasna aiṅhā zəmə θriš maṅəm ava-kanayən āaṭ

7 = Vd. 3, 40-42.

hvąm tanūm pairi-yaoždaiθīta gēuš maēsmana nōiṭ āpō, frā-mē gadwa zazayaṇ nižbērēta nōiṭ ainizbērēta nižbērētāt haca paourvaēibya.

38. bitīm tađa dim mazdayasna aiṅhā zēmō θriš maγəm ava-kanayən āaṭ hvąm tanūm pairi-yaoždaiθīta gēuš maēsmana nōiṭ āpō, frā-mē gadwa zazayaṇ nižbērēta nōiṭ ainizbērēta nižbērētāt haca paourvaēibya, vīspəm ā ahmāt upa-maṇayən yaṭ hē upəməm paiti vaγdanahe upēmāt varsa hiku bavāt.

39. θritīm tađa dim mazdayasna aiṅhā zēmō θriš maγəm ava-kanayən avavaṭ haca paourvaēibya yaθa θrigāim, āaṭ hvąm tanūm pairi-yaoždaiθīta āpō nōiṭ maēsmana.

40. zasta hē paoirīm frasnādayən, āaṭ yaṭ hē zasta nōiṭ frasnāta āaṭ vīspəm hvąm tanūm ayaoždāta kərēnaoiti, āaṭ yaṭ hē zasta frasnāta āθritīm pasca frasnātaēibya zastaēibya barəšnūm hē vaγdanəm pourum paiti-hiṇcōiš.

41. dātarə ... ašāum yezica āpō vaṅuhīš barəšnūm vaγdanəm pourum paiti-jasaiti kva aēšam aēša druxš yā nasuš upa-dvąsaiti, āaṭ mraoṭ ahurō mazdā, paitiša hē hō-nā aṅtarāt naēmāt brvaṭ-byam aēšam aēša druxš yā nasuš upa-dvąsaiti.

42. dātarə ... yezica āpō vaṅuhīš paitiša hē hō-nā aṅtarāt naēmāt brvaṭ-byam paiti-jasaiti kva aēšam aēša druxš yā nasuš upa-dvąsaiti, āaṭ mraoṭ ahurō mazdā, pasca hē vaγdanəm aēšam aēša druxš yā nasuš upa-dvąsaiti.

43. dātarə ... yezica āpō vaṅuhīš pasca vaγdanəm paiti-jasaiti kva aēšam aēša druxš yā nasuš upa-dvąsaiti, āaṭ mraoṭ ahurō mazdā, paitiša hē paitiš-x'arənəm aēšam aēša druxš yā nasuš upa-dvąsaiti.

44. dātarə ... yezica āpō vaṅuhīš paitiša paitiš-x'arənəm paiti-jasaiti kva aēšam aēša druxš yā nasuš upa-dvąsaiti, āaṭ mraoṭ ahurō mazdā, dašīnəm hē gaošəm aēšam aēša druxš yā nasuš upa-dvąsaiti.

45. dātarə ... yezica āpō vaṅuhīš dašīnəm gaošəm paiti-jasaiti kva aēšam aēša druxš yā nasuš upa-dvąsaiti, āaṭ mraoṭ ahurō mazdā, hōyum hē gaošəm aēšam aēša druxš yā nasuš upa-dvąsaiti.

46. dātarə ... yezica āpō vaṅuhīš hōyum gaošəm paiti-jasaiti kva aēšam aēša druxš yā nasuš upa-dvąsaiti, āaṭ mraoṭ ahurō mazdā, dašīnəm hē suptīm aēšam aēša druxš yā nasuš upa-dvąsaiti.

47. dātarə ... yezica āpō vaṅuhīš dašīnəm suptīm paiti-jasaiti kva aēšam aēša druxš yā nasuš upa-dvąsaiti, āaṭ mraoṭ ahurō mazdā, haoyam hē suptīm aēšam aēša druxš yā nasuš upa-dvąsaiti.

48. dātarə ... yezica āpō vaṅuhīš haoyam suptīm paiti-jasaiti kva aēšam aēša druxš yā nasuš upa-dvąsaiti, āaṭ mraoṭ ahurō mazdā, dašīnəm hē kašəm aēšam aēša druxš yā nasuš upa-dvąsaiti.

49. dātarə ... yezica āpō vaṇuhīš dašīnəm kašəm paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, hōyūm hē kašəm aēšəm aēša druxš yā nasuš upa-dvəšaiti.

50. dātarə ... yezica āpō vaṇuhīš hōyūm kašəm paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, paitiša hē paitivarəm aēšəm aēša druxš yā nasuš upa-dvəšaiti.

51. dātarə ... yezica āpō vaṇuhīš paitiša paitivarəm paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, paršti hē aēšəm aēša druxš yā nasuš upa-dvəšaiti.

52. dātarə ... yezica āpō vaṇuhīš paršti paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, dašīnəm hē fīstānəm aēšəm aēša druxš yā nasuš upa-dvəšaiti.

53. dātarə ... yezica āpō vaṇuhīš dašīnəm fīstānəm paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, hōyūm hē fīstānəm aēšəm aēša druxš yā nasuš upa-dvəšaiti.

54. dātarə ... yezica āpō vaṇuhīš hōyūm fīstānəm paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, dašīnəm hē pərəsāum aēšəm aēša druxš yā nasuš upa-dvəšaiti.

55. dātarə ... yezica āpō vaṇuhīš dašīnəm pərəsāum paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, hōyūm hē pərəsāum aēšəm aēša druxš yā nasuš upa-dvəšaiti.

56. dātarə ... yezica āpō vaṇuhīš hōyūm pərəsāum paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, dašīnəm hē sraonīm aēšəm aēša druxš yā nasuš upa-dvəšaiti.

57. dātarə ... yezica āpō vaṇuhīš dašīnəm sraonīm paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, haoyəm hē sraonīm aēšəm aēša druxš yā nasuš upa-dvəšaiti.

58. dātarə ... yezica āpō vaṇuhīš haoyəm sraonīm paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, haxti hē aēšəm aēša druxš yā nasuš upa-dvəšaiti, yezi nairyō aṇhaṭ pasca hē pourum paiti-hiṇcōiš paitiša aparəm yezi strī aṇhaṭ paitiša hē pourum paiti-hiṇcōiš pasca aparəm.

59. dātarə ... yezica āpō vaṇuhīš haxti paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, dašīnəm hē rānəm aēšəm aēša druxš yā nasuš upa-dvəšaiti.

60. dātarə ... yezica āpō vaṇuhīš dašīnəm rānəm paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, hōyūm hē rānəm aēšəm aēša druxš yā nasuš upa-dvəšaiti.

61. dātarə ... yezica āpō vaṇuhīš hōyūm rānəm paiti-jasaiti kva aēšāṃ aēša druṣš yā nasuš upa-dvāšaiti, āaṭ mraoṭ ahurō mazdā, dašīnəm hē žnūm aēšāṃ aēša druṣš yā nasuš upa-dvāšaiti.

62. dātarə ... yezica āpō vaṇuhīš dašīnəm žnūm paiti-jasaiti kva aēšāṃ aēša druṣš yā nasuš upa-dvāšaiti, āaṭ mraoṭ ahurō mazdā, hōyūm hē žnūm aēšāṃ aēša druṣš yā nasuš upa-dvāšaiti.

63. dātarə ... yezica āpō vaṇuhīš hōyūm žnūm paiti-jasaiti kva aēšāṃ aēša druṣš yā nasuš upa-dvāšaiti, āaṭ mraoṭ ahurō mazdā, dašīnəm hē ascūm aēšāṃ aēša druṣš yā nasuš upa-dvāšaiti.

64. dātarə ... yezica āpō vaṇuhīš dašīnəm ascūm paiti-jasaiti kva aēšāṃ aēša druṣš yā nasuš upa-dvāšaiti, āaṭ mraoṭ ahurō mazdā, hōyūm hē ascūm aēšāṃ aēša druṣš yā nasuš upa-dvāšaiti.

65. dātarə ... yezica āpō vaṇuhīš hōyūm ascūm paiti-jasaiti kva aēšāṃ aēša druṣš yā nasuš upa-dvāšaiti, āaṭ mraoṭ ahurō mazdā, dašīnəm hē zaṅgəm aēšāṃ aēša druṣš yā nasuš upa-dvāšaiti.

66. dātarə ... yezica āpō vaṇuhīš dašīnəm zaṅgəm paiti-jasaiti kva aēšāṃ aēša druṣš yā nasuš upa-dvāšaiti, āaṭ mraoṭ ahurō mazdā, hōyūm hē zaṅgəm aēšāṃ aēša druṣš yā nasuš upa-dvāšaiti.

67. dātarə ... yezica āpō vaṇuhīš hōyūm zaṅgəm paiti-jasaiti kva aēšāṃ aēša druṣš yā nasuš upa-dvāšaiti, āaṭ mraoṭ ahurō mazdā, dašīnəm hē frabdəm aēšāṃ aēša druṣš yā nasuš upa-dvāšaiti.

68. dātarə ... yezica āpō vaṇuhīš dašīnəm frabdəm paiti-jasaiti kva aēšāṃ aēša druṣš yā nasuš upa-dvāšaiti, āaṭ mraoṭ ahurō mazdā, hōyūm hē frabdəm aēšāṃ aēša druṣš yā nasuš upa-dvāšaiti.

69. dātarə ... yezica āpō vaṇuhīš hōyūm frabdəm paiti-jasaiti kva aēšāṃ aēša druṣš yā nasuš upa-dvāšaiti, āaṭ mraoṭ ahurō mazdā, adairi haxəm nivōiryete maṇayən ahe yaṭha maxšyā parənəm.

70. hakaṭ nigərəptaēibya aṅuštaēibya uzgərəptaēibya pāšnaēibya dašīnəm hē haxəm paiti-hiṅcōiš āaṭ hā druṣš yā nasuš hōyūm haxəm upa-dvāšaiti, hōyūm hē haxəm paiti-hiṅcōiš āaṭ hā druṣš yā nasuš adairi aṅušta nivōiryete maṇayən ahe yaṭha maxšyā parənəm.

71. hakaṭ nigərəptaēibya pāšnaēibya uzgərəptaēibya aṅuštaēibya dašīnaṃ hē aṅuštaṃ paiti-hiṅcōiš, āaṭ hā druṣš yā nasuš haoyaṃ aṅuštaṃ upa-dvāšaiti, haoyaṃ hē aṅuštaṃ paiti-hiṅcōiš 72. āaṭ hā druṣš yā nasuš nivōiryete....

73. dātarə ... ašāum yaṭ aēte yōi mazdayasna pāḍa ayaṅtəm vā taciṅtəm vā barəmnəm vā vazəmnəm vā ātrəm nasupākəm frajasān nasūm ḥaṃ-pacān nasūm hāvayaṃ kuṭha tē vərəzyaṃ aēte yōi mazdayasna.

74. āaṭ mraoṭ ahurō mazdā, ava aētəm nasupākəm janaēta ava hē janayən apa aētəm dištəm barayən apa aētəm uzdānəm barayən.

75. āθraṭ haca bānuwe aēsmaṭ frasaocayāhi yaṭ vā aētaṅḥəm urvaranəm yaṭ ātrə-ciθranəm yaṭ vā aētəm ātrəm uzdarəza aētayā urvarayā ātarəcarəš vīca barōiṭ vīca šāvayōiṭ yaθa āsištəm frāvayōiṭ.

76. yaθa taða paoirīm haṅdarəza zəmə aētaṭ paiti nidaiθīta avavaṭ haca āθraṭ nasupakāt yaθa fratarə-vītastiš vīca barōiṭ vīca šāvayōiṭ yaθa āsištəm frāvayōiṭ.

77. yaθa taða bitīm haṅdarəza ... yaθa taða θritīm haṅdarəza ... yaθa taða tūirīm haṅdarəza ... yaθa taða puxdəm haṅdarəza ... yaθa taða xštīm haṅdarəza ... yaθa taða haptaθəm haṅdarəza ... yaθa taða aštəməm haṅdarəza....

78. yaθa taða nāuməm haṅdarəza zəmə aētaṭ paiti nidaiθīta avavaṭ haca āθraṭ nasupakāt yaθa fratarə-vītastiš,

79. yō aēsno ašaya baraṭ spitama zaraθuštra urvāsnayā vā vohu-gaonahe vā vohu-kərətōiš vā hadānaēpatayā vā kəmciṭ vā hubaoiθitəmanəm urvaranəm

80. yahmāt kahmāiciṭ naēmanəm vātō āθrō baoiθīm vībaraiti ahmāt kahmāiciṭ naēmanəm hazaṅraṅna paiti-jasaiti ātarš mazdā ahurahe daēvanəm mainyavanəm təmasciθranəm drvatəm bižvaṭ yātunəmca pairikanəmca.

81. dātarə ... ašāum yō ātrəm nasupākəm dāitīm gātūm avi ava-baraiti cvaṭ ahmāi naire miždəm aṅḥaṭ pasca astasca baodaṅhasca vī-urvīštīm, āaṭ mraoṭ ahurō mazdā, yaθa aētahmi aṅhvō yaṭ astvaiṅti baēvarə ātrə-saokanəm dāitīm gātūm avi ava-baraiti.

82. dātarə ... yō ātrəm uruzdipākəm ... cvaṭ ahmāi naire miždəm aṅḥaṭ pasca astasca baodaṅhasca vī-urvīštīm, āaṭ mraoṭ ahurō mazdā, yaθa aētahmi aṅhvō yaṭ astvaiṅti hazaṅrəm ātrə-saokanəm dāitīm gātūm avi ava-baraiti.

83. ... yō ātrəm saire-hyaṭ haca ... yaθa aētahmi aṅhvō yaṭ astvaiṅti paṅca sata ātrə-saokanəm....

84. ... yō ātrəm xumbaṭ haca zəmaini-pacikāt ... caθwārō sata ātrə-saokanəm dāitīm gātūm....

85. ... yō ātrəm xumbaṭ haca yāmō-pacikāt ... āaṭ mraoṭ ahurō mazdā, yavaṭ ahmāi yamanəm paitinəm sairinəm aētavaṭ ātrə-saokanəm ḥəm-bərəta dāitīm gātūm avi ava-baraiti.

86. ... yō ātrəm aonyaṭ haca parō-bərəjyāt ... āaṭ mraoṭ ahurō mazdā, yavaṭ ahmāi paitinəm urvaranəm aētavaṭ ātrə-saokanəm ḥəm-bərəta dāitīm gātūm avi ava-baraiti.

87. ... yō ātrəm pisraṭ haca zaranyō-saēpāt ... satəm ātrə-saokanəm....

88. ... yō ātrēm pisraṭ haca ərəzatō-saēpāt ... navaitīm ātrə-saokanəm....

89. ... yō ātrēm pisraṭ haca ayō-saēpāt ... aštāitīm ātrə-saokanəm....

90. ... yō ātrēm pisraṭ haca haosafnaēnō-saēpāt ... haptāitīm ātrə-saokanəm....

91-94. ... yō ātrēm tanuraṭ haca ... xšvaštīm ātrə-saokanəm.... ... yō ātrēm dištaṭ haca ... pañcāsātəm ātrə-saokanəm.... ... yō ātrēm aonyaṭ haca taxairyāt ... caθwarəsātəm ātrə-saokanəm.... ... yō ātrēm paṇtaṭ haca staorō-payāt ... θrisatəm ātrə-saokanəm....

95-96. ... yō ātrēm skairyāṭ haca ... vīsaiti ātrə-saokanəm.... ... yō ātrēm nazdištaṭ haca ... āaṭ mraoṭ ahurō mazdā, yaθa aētahmi aṇhvō yaṭ astvaiṇti dasa ātrə-saokanəm dāitīm gātūm avi ava-baraiti.

97. dātarə ... ašāum kaṭ tā nara yaoždayaṇ aṇhən ašāum ahura mazda yā nasāum ava-hišta dūire asahi razanḡham.

98. āaṭ mraoṭ ahurō mazdā, yaoždayaṇ aṇhən ašāum zaraθuštra, kva aēva, yezi aēša nasuš aiwi-ḡnixta sūnō vā kərəfš-xʷarō vayō vā kərəfš-xʷarō āaṭ hvam tanūm pairi-yaoždaiθīta gōuš maēsmana θrisataθwəm frasnātēe θrisataθwəm upa-snātēe aḡryam paiti usnāitīm.

99. āaṭ yezi nasuš anaiwi-ḡnixta sūnō vā kərəfš-xʷarō vayō vā kərəfš-xʷarō pañca-dasa frasnātēe pañca-dasa upasnātēe.

100. tacaṭ paoirīm hāθrəm fraša adāṭ tacōiṭ yaṭ dim kasciṭ aṇhōuš astvatō aētaða paiti ava-hištēe bərəzyaogəṭ vacō rāzayaṇ, ida iristahe tanūm ava-hišta anaēšəm manō anaēšəm vacō anaēšəm šyaoθnəm isaēta mē yaoždāitīm, tacaṭ paoirīm upāiti yezi dim nōiṭ yaoždaθəṇte θrišūm aētahe šyaoθnahe baxšəṇti.

101. tacaṭ bitīm hāθrəm ... bitīm upāiti, yezi dim nōiṭ yaoždaθəṇte naēməm aētahe šyaoθnahe baxšəṇti.

102. tacaṭ θritīm hāθrəm ... θritīm upāiti, yezi dim nōiṭ yaoždaθəṇte vīspəm aētahe šyaoθnahe baxšəṇti.

103. fraša adāṭ tacōiṭ yaṭ dim nazdištəm avi nmānəmca vīsəmca zaṇtūmca dahyūmca aētaða paiti ava-hištēe bərəzyaogəṭ vacō rāzayaṇ, ida iristahe tanūm ava-hišta anaēšəm manō anaēšəm vacō anaēšəm šyaoθnəm isaēta mē yaoždāitīm, yezi dim nōiṭ yaoždaθəṇte āaṭ hvam tanūm pairi-yaoždaiθīta gōuš maēsmana apāca paiti avaθa yaoždayaṇ.

104. dātarə ... āaṭ yezi aṇhaṭ āfš aṇtarāṭ naēmāṭ aēte paθa āfš ciθam fraorisaiti kā hē asti ciθa.

105. āaṭ mraoṭ ahurō mazdā, caθwārō sata upāzananəm upāzōiṭ aspahe aštraya caθwārō sata sraošō-caranaya.

106. dātārē ... āaṭ yezi aṇḥaṭ urvara aṇṭarāt naēmāt aēte paṭa ātarš ciṭaṃ fraorisaiti kā hē asti ciṭa.

107. āaṭ mraoṭ ahurō mazdā, caṭwārō ... sraoṣō-caranaya, hā hē asti ciṭa hā hē asti āpərətiš aipi-pārəmnāi ida aṣaone nōiṭ anaipi-pārəmnāi drujō nmāne haiṭyā aṇḥən astayō.

aṣəm vohū....

9.

1. pərəsaṭ zaraṭuštrō ahurəm mazdāṃ, ahura mazda mainyō spōništa dātārē gaēṭanāṃ astvaitināṃ aṣāum kuṭa aētaḍa aṇḥava astvaiṇti mašyāka ḥam-vaēnāṇte tē yōi ḥam-nasūm paiti-iristəm tanūm yaoždaiṭyāṇ.

2. āaṭ mraoṭ ahurō mazdā, narəm aṣavanəm spitama zaraṭuštra yō aṇḥaṭ vacō arš-vacō maṭrəm pərəsō aṣava yō fraēštəm apivatāite daēnayā māzdayasnoiš yaoždāṭryāt haca, hō pərəṭwe aiṇḥā zəmō upa-ṭwaršti urvaranāṃ nava vī-bāzva drājō kəmcit paiti caṭruṣanāṃ

3-5. yaṭ aṇḥaṭ aiṇḥā zəmō vī-āpō-təməmca vī-urvarō-təməmca ... ṭrigāim haca nərəbyō aṣavabyō.

6. paoirīm upa maṣəm niṭwərəsōiš pasca ḥamō aiwi-gaitīm dva ərəzu nismahe pasca zəmō isaoš aiwi-gaitīm yaṭa caṭwārō ərəzvō.

7. bitīm upa maṣəm ... ṭritīm upa maṣəm ... tūirīm upa maṣəm ... puxḍəm ... xštūm....

8. cvaṭ haca anyō-anyāēibyō, yaṭa aēvō-gāim, kaṭa aēvō-gāim, yaṭa ṭripaḍəm.

9. ṭrāyō anya maṣa niṭwərəsōiš pasca ḥamō aiwi-gaitīm dva ərəzu nismahe pasca zəmō isaoš aiwi-gaitīm yaṭa caṭwārō ərəzvō, cvaṭ haca paourvaēibya, yaṭa ṭrigāim, kaṭa ṭrigāim, yaṭa gāṃṇ ḥaṇṇayata, kaṭa gāṃṇ ḥaṇṇayata, yaṭa nava-paḍəm.

10. karšasciṭ frakārayōiš tiṣra xšaṭra vairyō, cvaṭ haca maṣaēibya, yaṭa ṭrigāim, kaṭa ṭrigāim, yaṭa gāṃṇ ḥaṇṇayata, kaṭa gāṃṇ ḥaṇṇayata, yaṭa nava-paḍəm.

11. āaṭ pasca dva-dasa karša frakārayōiš ṭrāyō yim aṇṭarē vīta aṇṭarē ṭrāyō maṣa frakārayōiš ṭrāyō yim aṇṭarē vīta aṇṭarē xšvaš maṣa frakārayōiš ṭrāyō yim aṇṭarē vīta aṇṭarē nava maṣa frakārayōiš ṭrāyō aṇṭarəca avāṇṭarē pārəṇṭarē maṣa frakārayōiš ṭrāyō upa nava-paḍəm asānō āiti maṣa āiti barōiš safəm vā dādrum vā zəm-varətəm vā kəmcit vā xrūždismanāṃ.

12. pascaēta ava tā āiti maṣa āiti jasōiṭ aēša yā paiti-irista, āaṭ tūm zaraṭuštra ava-hištōiš ava ništərəm karšayā aṭa imā vacō drəṇjayōiš,

nəmascā yā ārmaitiš ižācā, paiti-šē ādayōiṭ aēša yā paiti-irista, nəmascā yā ārmaitiš ižācā.

13. āaṭ hā druxš avāstryeite kaṃciṭ vā vacaṇḥaṃ snaθāi aṇrahe manyōuš drvatō snaθāi aēšmahe xrvīm-draoš snaθāi māzainyanḥm daēvanḥm snaθāi višpanḥm daēvanḥm.

14. gaomaēzəm pascaēta upaṇhərəzəm ayaṇhaēnəm vā srum vā, yezi srum paiti-hiṇcāi graom ayasōiš zaraθuštra nava-pixəm ādrəṇjayōiš aom srum paura-naēmāṭ ahe gravahe.

15. zasta hē paoirīm frasnādayən, āaṭ yaṭ hē zasta nōiṭ frasnāta āaṭ višpaḥm hvāṃ tanūm ayaoždāta kərənaoiti, āaṭ yaṭ hē zasta frasnāta ābriṭīm pasca frasnātaēibya zastaēibya baršnūm hē vaγdanəm paourum paiti-hiṇcōiš āaṭ hā druxš yā nasuš paitiša hē hō-nā aṇtarāṭ naēmāṭ brvaṭ-byaṃ upa-dvāšaiti.

16. paitiša hē hō-nā aṇtarāṭ naēmāṭ brvaṭ-byaṃ paiti-hiṇcōiš āaṭ hā druxš yā nasuš pasca vaγdanəm upa-dvāšaiti, pasca hē vaγdanəm paiti-hiṇcōiš āaṭ hā druxš yā nasuš paitiša paitišx'arənəm upa-dvāšaiti, paitiša hē paitiš-x'arənəm paiti-hiṇcōiš āaṭ hā druxš yā nasuš dašinəm gaošəm upa-dvāšaiti.

17. dašinəm hē gaošəm paiti-hiṇcōiš āaṭ hā druxš yā nasuš hōyum gaošəm upa-dvāšaiti, hōyum hē gaošəm paiti-hiṇcōiš āaṭ hā druxš yā nasuš dašinəm suptīm upa-dvāšaiti, dašinəm hē suptīm paiti-hiṇcōiš āaṭ hā druxš yā nasuš haoyāṃ suptīm upa-dvāšaiti, haoyāṃ hē suptīm paiti-hiṇcōiš āaṭ hā druxš yā nasuš dašinəm kašəm upa-dvāšaiti.

18. dašinəm hē kašəm paiti-hiṇcōiš āaṭ hā druxš yā nasuš hōyum kašəm upa-dvāšaiti, hōyum hē kašəm paiti-hiṇcōiš āaṭ hā druxš yā nasuš paitiša paitivarəm upa-dvāšaiti, paitiša hē paitivarəm paiti-hiṇcōiš āaṭ hā druxš yā nasuš paršti upa-dvāšaiti.

19. paršti hē paiti-hiṇcōiš āaṭ hā druxš yā nasuš dašinəm fštānəm upa-dvāšaiti, dašinəm hē fštānəm paiti-hiṇcōiš āaṭ hā druxš yā nasuš hōyum fštānəm upa-dvāšaiti, hōyum hē fštānəm paiti-hiṇcōiš āaṭ hā druxš yā nasuš dašinəm pərəsāum upa-dvāšaiti.

20. dašinəm hē pərəsāum paiti-hiṇcōiš āaṭ hā druxš yā nasuš hōyum pərəsāum upa-dvāšaiti, hōyum hē pərəsāum paiti-hiṇcōiš āaṭ hā druxš yā nasuš dašinəm sraonīm upa-dvāšaiti, dašinəm hē sraonīm paiti-hiṇcōiš āaṭ hā druxš yā nasuš haoyāṃ sraonīm upa-dvāšaiti.

21. haoyāṃ hē sraonīm paiti-hiṇcōiš āaṭ hā druxš yā nasuš haxti upa-dvāšaiti, haxti hē paiti-hiṇcōiš yezi nairyō aṇhaṭ pasca hē pourum paiti-hiṇcōiš paitiša aparəm yezi strī aṇhaṭ paitiša hē pourum paiti-hiṇcōiš pasca aparəm āaṭ hā druxš yā nasuš dašinəm rānəm upa-dvāšaiti.

22. dašinəm hē rānəm paiti-hiṇcōiš āaṭ hā druxš yā nasuš hōyum rānəm upa-dvāšaiti, hōyum hē rānəm paiti-hiṇcōiš āaṭ hā druxš yā nasuš dašinəm

žnūm upa-dvāšaiti, dašīnəm hē žnūm paiti-hiņcōiš āaṭ hā druxš yā nasuš hōyūm žnūm upa-dvāšaiti.

23. hōyūm hē žnūm paiti-hiņcōiš āaṭ hā druxš yā nasuš dašīnəm ascūm upa-dvāšaiti, dašīnəm hē ascūm paiti-hiņcōiš āaṭ hā druxš yā nasuš hōyūm ascūm upa-dvāšaiti, hōyūm hē ascūm paiti-hiņcōiš āaṭ hā druxš yā nasuš dašīnəm zaņgəm upa-dvāšaiti, dašīnəm hē zaņgəm paiti-hiņcōiš āaṭ hā druxš yā nasuš hōyūm zaņgəm upa-dvāšaiti.

24. hōyūm hē zaņgəm paiti-hiņcōiš āaṭ hā druxš yā nasuš dašīnəm frabdəm upa-dvāšaiti, dašīnəm hē frabdəm paiti-hiņcōiš āaṭ hā druxš yā nasuš hōyūm frabdəm upa-dvāšaiti, hōyūm hē frabdəm paiti-hiņcōiš āaṭ hā druxš yā nasuš aḍairi haxəm nivōiryete maņayən ahe yaṭa maxšyā parənəm.

25. hakaṭ nigərəptaēibya aņguštaēibya uzgərəptaēibya pāšnaēibya dašīnəm hē haxəm paiti-hiņcōiš āaṭ hā druxš yā nasuš hōyūm haxəm upa-dvāšaiti, hōyūm hē haxəm paiti-hiņcōiš āaṭ hā druxš yā nasuš aḍairi aņgušta nivōiryete maņayən ahe yaṭa maxšyā parənəm.

26. hakaṭ nigərəptaēibya pāšnaēibya uzgərəptaēibya aņguštaēibya dašīnəm hē aņguštəm paiti-hiņcōiš āaṭ hā druxš yā nasuš haoyəm aņguštəm upa-dvāšaiti, haoyəm hē aņguštəm paiti-hiņcōiš āaṭ hā druxš yā nasuš nivōiryete apāxədraēibyō naēmaēibyō maxši kəhrpa ərəyāitya frašnaoš apa-zadaṅhō akarənəm driwyā yaṭa zōiždištāiš xrafstrāiš.

27. aṭa imā vacō drəņjayōiš yōi aṅhən varəṭraṅnyōtəməmca baēšazyōtəməmca,

yaṭā ahū vairyō aṭā ratuš ... māmərəncainiš gaēṭā astvaitiš ašahe.

28. paoirīm upa maṅəm frā-nasuš narəm bavaiti aṭa imā vacō drəņjayōiš ... bitīm ... θritīm ... tūirīm ... puxdəm ... xštūm....

29. pascaēta ava tā nišhiḍōiṭ aēša yā paiti-irista aṅtarə arədəm maṅahe pārəntarə haca anyaēibyō maṅaēibyō avavaṭ taḍa yaṭa caṭwārō ərəzavō aētaēšamca zəmō pərəṭu-fravāiš fraḍavata.

30. paņca-dasa zəmō haņkanayən vīspəm ā ahmāt upa-maņayən yaṭ hē upəməm paiti vaṅḍanahe upəmāt varsa hiku bavāt.

31. yaṭ hē tanuš hišvi hiṅnvi pašnu bavāt pascaēta ava tā anya maṅa āiti jasōiṭ aēša yā paiti-irista, paoirīm upa maṅəm hakərət āpō āaṭ hvəm tanūm pairi-yaoždaiṭita bitīm upa maṅəm bižvaṭ āpō āaṭ hvəm tanūm pairi-yaoždaiṭita θritīm upa maṅəm θrižvaṭ āpō āaṭ hvəm tanūm pairi-yaoždaiṭita.

32. pascaēta dim ā-baodayaēta urvāsnyā vā vohu-gaonahe vā vohu-kərətōiš vā haḍānaēpatayā vā kaṃciṭ vā hubaoiditəmanəm urvaranəm vastra pascaēta aiwyāṅhayaēta pascaēta ava tā āiti nmāna āiti jasōiṭ aēša yā paiti-irista.

33. airime gātūm hē nišhidaēta aṅtarə arəðəm nmānahe pārəntarə haca anyaeibyō mazdayasnaēibyō mā xšayamna jasōiṭ ātrəm mā āpəm mā zəm mā gəm mā urvarəm mā narəm ašavanəm mā nāirikəm ašaonīm vīspəm ā ahmāt yaṭ hē θrāyō xšafna sacānte, āaṭ pasca θrixšaparāt us tanūm snayaēta us vastrāt gōuš maēsmana apāca paiti avaθa yaoždayan.

34. airime gātūm hē nišhidaēta aṅtarə arəðəm nmānahe pārəntarə haca anyaeibyō mazdayasnaēibyō mā xšayamna jasōiṭ ātrəm mā āpəm mā zəm ... yaṭ hē xšvaš xšafna sacānte, āaṭ pasca xšvaš-xšaparāt us tanūm snayaēta us vastrāt gōuš maēsmana apāca paiti avaθa yaoždayan.

35. airime gātūm hē nišhidaēta aṅtarə ... yaṭ hē nava xšafna sacānte, āaṭ pasca nava-xšaparāt us tanūm snayaēta us ... yaoždayan.

36. pascaēta xšayamna jasōiṭ avi ātrəm avi āpəm avi zəm avi gəm avi urvarəm avi narəm ašavanəm avi nāirikəm ašaonīm.

37. āθravanəm yaoždaθō dahmayāt parō āfritōiṭ daiṅhōuš daiṅhu-paitīm yaoždaθō uštrahe paiti aršnō aṅryeche zaṅtōuš zaṅtu-paitīm yaoždaθō aspahe paiti aršnō aṅryeche vīsō vīspaitīm yaoždaθō gōuš paiti uxšnō aṅryeche nmānahe nmānō-paitīm yaoždaθō gōuš paiti azyā.

38. nmānahe nmānō-paitīm nāirikəm yaoždaθō gōuš paiti fravaityā vaēsōsca pairyaētrēsca yaoždaθō gōuš paiti vazyā nitəməmciṭ apərənāyūkəm yaoždaθō pasōuš garōbuš anumayeche.

39. yezi tavān aēte mazdayasna aēte pasvō staorāca aētahmāi naire frabārayən, yezi nōiṭ tavān aēte mazdayasna aēte pasvō staorāca anyəm hē avarətaṅm aētahmāi naire frabārayən vīspəm ā ahmāt yaṭ aēšō nā yō yaoždāθryō haca aeibyō nmānaēibyō xšnūtō adbištō pārāyāt.

40. yezica aēšō nā yō yaoždāθryō haca aeibyō nmānaēibyō t̄bištō axšnūtō parāiti apa hē paskāt fraoirisaitē spitama zaraθuštra aēša druxš yā nasuš nāṅhanaṭ haca cašmanaṭ haca hizumaṭ haca paitišxʾarənāda fravāxšaṭ haca frašumakaṭ haca tē,

41. aēšəm paiti sraoe aēša druxš yā nasuš upa-dvašaiti ayaoždya pascaēta bavaiṅti yavaēca yavaētātaēca, anusō zī spitama zaraθuštra aēša yā paiti-irista avāt hvarə ā-tāpaite anusō hāu mā anusō ave stārō.

42. xšnāvayeiti zī spitama zaraθuštra aēšō nā yō yaoždāθryō yaṭ aētəm paiti-iristəm frā-nasūm kərənoiti xšnāvayeiti ātrəm xšnāvayeiti āpəm xšnāvayeiti zəm xšnāvayeiti gəm xšnāvayeiti urvarəm xšnāvayeiti narəm ašavanəm xšnāvayeiti nāirikəm ašaonīm.

43. paiti dim pərəsata zaraθuštrō, dātarə gaēθanəm astvaitinəm ašāum cvaṭ ahmāi naire miždəm aṅhaṭ pasca astasca baodaṅhasca vī-urvīštīm yaṭ aētəm paiti-iristəm frā-nasūm kərənaoiti.

44. āaṭ mraoṭ ahurō mazdā, disyaṭ ahmāi naire avaṭ miždəm parō-asnāi aṅuhe vazdvarə vahištahe aṅhəuš.

45. paiti dim pərəsata zaraθuštrō, dātarə ... ašāum kuθa aētaṭ druxš pərənāne yā haca irista upa jvaṇtəm upa-dvəšaiti kuθa aētaṭ nasu pərənāne yā haca irista upa jvaṇtəm upa-raēθwayeiti.

46. āaṭ mraoṭ ahurō mazdā, ime vaca framrva yōi həṇti gāθāhva bišāmṛūta ime vaca framrva yōi həṇti gāθāhva θrišāmṛūta ime vāca framrva yōi həṇti gāθāhva caθrušāmṛūta, maṇayən bā spitama zaraθuštra aipi tā nasuš zgaθaite yaθa iušš x'āθaxtō yaθa vā nəmatō tarō yārə yaθa vā raθwya varəna.

47. dātarə ... yezica hō nā paiti-hiṇcōiṭ yō nōiṭ apivatāite daēnayā māzdayasnōiš yaoždāθryāṭ haca kuθa aētaṭ druxš pərənāite yā haca irista upa jvaṇtəm upa-dvəšaiti kuθa aētaṭ nasu pərənāite yā haca irista upa jvaṇtəm upa-raēθwayeiti.

48. āaṭ mraoṭ ahurō mazdā, maṇayən bā spitama zaraθuštra aēša druxš yā nasuš aš-aojastara varədayete yaθa para ahmāṭ as, hā aēte yaska hā aēte mahrka hā aēte paityāra hamaθa yaθa paraciṭ.

49. dātarə ... kā hē asti ciθa, āaṭ mraoṭ ahurō mazdā, haṇdarəzaciṭ haṇdarəzayən aēte yōi mazdayasna zasta hē paoirīm haṇdarəzayaṇta apa hē vastrā barayən paštō-fraθaṅhəm hē kamərədəm vīnāθayən aš-x'arətəmaēibyō spəntō-mainyavanəm dāmanəm kərəfš-x'arəm kərəfš paiti-nisirinuyāṭ vayəm kahrkāsəm uityaojanō, avā him paiti-miθnāiti vīspəm dušmatəmca dužuxtəmca dužvarštəmca.

50. yezica hē anya aṅa šyaoθna fravaršta patita hē ciθa, āaṭ yezi-žē anya aṅa šyaoθna nōiṭ fravaršta patitəm ahe narš yavaēca yavaētātaēca.

51. ciš hāu as ahura mazda yō mē asadayaṭ fradaθəm apa-baraṭ varədaθəm apa-baraṭ yaskəm upa-baraṭ mahrkəm upa-baraṭ.

52. āaṭ mraoṭ ahurō mazdā, hō bā aēšō ās ašāum zaraθuštra ašəmaoγō anašava yō aētahmi aṅhvō yaṭ astvaiṇti paiti-hiṇcaiti ā-dim nōiṭ apivatāite daēnayā māzdayasnōiš yaoždāθryāṭ haca.

53. para nū ahmāṭ haca asaṅhaṭca šōiθrāaṭca axštāṭ spitama zaraθuštra izāca āzūitišca para dasvarəca baēšazəmca para fradaθəmca varədaθəmca vaxšaθəmca para yavanəmca vāstranəmca uruθəm.

54. dātarə ... kaða nō ahmāi asaṅhaēca šōiθraēca paiti-jasātō izāca āzūitišca kaða dasvarəca baēšazəmca kaða fradaθəmca varədaθəmca vaxšaθəmca kaða yavanəmca vāstranəmca uruθəm.

55. āaṭ mraoṭ ahurō mazdā, nōiṭ nū para ahmāt spitama zaraθuštra asaṇhaēca šōiθraēca paiti-jasātō izāca āzūitišca nōiṭ dasvarēca baēšazəmca nōiṭ fradaθəmca varēdaθəmca vaxšaθəmca nōiṭ yavanəmca vāstranəmca uruθəm.

56. para ahmāt yaṭ ida ašəmaoγō anašava haθra jatō nijanāite yaṭ vā aētaṇhā daiṇhēuš sraošō ašyō frāyazānte θri-ayarəm θri-xšaparəm saociṇtaṭ paiti āθraṭ frastərətāt paiti barəsmən uzdatāt paiti haomāt.

57. pascaēta ahmāi asaṇhaēca šōiθraēca paiti-jasātō izāca āzūitišca pascaēta dasvarēca baēšazəmca pascaēta fradaθəmca varēdaθəmca vaxšaθəmca pascaēta yavanəmca vāstranəmca uruθəm. ašəm vohū.....

10.

1. pərəsaṭ zaraθuštrō ahurəm mazdām, ahura mazda mainyō spēništa dātarə gaēθanəm astvaitinəm ašāum kuθa aētaṭ druxš pərənāne yā haca irista upa jvaṇtəm upa-dvṇsaiti kuθa aētaṭ nasuš pərənāne yā haca irista upa jvaṇtəm upa-raēθwaiti.

2. āaṭ mraoṭ ahurō mazdā, ime vaca framrva yōi hēṇti gāθāhva bišāmrūta ime vaca framrva yōi hēṇti gāθāhva θrišāmrūta ime vaca framrva yōi hēṇti gāθāhva caθrušāmrūta ime vaca framrva yōi hēṇti gāθāhva bišāmrūtaca θrišāmrūtaca caθrušāmrūtaca.

3. dātarə ... kaya aēte vaca yōi hēṇti gāθāhva bišāmrūta, āaṭ mraoṭ ahurō mazdā, ime aēte vaca yōi hēṇti gāθāhva bišāmrūta ime vaca ādbitīm framrva,

4. ahyā yāsā ... humatanəm ... ašahyā āaṭ sairī ... yaθā tū-ī ... humāim θwā ižim ... θwōi staotarascā ... uštā ahmāi ... spəṇtā mainyū ... vohū xšaθrəm ... vahištā ištīš....

5. āaṭ pasca bišāmrūta vaca ime vaca framrva varəθraγne baēšazya, paiti-pərəne aṇrəm mainyūm haca nmāna haca vīsa haca zaṇtu haca daiṇhu haca havayāsə-tanvō haca nā paiti-iristō haca nāirika paiti-iriste haca nmānahe nmānō-patōiš haca vīsō vīspatōiš haca zaṇtəuš zaṇtupatōiš haca daiṇhəuš daiṇhupatōiš haca vīspayā ašəonō stōiš.

6. paiti-pərəne nasūm paiti-pərəne ḥəm-raēθwəm paiti-pərəne paiti-raēθwəm haca nmāna haca vīsa haca zaṇtu haca daiṇhu haca havayāsə-tanvō haca nā paiti-iristō haca nāirika paiti-iriste haca nmānahe nmānō-patōiš haca vīsō vīspatōiš haca zaṇtəuš zaṇtupatōiš haca daiṇhəuš daiṇhupatōiš haca vīspayā ašəonō stōiš.

7. dātarə ... kaya aēte vaca yōi hēṇti gāθāhva θrišāmrūta, āaṭ mraoṭ ahurō mazdā, ime aēte vaca yōi hēṇti gāθāhva θrišāmrūta ime vaca āθritīm framrva,

8. ašəm vohū ... yē səvištō ... huxšaθrōtəmāi ... dužvarənāiš....

9. āaṭ pasca θrišāmrūta vaca ime vaca framrva varəθraγne baēšazya, paiti-pərəne iṇdrəm paiti-pərəne saurum paiti-pərəne nāṅhaiθīm daēum haca nmāna haca vīsa haca zaṅtu haca daijhu.

10. paiti-pərəne tauru paiti-pərəne zairica haca nmāna haca visa haca zaṅtu haca daijhu.

11. dātarə ... kaya aēte vaca yōi həṅti gāθāhva caθrušāmrūta, āaṭ mraoṭ ahurō mazdā, ime aēte vaca yōi həṅti gāθāhva caθrušāmrūta ime vaca āxtūirīm framrva,

12. yaθā ahū vairyō ... mazdā aṭ mōi ... ā airyēmā išyō....

13. āaṭ pasca caθrušāmrūta vaca ime vaca framrva varəθraγne baēšazya, paiti-pərəne aēšməm xrvīm-drūm paiti-pərəne akatašəm daēum haca nmāna haca vīsa haca zaṅtu haca daijhu.

14. paiti-pərəne varənya daēvō paiti-pərəne vāṭīm daēvō haca nmāna haca vīsa haca zaṅtu haca daijhu.

15. ime aēte vaca yōi həṅti gāθāhva bišāmrūta ime aēte vaca yoi həṅti gāθāhva θrišāmrūta ime aēte vaca yōi həṅti gāθāhva caθrušāmrūta.

16. ime aēte vaca yōi həṅti aṅrahe mainyōuš snaθəm ime aēte vaca yōi həṅti aēšmahe xrvīm-draoš snaθəm ime aēte vaca yōi həṅti māzainyanəm daēvanəm snaθəm ime aēte vaca yōi həṅti vīspanəm daēvanəm snaθəm.

17. ime aēte vaca yōi həṅti avaijḥā drujō avaijḥā nasāvō hamaēštārəm yā haca irista upa jvaṅtəm upa-dvqasaiti ime aēte vaca yōi həṅti avaijḥā drujō avaijḥā nasāvō hamaēštārəm yā haca irista upa jvaṅtəm upa-raēθwaiti.

18. āaṭ tūm zaraθuštra nava maγa niθwərəsōiš yaṭ aṅhaṭ aiṅḥā zəmə vī-āpōtəməmca vī-urvarō-təməmca ana-x^rarəθa pasu-vīra, yaoždā mašyāi aipi zaṅθəm vahišta hā yaoždā zaraθuštra yā daēna māzdayasniš yō hvəm daēnəm yaoždāite humatāišca hūxtāišca hvarštāišca.

19. daēnəm ərəzvō yaoždaiθiša aθa zī aiṅḥā asti yaoždāitiš kahmaicīṭ aṅhōuš astvatō havayā ərəzvō daēnayā yō hvəm daēnəm yaoždāite humatāišca hūxtāišca hvarštāišca.

20. yaθā ahū vairyō ... kēm-nā mazdā ... māmərəṅcainiš gaēθā astvaitiš ašahe. ašəm vohū.....

11.

1. pərəsaṭ zaraθuštrō ahurəm mazdəm, ahura mazda ... ašaum kuθa nmānəm yaoždaθāni kuθa ātrəm kuθa āpəm kuθa zəm kuθa gəm kuθa urvarəm kuθa narəm ašavanəm kuθa nāirikəm ašonīm kuθa strēš kuθa māṅḥəm kuθa hvarə kuθa anaγra raocā kuθa vīspa vohu mazdaḍāta ašaciθra.

2. āaṭ mraoṭ ahurō mazdā, yaoždāθrəm srāvayōiš zaraθuštra yaoždāta pascaēta bun nmāna yaoždāta ātrəm yaoždāta āpəm yaoždāta zəm yaoždāta

gəm yaozdāta urvarəm yaozdāta narəm ašavanəm yaozdāta nāirikəm ašonīm yaozdāta strāš yaozdāta māṅhəm yaozdāta hvarə yaozdāta anayra raocā yaozdāta vīspa vohu mazdaḍāta ašaciθra.

3. aθa imə vacō drəṅjayōiš yōi aṅhən varəθraṅnyōtəməmca bæšazyōtəməmca paṅca ahuna vairya frasrāvayōiš, yaθā ahū vairyō...(5), ahunəm vairīm tanūm pāiti, yaθā ahū vairyō ... kəm-nā mazdā ... ašahe.

4. imaṭ nmānəm yaozdaθāne imaṭ aḍa vacō framrva, aṭ mā yavā bəṅdvō pafre mazištō, imaṭ ātrəm yaozdaθāne imaṭ aḍa vacō framrva, ahe θwā ārō vərəzāna paoirye pairijasāmaide mazda ahurā.

5. imaṭ āpəm yaozdaθāne imaṭ aḍa vacō framrva, apō aṭ yazamaide maēkaiṅtīscā hēbvaṅtīscā fravazaṅhō, imaṭ zəm yaozdaθāne imaṭ aḍa vacō framrva, iməm āaṭ zəm gənābīš haθrā yazamaide.

6. iməm gəm yaozdaθāne imaṭ aḍa vacō framrva, gave aḍāiš tāiš šyaoθnāiš yāiš vahīštāiš fraēšyāmahī, imaṭ urvarəm yaozdaθāne imaṭ aḍa vacō framrva, aṭ ahyāi aša mazdā urvarā vaxšaṭ.

7. imaṭ narəm ašavanəm yaozdaθāne imaṭ nāirikəm ašonīm yaozdaθāne imaṭ aḍa vacō framrva, ā airyēmā išyō rafədrāi jaṅtū nərəbyascā nāiribyscā zaraθuštrahe vaṅhēuš rafədrāi manəṅhō yā daēnā vairīm hanāṭ mīzdem ašahyā yāsā ašīm yəm išyəm ahurō masatā mazdā.

8. aθa imə vacō ... ašta ahuna vairya frasrāvayōiš, yaθā ahū vairyō...(8). kəm-nā mazdā ... ašahe.

9. pərəne aēšməm pərəne nasūm pərəne ḥəm-raēθwəm pərəne paiti-raēθwəm pərəne xrū pərəne xrvīṅni pərəne būidi pərəne būidiža pərəne kuṅdi pərəne kuṅdiža pərəne būšyasta yā zairina pərəne būšyasta yā darəḡō-gava pərəne mūidi pərəne kapastiš pərəne pairikəm yā āiti ātrəm āpəm zəm gəm urvarəm pərəne āhitīm yā āiti ātrəm āpəm zəm gəm urvarā.

10. pərəne θwā dužda aṅra mainyō haca nmānaṭ haca āθraṭ haca apaṭ haca zəmaṭ haca goaṭ haca urvarayāṭ haca narəm ašavanəm haca nāirikəm ašonīm haca strāš haca māṅhəm haca hvarə haca anayra raocā haca vīspa vohu mazdaḍāta ašaciθra.

11. aθa imə vacō ... caθwārō ahuna vairya frasrāvayōiš, yaθā ahū vairyō...(4), kəm-nā mazdā ... ašahe.

12. paršta aēšməm paršta nasūm paršta ḥəm-raēθwəm paršta paiti-raēθwəm paršta xrū paršta xrvīṅni paršta būidi paršta būidiža paršta kuṅdi paršta kuṅdiža paršta būšyasta yā zairina paršta būšyasta yā darəḡō-gava paršta mūidi paršta kapastiš paršta pairikəm yā āiti ātrəm āpəm zəm gəm urvarəm paršta āhitīm yā āiti ātrəm āpəm zəm gəm urvarā

13. paršta θwā dužda aṅra mainyō haca nmānaṭ haca āθraṭ haca apaṭ haca zəmaṭ haca goaṭ haca urvarayāṭ haca narəm ašavanəm haca nāirikəm

ašanonīm haca strēš haca mān̄həm haca hvarə haca anayra raocā haca vīspa vohu mazdaḏāta ašaciθra.

14. aθa imā vacō ... caθwārō mazdā aṭ mōi frasrāvayōiš, mazdā aṭ mōi... (4).

15-16. pərəne aēšməm....

17. aθa imā vacō ... paŋca ahuna vairya frasrāvayōiš, yaθā ahū vairyō... (5), kōm-nā mazdā ... ašahe. ašəm vohū.....

12.

1. [āaṭ yaṭ pitō para-iriθyeiti māta vā para-iriθyeiti cvaṭ aēšam upa-maŋayən puθrō haca pitarəm duγḏa haca mātārəm cvaṭ dahmanam cvaṭ tanu-pərəθanam, āaṭ mraoṭ ahurō mazdā, θrisatəm dahmanam xšvaštīm tanu-pərəθanam.

2. dātarə ... kuθa nmānəm yaoždaθāmi kuθa bun yaoždāta, āaṭ mraoṭ ahurō mazdā, θriš frasnāiti tanunam θriš frasnāiti vastranam θriš frasrūiti gāθanam imā nō ātrəm yazaēta barəsma stərənaēta aiwyō vaŋuhibyō zaoθrā baraēta, yaoždāta pascaēta bun nmāna vasō upāiti apam vasō upāiti urvaranam vasō upāiti aməšanam spəntanam spitama zaraθuštra.

3-4. āaṭ yaṭ puθrō para-iriθyeiti duγḏa vā para-iriθyeiti cvaṭ aēšam upa-maŋayən pita haca puθrəm māta haca duγḏarəm cvaṭ dahmanam cvaṭ tanu-pərəθanam, āaṭ mraoṭ ahurō mazdā, θrisatəm dahmanam xšvaštīm tanu-pərəθanam. dātarə....

5-6. āaṭ yaṭ brāta para-iriθyeiti x'an̄ha vā para-iriθyeiti cvaṭ aēšam upa-maŋayən brāta haca x'an̄harəm x'an̄ha haca brātārəm cvaṭ dahmanam cvaṭ tanu-pərəθanam, āaṭ mraoṭ ahurō mazdā, θrisatəm dahmanam xšvaštīm tanu-pərəθanam. dātarə....

7-8. āaṭ yaṭ nmānō-paitiš para-iriθyeiti nmānō-paθni vā para-iriθyeiti cvaṭ aēšam upa-maŋayən cvaṭ dahmanam cvaṭ tanu-pərəθanam, āaṭ mraoṭ ahurō mazdā, xšvaš mān̄hō dahmanam dvadasa tanu-pərəθanam kaininō x'atō puθrəm. dātarə....

9-10. āaṭ yaṭ nyākō para-iriθyeiti nyāke vā para-iriθyeiti cvaṭ aēšam upa-maŋayən napō haca nyākō napti haca nyāke cvaṭ dahmanam cvaṭ tanu-pərəθanam, āaṭ mraoṭ ahurō mazdā, paŋcāca vīsatica dahmanam paŋcāsātəm tanu-pərəθanam. dātarə....

11-12. āaṭ yaṭ napō para-iriθyeiti napti vā para-iriθyeiti cvaṭ aēšam upa-maŋayən nyākō haca naptō nyāke haca napti cvaṭ dahmanam cvaṭ tanu-pərəθanam, āaṭ mraoṭ ahurō mazdā, paŋcāca vīsatica dahmanam paŋcāsātəm tanu-pərəθanam. dātarə....

13-14. āaṭ yaṭ brātruyō para-iriṭyeiti brātruye vā para-iriṭyeiti cvaṭ aēṣam upa-maṇayən cvaṭ dahmanam cvaṭ tanu-pərəθanam, āaṭ mraoṭ ahurō mazdā, vīsaiti dahmanam caθwarəsātəm tanu-pərəθanam. dātarə....

15-16. āaṭ yaṭ tūiryō para-iriṭyeiti tūirya vā para-iriṭyeiti cvaṭ aēṣam upa-maṇayən cvaṭ dahmanam cvaṭ tanu-pərəθanam, āaṭ mraoṭ ahurō mazdā, paṇca-dasa dahmanam θrisātəm tanu-pərəθanam. dātarə....

17-18. āaṭ yaṭ tūiryō puθrō para-iriṭyeiti tūirya duγḁa vā para-iriṭyeiti cvaṭ aēṣam upa-maṇayən cvaṭ dahmanam cvaṭ tanu-pərəθanam, āaṭ mraoṭ ahurō mazdā, dasa dahmanam vīsaiti tanu-pərəθanam. dātarə....

19-20. āaṭ yaṭ tūirya puθrō vā puθrō para-iriṭyeiti tūirya duγḁairi cvaṭ aēṣam upa-maṇayən cvaṭ dahmanam cvaṭ tanu-pərəθanam, āaṭ mraoṭ ahurō mazdā, paṇca dahmanam dasa tanu-pərəθanam. dātarə....

21. āaṭ yaṭ kāmciṭ vā taoxmanam para-iriṭyeiti yaθa ainyō-varəna ainyō-ṭkaēša cvaṭ spəntahe mainyēuš dāmanam ḥam-raēθwayeiti cvaṭ paiti-raēθwayeiti.

22-24. āaṭ mraoṭ ahurō mazdā, yaθa vazayaciṭ ... nōiṭ avaθa mərətō. aṣəm vohū.....]

13.

1. kaṭ taṭ ḁama spəntō-mainyava aētaṇḥam dāmanam yōi hənti spəntahe mainyēuš ḁama dātəm vīspəm paiti ušāṇḥəm ā hū vaxšaṭ hazaraja aṇrō mainyuš paiti-jasaiti.

2. āaṭ mraoṭ ahurō mazdā spānəm sīzdrəm urvīsarəm yim vaṇhāparəm yim mašyāka avi dužvacanḥō dužakəm nāma aojaite, aētaṭ taṭ ḁama spəntō-mainyava aētaṇḥam dāmanam yōi hənti spəntahe mainyēuš ḁama dātəm vīspəm paiti ušāṇḥəm ā hū vaxšaṭ hazaraja aṇrō-mainyuš paiti-jasaiti.

3. yasca dim janaṭ spitama zaraθuštra spānəm sīzdrəm urvīsarəm yim vaṇhāparəm yim mašyāka avi dužvacanḥō dužakəm nāma aojaite nava-naptyaēciṭ hē urvānəm para-mərəṇcaite yaēṣam aṇḥaṭ dužāpīm cinvaṭ-pərətūm yō nōiṭ jvō sraošyām uzvərəzyeiti.

4. dātarə ... yō janaṭ spānəm sīzdrəm urvīsarəm yim vaṇhāparəm yim mašyāka avi dužvacanḥō dužakəm nāma aojaite kā hē asti ciθa, āaṭ mraoṭ ahurō mazdā, hazarəm upāzanam upāzōiṭ aspāhe aštraya hazarəm sraošō-caranaya.

5. kaṭ taṭ ḁama aṇrō-mainyava aētaṇḥam dāmanam yōi hənti aṇrahe mainyēuš ḁama dātəm vīspəm paiti ušāṇḥəm ā hū vaxšaṭ hazaraja spəntō-mainyūm paiti-jasaiti.

6. āaṭ mraoṭ ahurō mazdā, daēum yim zairimyaṇurəm nāma spitama zaraθuštra yim mašyāka avi dužvacanḥō zairimyakəm nāma aojaite, aētaṭ taṭ ḁama aṇrō-mainyava aētaṇḥam dāmanam yōi hənti aṇrahe mainyēuš ḁama

dātəm vīspəm paiti ušāṅhəm ā hū vaxšaṭ hazaraja spəntō-mainyūm paiti-jasaiti.

7. yasca dim janaṭ spitama zaraθuštra daēum yim zairimyaṅurəm yim mašyāka avi dužvacarḥō zairimyākəm nāma aojaite patitəm hē manō aṅhaṭ patitəm vacō patitəm šyaoθnəm uzvarštəm hē manō aṅhaṭ uzvarštəm vacō uzvarštəm šyaoθnəm.

8. yō aētaēšam sūnam jaiṅti yim pasuš-haurvamca višhaurvamca vohunazgəmca draxtō-hunaranəmca xraosyō-taraca nō ahmāṭ voyō-taraca hvō urva parāiti parō-asnāi aṅuhe yaθa vəhrkō vayōi tūite dramne barəzište razūire.

9. nōiṭ hē anyō urva haom urvānəm paiti irista bəzaiti xraosyāca voyaca aṅuhe naēda spāna pəšu-pāna paiti irista bəzaiti xraosyāca voyaca aṅuhe.

10. yō sūne pištrəm jaiṅti yim pasuš-haurve us vā hē gaošəm θwərəsaiti apa vā hē paiḍyām kərəṅtāiti yasə-taṭ paiti avā gaēθā tāyuš vā vəhrkō vā apaiti-busti haca gaēθābyō para-baraiti dasa adāṭ paiti afšō cikayaṭ, cikayaṭ sūnahe raēšō baoḍō-varštahe ciθaya.

11. yō sūne pištrəm jaiṅti yim viš-haurve us vā hē gaošəm θwərəsaiti apa vā hē paiḍyām kərəṅtāiti yasə-taṭ paiti avā vīsō tāyuš vā vəhrkō vā apaiti-busti haca vižibyō para-baraiti dasa adāṭ paiti afšō cikayaṭ, cikayaṭ sūnahe raēšō baoḍō-varštahe ciθaya.

12. dātarə ... yō spānəm jaiṅti yim pasuš-haurum frazābaoḍarḥəm snaθəm vīkərəṭ-uštānəm kā hē asti ciθa, āaṭ mraoṭ ahurō mazdā, ašta sata upāzananəm upāzōiṭ aspahe aštraya ašta sata sraošō-caranaya.

13. dātarə ... yō spānəm jaiṅti yim viš-haurum frazābaoḍarḥəm snaθəm vīkərəṭ-uštānəm kā hē asti ciθa, āaṭ mraoṭ ahurō mazdā, hapta sata upāzananəm upāzōiṭ aspahe aštraya hapta sata sraošō-caranaya.

14. dātarə ... yō spānəm jaiṅti yim vohunazgəm frazābaoḍarḥəm snaθəm vīkərəṭ-uštānəm kā hē asti ciθa, āaṭ mraoṭ ahurō mazdā, xšvaš sata....

15. dātarə ... yō spānəm jaiṅti yim taurunəm frazābaoḍarḥəm snaθəm vīkərəṭ-uštānəm kā hē asti ciθa, āaṭ mraoṭ ahurō mazdā, paṅca sata....

16. hāu jažāuš hāu vizāuš hāu sukurənahe hāu urupiš tiži-dātahe hāu raopiš yaonō-x^vatahe hāu vīspanəm spəntō-mainyavanəm spacīθranəm anya udra upāpa.

17. dātarə ... dva asti spā pasuš-haurvō dāityō-gātuš, āaṭ mraoṭ ahurō mazdā, yō yūjyastīm haca gaēθābyō parāiti sraēšōmnō tāyuš vəhrkəmca.

18. dātarə ... kva asti spā viš-haurvō dāityō-gātuš, āaṭ mraoṭ ahurō mazdā, yō hāθrō-masaṅhəm aḍwanəm haca vīzibyō parāiti sraešəmnō tāyūš vəhrkəmca.

19. dātarə ... kva asti spā vohunazgō dāityō-gātuš, āaṭ mraoṭ ahurō mazdā, yō naēcim isaiti hunaranəm tanuye isaite θrāθrəm.

20. dātarə ... yō spānəm tarō-piθwəm daste yim pasuš-haurum cvaṭ aētaēšəm šyaoθnanəm āstāraiti, āaṭ mraoṭ ahurō mazdā, yaθa aētahmi aṅhvō yaṭ astvaiṅti fratəmō-nmānahe nmānō-paitīm paiti tarō-piθwəm daiṭyaṭ aθa āstryeiti.

21. dātarə ... yō spānəm tarō-piθwəm daste yim višhaurum cvaṭ aētaēšəm šyaoθnanəm āstāraiti, āaṭ mraoṭ ahurō mazdā, yaθa aētahmi aṅhvō yaṭ astvaiṅti maḍəmō-nmānahe nmānō-paitīm paiti tarō-piθwəm daiṭyaṭ aθa āstryeiti.

22. dātarə ... yō spānəm tarō-piθwəm daste yim vohunazgəm cvaṭ aētaēšəm šyaoθnanəm āstāraiti, āaṭ mraoṭ ahurō mazdā, narəm bōiṭ ida ašavanəm jasəṅti ahmya nmāne maṭ avabyō daxštābyō yaθa āθrava paiti tarō-piθwəm daiṭyaṭ aθa āstryeiti.

23. dātarə ... yō spānəm tarō-piθwəm daste yim taurunəm cvaṭ aētaēšəm šyaoθnanəm āstāraiti, āaṭ mraoṭ ahurō mazdā, yaθa aētahmi aṅhvō yaṭ astvaiṅti apərənāyūkəm dahmō-kərətəm šyaoθnāvarəzəm vərəzyāṭ šyaoθnəm paiti tarō-piθwəm daiṭyaṭ aθa āstryeiti.

24. dātarə ... yō spānəm tarō-piθwəm daste yim pasuš-haurum kā hē asti ciθa, āaṭ mraoṭ ahurō mazdā, aētahe paiti pəšō-tanuye duye saite upāzananəm upāzōiṭ aspāhe aštraya duye saite sraošō-caranaya.

25. dātarə ... yō spānəm tarō-piθwəm daste yim višhaurum kā hē asti ciθa, āaṭ mraoṭ ahurō mazdā, navaitīm upāzananəm upāzōiṭ aspāhe aštraya navaitīm sraošō-caranaya.

26. dātarə ... yō spānəm tarō-piθwəm daste yim vohunazgəm kā hē asti ciθa, āaṭ mraoṭ ahurō mazdā, haptāitīm upāzananəm....

27. dātarə ... yō spānəm tarō-piθwəm daste yim taurunəm kā hē asti ciθa, āaṭ mraoṭ ahurō mazdā, paṅcāsatəm upāzananəm....

28. aētəm zī aētahmi aṅhvō yaṭ astvaiṅti spitama zaraθuštra spəṅtahe mainyēuš dāmanəm āsištəm zaurvānəm upāiti yaṭ spānō yōi hištəṅte ax^varō upa x^varəṅtəm parō spāsānō əviṅdānō parō xšvisca āzūitišca gōuš maṭ baratū x^varəθanəm sūnahe aēvahe dāityō-piθwəm.

29. dātarə ... yaṭ ahmi nmāne yaṭ māzdayasnōiš spā avacā vā bavāṭ aḍāityō-xratuš kuθa tē vərəzyaṅ aēte yōi mazdayasna.

30. āaṭ mraoṭ ahurō mazdā, ava hē barayēn tāštēm dāuru upa-ṭam manaoθrīm stamanēm hē adāṭ nyāzayēn išti-masō xraoždvahe biš aētavatō varədvahē.

31. aētahmāṭciṭ nidarəzayēn frā-hīmciṭ nidarəzayēn yezi nōiṭ spā avacā vā adāityō-xratuš pasūm vā narēm vā raēšyāt para hē irišintō raēšəm cikayaṭ baoḏo-varštahe ciṭaya.

32. paoirīm pasūm avaynāt paoirīm narēm raēšyāt dašinēm hē gaošəm upa-θwərəsayēn bitīm pasūm avaynāt bitīm narēm raēšyāt hōyūm hē gaošəm upa-θwərəsayēn.

33. θritīm pasūm avaynāt θritīm narēm raēšyāt dašinēm hē paidyām upa-kərəntayēn tūirīm pasūm avaynāt tūirīm narēm raēšyāt haoyām hē paidyām upa-kərəntayēn.

34. puxdəm pasūm avaynāt puxdəm narēm raēšyāt duməmcīṭ hē upa-θwərəsayēn, aētahmāṭciṭ nidarəzayēn ... ciṭaya.

35. dātarə ... yaṭ ahmi nmāne yaṭ māzdayasnōiš spā aḥam-baoḏəmnō vā bavayṭ adāityō-xratuš kuṭa tē vərəzyān aēte yōi mazdayasna, āaṭ mraoṭ ahurō mazdā, avaṭa hē baēšazəm upōisayēn yaṭa dahmāicīṭ ašaone.

36. dātarə ... yezi isəmnō nōiṭ viṇdāite kuṭa tē vərəzyān aēte yoi mazdayasna.

37. āaṭ mraoṭ ahurō mazdā, ava hē barayēn ... frā-hīmciṭ nidarəzayēn yezi nōiṭ spā aḥam-baoḏəmnō maēye vā cāiti vā vaēmi vā urūidi vā apō vā nāvayā paidyāite ahmaṭ haca irišyāt,

38. yezi taṭ paiti irišyeiti aiṅhaṭ haca šyaoθnāvarəza aṭa bavaiṅti pəšō-tanvō.

39. spānəm daθəm zaraθuštra
azəm yō ahurō mazdā
hvāvastrəm x^vā-aοθrəm
zaēni-buḏrəm tiži-dąsurəm

vīrō-draonaṅhəm gaēθanām harəθrāi, ada azəm yō ahurō mazdā spānəm nidaθəm yaṭ dīm mazaoš kəhrpō tūrahe yezi asta aša xraṭwa yezi asta gaēθabyō.

40. yasca hē spitama zaraθuštra vācim paiti zaēniš aṅhaṭ nōiṭ hē tā vīspō tāyuš vā vəhrkō vā apaiti-busti haca vīžibyō para-baraiti, jaṭwa vəhrka scaṭwa vəhrka pōiṭwa vəhrka snaēžana.

41. dātarə ... katārō zī ayā vəhrkayā jaṭwō-tarō aṅhən ašāum ahura mazda yaṭa spā vəhrkahe kərənaoiti yaṭa yaṭ vəhrkō spā, āaṭ mraoṭ ahurō

mazdā, aēšō zī aētayā vāhrkayā jaθwō-tarō aṅhōn ašāum zaraθuštra yaθa spā vāhrkahe kərənaoiti yaθa yaṭ vāhrkō spā.

42. ustāciṭ spāna patənti pasuš-haurvəmca viš-haurvəmca vohunazgəmca draxtō-hunaranəmca yaθa-ṅnyō gaēθābyō taēciṭ yā bavaiṅti aošō-tarasca dužitō-tarasca gaēθō-jatarasca yaθa anya spā.

43. ustāciṭ vāhrka patənti ṅnyō gaēθābyō taēciṭ yā bavaiṅti aošō-tarasca dužitō-tarasca gaēθō-jatarasca yaθa anya vāhrka.

44. sūnahe aēvahe aštā bifrəm, asti šē haēm yaθa aθaurune asti-šē haēm yaθa raθaēštārahe asti-šē haēm yaθa vāstryehe fšuyantō asti-šē haēm yaθa vaēsāuš asti šē haēm yaθa tāyaoš asti-šē haēm yaθa disaoš asti-šē haēm yaθa jahikayā asti-šē haēm yaθa apərənāyūkahe.

45. paiti x'arəθa x'araiti yaθa āθrava huxšnaoθrō yaθa āθrava hvāzārō yaθa āθrava aēšō kasu draonō yaθa āθrava aiti-šē haēm yaθa aθaurune, raptō pauraēibya yaθa raθaēštā aipi-jatō gəm huđāṅham yaθa raθaēštā parō pasca nmānahe yaθa raθaēštā aiti šē haēm yaθa raθaēštārahe.

46. zaēnaṅha əvīspō-x'afna yaθa vāstryō fšuyas parō pasca nmānahe yaθa vāstryō fšuyas pasca parō nmānahe yaθa vāstryō fšuyas aiti-šē haēm yaθa vāstryehe fšuyantō, x'andrakarō yaθa vaēsō asnaēraēšō yaθa vaēsō zairimyaḥsma θryaḥsma yaθa vaēsō aiti šē haēm yaθa vaēsāuš.

47. təθrō-cinō yaθa tāyuš xšapāyaonō yaθa tāyuš apišma-x'arō yaθa tāyuš aθaca dužniđātō yaθa tāyuš aiti-šē haēm yaθa tāyaoš, təθrō-cinō yaθa disuš xšapāyaonō yaθa disuš apišma-x'arō yaθa disuš aθaca dužniđātō yaθa disuš aiti-šē haēm yaθa disāuš.

48. x'andrakarō yaθa jahika asnaēraēšō yaθa jahika airitō paṅtānəm yaθa jahika zairimyaḥsma θryaḥsma yaθa jahika aiti-šē haēm yaθa jahikayā, x'afnō yaθa apərənāyuš snaēzanō yaθa apərənāyuš hizu-drājō yaθa apərənāyuš pairi-taxtō pauraēibya yaθa apərənāyuš aiti-šē haēm yaθa apərənāyūkahe.

49. yaṭ mē aēšəmciṭ nmānanəmca caratō dva mā apa-raođayaēta yasca spā pasuš-haurvō yasca spā viš-haurvō, nōiṭ mē nmānəm vīđātō hištənti zəm paiti ahurađātəm yezi mē nōiṭ aṅhāt spā pasuš-haurvō vā višhaurvō vā.

50. dātarō ... yaṭ sūniš para-iriθyeiti ništā-zəmanasca pairištā-xšudrasca kuθa aēšəm baodō jasaiti.

51. āaṭ mraoṭ ahurō mazdā, xā paiti apəm parāiti spitama zaraθuštra aθra aṅhəm ham-bavaiṅti dva udra upāpa hazanṅrāiš sūniš strī-nāmanō hazanṅrāiš sūniš nairyō-nāmanō miθwana strica nairyasca, udrahe avaynānō haēcō kərənaoiti yaṭ avāstrəm.

52. para nū ahmāt haca asaṅhaṭca šōiθrāṭca axštāṭ spitama zaraθuštra izāca āzūitišca para dasvarəca baēšazəmca para fradaθəmca varədaθəmca vaxšaθəmca para yavanəmca vāstranəmca uruθəm.

53. dātārə ... kaḍa-nō ahmāi asaṅhaēca šōiθraēca paiti-jasātō izāca āzūitišca kaḍa dasvarəca baēšazəmca kaḍa fradaθəmca varədaθəmca vaxšaθəmca kaḍa yavanəmca vāstranəmca uruθəm.

54. āaṭ mraoṭ ahurō mazdā, nōiṭ nū para ahmāt spitama zaraθuštra asaṅhaēca šōiθraīca paiti-jasātō izāca āzūitišca nōiṭ dasvarəca baēšazəmca nōiṭ fradaθəmca varədaθəmca vaxšaθəmca nōiṭ yavanəmca vāstranəmca uruθəm.

55. para ahmāt yaṭ ida udra-janō haθra jatō nijanāite yaṭ vā aētahe udrahe upa dahmēm urvānēm frāyazānte θri-ayarēm θri-xšaparēm saociṇṭaṭ paiti āθraṭ frastərətāt paiti barəsmən uzdātāt paiti haomāt.

56. pascaēta ahmāi asaṅhaēca šōiθraēca paiti-jasātō izāca āzūitišca pascaēta dasvarəca baēšazəmca pascaēta fradaθəmca varədaθəmca vaxšaθəmca pascaēta yavanəmca vāstranəmca uruθəm. ašəm vohū.....

14.

1. pərəsaṭ zaraθuštrō ahurēm mazdām, ahura mazda mainyō spōništa dātārə gaēθanəm astvaitinəm ašāum yō udrēm jaiṇti yim upāpēm hazaṅrāišsūniš strī-nāmanō hazaṅrāiš sūniš nairyō-nāmanō frazābaoḍaṅhēm snaθəm vīkərəṭ-uštānēm kā hē asti ciθa.

2. āaṭ mraoṭ ahurō mazdā, baēvarə upāzananəm upāzōiṭ aspahē aštraya baēvarə sraošō-caranaya baēvarə vazyanəm aēsmanəm xraoždvanəm hušatəm pairištānəm āθre ahurahe mazdā ašaya vaṅhuya urune ciθīm nisirinuyāt.

3. baēvarə vazyanəm aēsmanəm varədvānəm urvāsnaṃyā vā vohu-gaonahe vā vohu-kərətōiš vā hadānaēpatayā vā kəmciṭ vā hubaoiḍitəmanəm urvaranəm āθre ahurahe mazdā ašaya vaṅhuya urune ciθīm nisirinuyāt.

4. baēvarə frastərətanəm barəsmaine frastairyāt baēvarə zaoθranəm haomvaitinəm gaomavaitinəm yaoždātānəm pairi-aṅharštānəm dahmō-yaoždātānəm dahmō-pairi-aṅharštānəm ḥam-irista aētayā urvarayā yā vaoce hadānaēpāta aiwyō vaṅhubiyō ašaya vaṅhuya urune ciθīm nisirinuyāt.

5. baēvarə ažinəm udarō-θrašanəm ava-janyāt baēvarə ažinəm spakanəm kahrpunanəm ava-janyāt baēvarə kasyapanəm ava-janyāt baēvarə vazayanəm dādmānyanəm ava-janyāt baēvarə vazayanəm upāpanəm ava-janyāt baēvarə maoirinəm dānō-karšanəm ava-janyāt baēvarə maoirinəm araēkanəm kutakanəm dužaininəm ava-janyāt.

6. baēvarə pazdunəm gūθō-varətanəm ava-janyāt baēvarə maxšinəm eṛəyaitinəm ava-janyāt baēvarə maṃanəm irimaitinəm aiṅhā zəmō aipi-

kanyāt biš hapta āθrō daxštəm nərəbyō ašavabyō ašaya vañhuya urune ciθīm nisirinuyāt.

7. ātrə-carana pairiš-hanāna yaoždāni garəmō-skarana ātrə-vazanəm hikaranəm vikusrəm adarāt naēmāt hañkusrəm uparāt naēmāt tašəm tiži-dārəm tiži-žnūtəm vadəm tiži-bārəm tiži-žnūtəm nərəbyō ašavabyō ašaya vañhuya urune ciθīm nisirinuyāt yaēibyō aēte mazdayasna āθre ahurahe mazdā aēsmaḡ pairišənte.

8. vīspe zaya aθaurune nərəbyō ašavabyō ašaya vañhuya urune ciθīm nisirinuyāt yaēšam zayanam aθaurune aštra gaoiḡi paiti-dānō xrafstraynəm sraošō-caranaya urunya raēθwiš-bajina havana dāityō-kərəta tašta haomya barəsmaca.

9. vīspe zaya raθōišti nərəbyō ašavabyō ašaya vañhuya urune ciθīm nisirinuyāt yaēšam zayanam raθōišti paoiryō arštiš bityō karətō θrityō vazrō tūrya θanvarə puxda zaēnāuš maḡ akana maḡ θrisas ayō-ayrāiš xštvī fradaxšana snāvarə-bāzura maḡ θrisas fradaxšanyāiš haptaθō zraḡō aštəmō kūiris nāumō paiti-dānō dasəmō sāravārō aēvaḡdasō kamara dvadasō rānapō.

10. vīspe zaya vāstryō fšuyas nərəbyō ašavabyō ašaya vañhuya urune ciθīm nisirinuyāt yaēšam zayanam vāstryeche fšuyantō aēša yuyō-səmi ayazāna paiti-darəzāna gavāzišta gavāzō asmana hāvana yāvarənəm zgərəsnō-vaydanəm

11. kaštrəm paitiš-hərəzəm vərəzayantəm hakərəḡ ərəzatəm hakərəḡ zaranim, dātarə ... cvaḡ yavaḡ ərəzatəm, āaḡ mraoḡ ahurō mazdā, yaθa aspahe aršnō pərəska, dātarə ... cvaḡ yavaḡ zaranim, āaḡ mraoḡ ahurō mazdā, yaθa uštrahe aršnō pərəska.

12. vaiḡim taci-apam nərəbyō ašavabyō ašaya vañhuya urune ciθīm nisirinuyāt, dātarə ... cvaḡ yavaḡ vaiḡim, āaḡ mraoḡ ahurō mazdā, spā-barəzəm spā-fraθəm.

13. zam karšyam raodayam nərəbyō ašavabyō ašaya vañhuya urune ciθīm nisirinuyāt, dātarə ... cvaḡ yavaḡ zā, āaḡ mraoḡ ahurō mazdā, yavaḡ aēša āfš byārixti upa-θwaršti frabavāt.

14. nmānəm gāvayanəm nava-hāθrəm nava-nəmatəm nərəbyō ašavabyō ašaya vañhuya urune ciθīm nisirinuyāt, dātarə ... cvaḡ yavaḡ nmānəm, āaḡ mraoḡ ahurō mazdā, dvadasa vītāra upəma nava vītāra maḡəma xšvaš vītāra nitəma gātu xʹaini starətu maḡ barəziša nərəbyō ašavabyō ašaya vañhuya urune ciθīm nisirinuyāt.

15. kanyam askəndam anupayatam nərəbyō ašavabyō ašaya vañhuya urune ciθīm nisirinuyāt, dātarə ... kā yā kaine, āaḡ mraoḡ ahurō mazdā, xʹaḡha vā duḡda vā nāməni maḡ gaošavarə pasca paḡca-dasim sarəḡəm nərəbyō ašavabyō nāiriθwana upa-vādayaēta.

16. biš hapta pasvō anumaya nərəbyō ašavabyō ašaya vaṅhuya urune ciθīm nisirinuyāt, biš hapta puθraṃ gaḍwṃ uzjāmōiṭ biš hapta pəšavō fraoirisyōiṭ tarasca āpō nāvayā.

17. duye navaiti astanṃ aḍāityō-aṅharəθraṃ dāitīm ahmāiciṭ harəθrəm kərənuyāt duye navaiti gaḍwṃ pairi-yaoždaiθīta stiptibyasca anāiritibyasca vyaṅjuraēibyasca vīspaēibyasca pairi acištaēibyō yōi gaḍwṃ pairi-bavaiti, duye navaiti narṃ ašaonṃ vāstryaēta gōuš vā x'arəθahe vā hurayā vā maḍuš vā.

18. hā hē asti ciθa hā hē asti āpərətiš aipi-pārəmnāi ida ašaone nōiṭ anaipi-pārəmnāi druḷō nmāne haiθyā aṅhən astayō. ašəm vohū.....

15.

1. caiti tā šyaoθna varšta yā aṅhuš astvā vərəzyeiti fraēta apatita anuzvaršta aiṅhaṭ haca šyaoθnāvarəza aθa bavaiṅti pəšō-tanva.

2. āaṭ mraoṭ ahurō mazdā, paṅca ašāum zaraθuštra, paoirīm aētaēšṃ šyaoθnanṃ yōi vərəziṅti mašyāka yō narəm ašavanəm anyō-varənāi vā anyō-ṭkaēšāi vā kasyaṅhe saṅhāi daḍāiti vīdvā avatṭ hava xraθwa parāiti aiṅ haṭ haca šyaoθnāvarəza aθa bavaiṅti pəšō-tanva.

3. bitīm aētaēšṃ šyaoθnanṃ yōi vərəziṅti mašyāka yō sūne yim pasuš-haurve vā viš-haurve vā astanṃ ahmarštanṃ daḍāiti garəmanṃ vā x'arəθanṃ,

4. yezica aēte asti dātāhva arāṅte garəməhva vīdāṅte yaṭ vā aēte garəma x'arəθa stamanəm vā hizvṃ vā apa-dažaṭ ahmaṭ haca irišyāt yezi taṭ paiti irišyeiti aiṅhaṭ haca šyaoθnāvarəza aθa bavaiṅti pəšō-tanva.

5. θritīm aētaēšṃ šyaoθnanṃ yōi vərəziṅti mašyāka yō gaḍwṃ yṃ apuθraṃ janaiti vā vayeiti vā xraosyeiti vā pazdayeiti vā.

6. yezica aēša gaḍwa maēye vā cāiti vā vaēmi vā urūidi vā apō vā nāvayā paidyāite ahmaṭ haca irišyāt yezi taṭ paiti irišyeiti aiṅhaṭ haca šyaoθnāvarəza aθa bavaiṅti pəšō-tanva.

7. tūirīm aētaēšṃ šyaoθnanṃ yōi vərəziṅti mašyāka yō nāirikṃ ciθravaitīm daxštavaitīm vohunavaitīm xšudrā avi fraṅhərəzaiti aiṅhaṭ haca šyaoθnāvarəza aθa bavaiṅti pəšō-tanva.

8. puxḍəm aētaēšṃ šyaoθnanṃ yōi vərəziṅti mašyāka yō nāirikṃ yṃ apuθraṃ pipyūšīm vā apipyūšīm vā anasaxtṃ para xšudrā avi fraṅhərəzaiti ahmaṭ haca irišyāt yezi taṭ paiti irišyeiti aiṅhaṭ haca šyaoθnāvarəza aθa bavaiṅti pəšō-tanva.

9. yō kainīnəm upāiti stātō-ratūm vā astātō-ratūm vā paradātāṃ vā aparadātāṃ vā puθraṃca hē dadāiti mā-nō aēša yā kaine mašyānaṃ parō fšarəmət tarō daxštəm pārayāt tarō arəṃca urvarəṃca.

10. yezica aēša yā kaine mašyānaṃ parō fšarəmət tarō daxštəm parāiti tarō arəṃca urvarəṃca aētaḥmāyuš paiti varšta šyaoθna.

11. yō kainīnəm upāiti stātō-ratūm vā astātō-ratūm vā paradātāṃ vā aparadātāṃ vā puθraṃca hē dadāiti mā-nō aēša yā kaine mašyānaṃ parō fšarəmət x^vatō garəwəṃ raēšayāt.

12. yezica aēša yā kaine mašyānaṃ parō fšarəmət x^vatō garəwəṃ irišyeiti ptərəbyō āstryeiti ptərəbyō irišyeiti ptərəbyō irišiṅtāṃ raēšō cikaēn baodō-varštahe ciθaya.

13. yō kainīnəm upāiti stātō-ratūm vā astātō-ratūm vā paradātāṃ vā aparadātāṃ vā puθraṃca hē dadāiti yezica vaocāt aēša yā kaine, puθrəm aēm narō varšta yezica vaocāt aēšō nā hanāṃ aētaēšāṃ jijišānuha pərəsaṅnuha

14. aētaḍa aēša yā kaine hanāṃ aētaēšāṃ jijišāiti pərəsāiti aēša hana frabaraiti baṅham vā šaētəm vā ṅnānəm vā fraspātəm vā kaṃciṭ vā vītācinanāṃ urvaranāṃ, aētaḥmāt puθrāt mimarəxšānuha aētaḍa aēša yā kaine aētaḥmāt puθrāt mimarəxšāite havaṅta aētahe šyaoθnahe vərəzyaṅ nāca kainica hanāca.

15. yō kainīnəm upāiti stātō-ratūm vā astātō-ratūm vā paradātāṃ vā aparadātāṃ vā puθraṃca hē dadāiti vīspəm ā ahmāt θrāθrəm kərənavāt yaṭ aēša yō apərənāyūkō uzjasāt.

16. yezi nōiṭ harəθrəm baraiti aētaḍa aēša yō apərənāyūkō adāityō-aṅharəθrəm irišyāt para hē irišiṅtō raēšəm cikayaṭ baodō-varštahe ciθaya.

17. dātarə ... yezi taṭ frajasāt aṅtarə sairi varəzāne kaḥmāt mazdayasnanāṃ harəθrəm barāt.

18. āaṭ mraoṭ ahurō mazdā, yō kainīnəm upāiti stātō-ratūm vā astātō-ratūm vā paradātāṃ vā aparadātāṃ vā vīspəm ā ahmāt θrāθrəm kərənavāt yaṭ aēša yō apərənāyūkō uzjasāt.

19. yezi nōiṭ harəθrəm baraiti aētaḍa hē vīspā hāirišīš frāšnaoiti bipaitištānaca caθwarə-paitištānaca [aēša bipaitištāna yā kaine aēša caθwarə-paitištāna yā gaḍwa.]

20. dātarə ... yezi taṭ frajasāt aṅtarə sairi varəzāne kaḥmāt mazdayasnanāṃ harəθrəm barāt.

21. āaṭ mraoṭ ahurō mazdā, yō hē aṅhaṭ nazdištəm nmānəm uzdasta aētaḥmāyuš paiti harəθrəm vīspəm ā ahmāt θrāθrəm kərənavāt yaṭ aēte yōi spāna uzjasāṅ.

22. yezi nōiṭ harəθrəm baraiti aētaḍa aēte yōi spāna adāityō-aṅharəθrəm irišyaṅ para aēšāṃ irišiṅtāṃ raēšō cikaēn baodō-varštahe ciθaya.

23. dātarə ... yezica aēša gaḍwa uštrō-stānaēšva frajasāt kahmāt mazdayasnanam harəθrəm barāt.

24-25. āaṭ mraoṭ ahurō mazdā, yō aētəm uštrō-stānəm uzdasta yejḥā vō aēšō uštrō-stāniš aṇḥaṭ aētahmāyuš paiti harəθrəm vīspəm ā ahmāt....

26. dātarə ... yezica aēša gaḍwa aspō-stānaēšva frajasāt kahmāt mazdayasnanam harəθrəm barāt.

27-28. āaṭ mraoṭ ahurō mazdā, yō aētəm aspō-stānəm uzdasta yejḥā vō aēšō aspō-stāniš aṇḥaṭ aētahmāyuš paiti harəθrəm vīspəm ā ahmāt....

29. dātarə ... yezica aēša gaḍwa gavō-stānaēšva frajasāt kahmāt mazdayasnanam harəθrəm barāt.

30-31. āaṭ mraoṭ ahurō mazdā, yō aētəm gavō-stānəm uzdasta yejḥā vō aēšō gavō-stāniš aṇḥaṭ aētahmāyuš paiti harəθrəm vīspəm ā ahmāt....

32. dātarə ... yezica aēša gaḍwa pasuš-hastaēšva frajasāt kahmāt mazdayasnanam harəθrəm barāt.

33-34. āaṭ mraoṭ ahurō mazdā, yō aētəm pasuš-hastəm uzdasta yejḥā vō aēšō pasuš-hastiš aṇḥaṭ aētahmāyuš paiti harəθrəm vīspəm ā ahmāt....

35. dātarə ... yezica aēša gaḍwa uzdaēzaēšva frajasāt kahmāt mazdayasnanam harəθrəm barāt.

36-37. āaṭ mraoṭ ahurō mazdā, yō aētəm uzdaēzəm uzdišta yejḥā vō aēšō uzdaēziš aṇḥaṭ aētahmāyuš paiti harəθrəm vīspəm ā ahmāt....

38. dātarə ... yezica aēša gaḍwa avakaṇtaēšva frajasāt kahmāt mazdayasnanam harəθrəm barāt.

39. āaṭ mraoṭ ahurō mazdā, yō aētəm avakanəm avakaṇta yejḥā vō aēšō avakaniš aṇḥaṭ aētahmāyuš paiti harəθrəm vīspəm ā ahmāt θrāθrəm kərənāvāt yaṭ aēte yōi spāna uzjasan.

40. yezi nōiṭ harəθrəm baraiti aētaḍa aēte yōi spāna adāityō-aṇharəθrəm irišyan para aēšam irišiṇṭam raēšō cikaēn baodō-varštahe ciṭaya.

41. dātarə ... yezica aēša gaḍwa avi maḍəme vā vāstre vā frajasāt kahmāt mazdayasnanam harəθrəm barāt.

42. āaṭ mraoṭ ahurō mazdā, yō aētəm vāstri uzdasta yejḥā vō aēšō vāstriš aṇḥaṭ aētahmāyuš paiti harəθrəm,

43. upāca hē gātūm barayən nəmō vaṇtāhva kəmcit vā starətaēšinam vīspəm ā ahmāt θrāθrəm kərənāvāt yaṭ aēte yōi spāna x^vā-zaēnəm x^vā-draonəm bavān.

44. dātarə ... kaṭa aēte spāna x^vā-zaēnəm x^vā-draonəm bavān.

45. āaṭ mraoṭ ahurō mazdā, yavaṭ aēte spāna biš hapta nmāna pairi tacahi bavān, vasō pascaēta fraxštāite aiwi-gāme iṭa hama, xšvas māṇhō sūnō

θrāθrēm hapta sarəda apərənāyūkahe āθrō ahurahe mazdā puθrēm avaθa nāirikayāi.

46. dātarə ... ašāum yezi vasən mazdayasna jvō-daxštəm maēθmanəm kuθa tē vərəzyaṇ aēte yōi mazdayasna.

47. āaṭ mraoṭ ahurō mazdā, aētaða hē aēte mazdayasna aiñhā zəmə ava-kanəm ava-kanayən maiḍyōi pasuš-hastaēšva maiḍyōi paitištāne xruždisme maiḍyōi narš varədušme.

48. paoiryāi nidarəzayən apərənāyūkəm avaθa ātrəm ahurahe mazdā puθrēm vīspəm ā ahmāt θrāθrēm kərənāvāt yavaṭ aēšō spā anya jasō aiwica aparəm patica aparəm apāca paurvaēibya nōiṭ dim avaθa irišyaṇ.

49. yō gaḍwəṃ yəṃ apuθrəṃ θrayəṃ bāuzdri barəθrica puθrāca paēmainica ayatāca taēca aētaḍaca puθrəm baraiti sūṇəṃ bāuzdri.

50. dātarə ... yō gaḍwəṃ jaiṇti yəṃ apuθrəṃ θrayəṃ bāuzdri barəθrica puθrāca paēmainica ayatāca taēca aētaḍaca puθrəm baraiti sūṇəṃ bāuzdri kā hē asti ciθa.

51. āaṭ mraoṭ ahurō mazdā, hapta sata upāzananəṃ upāzōiṭ aspahe aštraya hapta sata sraošō-caranaya. ašəm vohū.....

16.

1. dātarə gaēθanəṃ astvaitinəṃ ašāum yaṭ ahmi nmāne yaṭ māzdayasnōiš nāirika ciθavaiti daxštavaiti vohunavaiti nišhiḍāt kuθa tē vərəzyaṇ aēte yōi mazdayasna.

2. āaṭ mraoṭ ahurō mazdā, aētaða hē aēte mazdayasna paṇta vīcinaēta pairi urvarābyasca varəḍābyasca aēsmaēibyō hiku pašnu gātu niḍayaēta fratara haca nmāna vərəzyaṇ yaṭ vā naēməm yaṭ vā θrišum yaṭ vā caθrušum yaṭ vā paṇtaṇhum yezi nōiṭ nāirika ātrəm aiwi-vaēnāt yezi nōiṭ nāirika āθre raoxšṇəṃ paiti-diḍyāt.

3. dātarə ... cvaṭ drājō haca āθraṭ cvaṭ drājō haca apaṭ cvaṭ drājō haca barəsmən frastairyāt cvaṭ drājō haca nərəbyō ašavabyō.

4. āaṭ mraoṭ ahurō mazdā, paṇca-dasa-gāim haca āθraṭ paṇca-dasa-gāim haca apaṭ paṇca-dasa-gāim haca barəsmən frastairyāt θrigāim haca nərəbyō ašavabyō.

5. dātarə ... cvaṭ drājō ava-hištāt aēša yō nāirikayā ciθravaityā daxštavaityā vohunavaityā x'arəθəm frabarāt.

6. āaṭ mraoṭ ahurō mazdā, θrigāim ava-hištāt aēša yō nāirikayā ciθravaityā daxštavaityā vohunavaityā x'arəθəm frabarāt cinəm x'arəθəm frabarāt cinəm yaom frabarāt ayaṇhaēnəm vā srum vā nitəma xšaθra vairya.

7. cvaṭ xʷarəθəm frabarāt cvaṭ yaom frabarāt, dva danarə tāyūirinam aēva danarə xšaodrinam yezi nōiṭ nāirika niuruiḍyāt, yezi apərənāyūkō frāšnavāt zasta hē paoirīm frasnāḍayən aētahe yaṭ apərənāyūkahe ahe havayāsə tanvō.

8. yezi nāirika vohuniš aiwi-vaēnāt yaṭ hē θrāyō xšafna sacāṇte airime gātūm hē nišhidaēta vīspəm ā ahmāt yaṭ hē caθwārō xšafna sacāṇte, yezi nāirika vohuniš aiwi-vaēnāt yaṭ hē caθwārō xšafna sacāṇte airime gātūm hē nišhidaēta vīspəm ā ahmāt yaṭ hē paṇca xšafna sacāṇte.

9. yezi nāirika vohuniš aiwi-vaēnāt yaṭ hē paṇca xšafna sacāṇte airime gātūm hē nišhidaēta vīspəm ā ahmāt yaṭ hē xšvaš xšafna sacāṇte, yezi nāirika vohuniš aiwi-vaēnāt yaṭ hē xšvaš xšafna sacāṇte airime gātūm hē nišhidaēta vīspəm ā ahmāt yaṭ hē hapta xšafna sacāṇte.

10. yezi nāirika vohuniš aiwi-vaēnāt yaṭ hē hapta xšafna sacāṇte airime gātūm hē nišhidaēta vīspəm ā ahmāt yaṭ hē ašta xšafna sacāṇte, yezi nāirika vohuniš aiwi-vaēnāt yaṭ hē ašta xšafna sacāṇte airime gātūm hē nišhidaēta vīspəm ā ahmāt yaṭ hē nava xšafna sacāṇte.

11. yezi nāirika vohuniš aiwi-vaēnāt yaṭ hē nava xšafna sacāṇte āaṭ hē paityārəm ava-barəṇti daēva daēvanam yasnāica vahmāica, aētaḍa hē aēte mazdayasna paṇta vīcinaēta pairi urvarābyasca varəḍābyasca aēsmaēibyō.

12. aētaḍa hē aēte mazdayasna aiṅhā zəmō θriš maḡəm ava-kanayən dva maḡa frasnāḍayən maēsmana gēuš ōyum āpō xrafstrəm ava-janaēta maoirīm dānō-karšəm yaṭ vā hama duye saite kahyāciṭ aṅrō-mainyavanam xrafstranəm ava-janyāt yaṭ vā aēte zaēna.

13. aētahe yaṭ mazdayasnahe aētayā nāirikayā ciθravaityā daxštavaityā vohunavaityā daxštəm uzvərəzyāt kā hē asti ciθa, āaṭ mraoṭ ahurō mazdā, aētahe paiti pəšō-tanuye duye saite upāzananam upāzōiṭ aspahe aštraya duye saite sraošō-caranaya.

14. dātərə ... yō nāirikayā ciθravaityā daxštavaityā vohunavaityā paurvō vasna šyaoθna tanūm iriṭyāt yaṭ hē ciθra daxštəm bavaiti yaṭ hē daxšta ciθrəm bavaiti kā hē asti ciθa.

15. āaṭ mraoṭ ahurō mazdā, paoiriyāi upaēta paoiriyāi nišasta θrisatəm upāzananam upāzōiṭ aspahe aštraya θrisatəm sraošō-caranaya, bityāi upaēta bityāi nišasta paṇcāsātəm upāzananam upāzōiṭ aspahe aštraya paṇcāsātəm sraošō-caranaya, θrityāi upaēta θrityāi nišasta haptāitīm upāzananam upāzōiṭ aspahe aštraya haptāitīm sraošō-caranaya.

16. [tūiryāi upaēta tūiryāi nišasta yim aṅtarə vastrəm frajasāt yim aṅtarə āhitəm rānəm frajasāt afranḡarəzāt pairi xšudrāt kā hē asti ciθa, āaṭ mraoṭ ahurō mazdā, navaitīm upāzananam upāzōiṭ aspahe aštraya navaitīm sraošō-caranaya.]

17. yō nāirikam ciθravaitim daxštavaitim vohunavaitim xšudrā avi fraḡhərəzaiti nōiṭ vaḡhō ahmāt šyaoθnəm vərəzyeiti yaδōiṭ puθrahe hvāzātahe frā naēzəm nasūm pacāṭ paiti ūθəm barāt.

18. vīspe drvaṅtō tanu-drujō yō adərətō ṭkaēšō vīspe adərətō-ṭkaēšō yō asraošō vīspe asraošō yō anašavanō vīspe anašavanō yō tanu-pərəθō. ašəm vohū.....

17.

1. pərəsaṭ zaraθuštrō ahurəm mazdām, ahura mazda ... ašāum kəm aojišta mahrka mašyāka daēvō aošō yazāite.

2. āaṭ mraoṭ ahurō mazdā, hāu bā ašāum zaraθuštra yō aētahmi aḡhvō yaṭ astvaiṅti varəsāsca ḡam-rāzayeiti varəsāsca pairi-brīnəṅti srvaēca upa-θwərəsəṅti aθa dim upa-taošayeṅti ūnāhva dim raēšayaca.

3. āaṭ āhva vyarəθāhva zəmō daēva ḡam-bavaiṅti āaṭ āhva vyarəθāhva zəmō xrafstra ḡam-bavaiṅti yim mašyāka spiš ḡama aojaite yim mašyāka yaom yavō-hva nižḡaḡhəṅti vastra vastrāhva.

4. āaṭ yaṭ tūm zaraθuštra aētahmi aḡhvō yaṭ astvaiṅti varəsāsca ḡam-rāzayanjuha varəsāsca pairi-brīnanjuha srvaēca upa-θwərəsanjuha, āaṭ tūm pascaēta apa-barōiš dasa-gāim haca nərəbyō ašavabyō vīsata-gāim haca āθraṭ θrisata-gāim haca apaṭ paṅcāsata-gāim haca barəsmən frastairyāt.

5. āaṭ aθra maḡəm ava-kanōiš dištīm xrūždisme vitastīm varədusme paiti dim ābarōiš aθa imā vacō framruyā vārəθraḡnīš zaraθuštra, aṭ ahyāi ašā mazdā urvarā vaxšaṭ.

6. xšaθrāi vairyāi pairi-karəm pairi-karayōiš tišrō yaṭ vā xšvaš yaṭ vā nava ahunəmca vairim frasrāvayōiš tišrō yaṭ vā xšvaš yaṭ vā nava.

7. srvābya maḡəm ava-kanōiš ništara-naēmāt nmānahe avaṭ aipi yaθa kasištahe ərəzvō fratəməm ṭbišiš, paiti dim ābarōiš aθa imā vacō framruyā vārəθraḡnīš zaraθuštra, ašā vohū manaḡhā yā sruyē parē magaoṅō.

8. xšaθrāi vairyāi pairi-karəm pairi-karayōiš tišrō yaṭ vā xšvaš yaṭ vā nava ahunəmca vairim frasrāvayōiš tišrō yaṭ vā xšvaš yaṭ vā nava.

9. paiti tē mərəḡa ašō-zušta imā srvā vaēdayemi imā srvā āvaēdayemi imāso-tē srvā mərəḡa ašō-zušta hyārə arštayasca karətayasca θanvarəca ištavasca ərəzifyō-parəna asanasca fradaxšanya paiti daēvō māzanyan.

10. yezi nōiṭ paiti-vaēdayeṅti tā srvā pascaēta bun māzainyanam daēvanam arštayasca karətayasca θanvarəca ištavasca ərəzifyō-parəna asanasca fradaxšanya paiti daēvō māzanyan.

11. vīspe drvaṅtō tanu-drujō yō adərətō-ṭkaēšō vīspe adərətō-ṭkaēšō yō asraošō vīspe asraošō yō anašavanō vīspe anašavanō yō tanu-pərəθō. ašəm vohū.....

18.

1. paravō zī mašyāka uiti mraoṭ ahurō mazdā āi ašāum zaraθuštra paiti-dānēm ainīm baraiti anaiwyāstō daēnām diwžaṭ haca āθrava saṅhaite,

mā dim mruyā āθravanēm
uiti mraoṭ ahurō mazdā
āi ašāum zaraθuštra.

2. xrafstraynēm ainīm baraiti anaiwyāstō daēnām diwžaṭ haca āθrava saṅhaite, mā dim mruyā āθravanēm uiti mraoṭ ahurō mazdā āi ašāum zaraθuštra.

3. urvarām ainīm baraiti anaiwyāstō daēnām diwžaṭ haca āθrava saṅhaite, mā dim mruyā āθravanēm uiti mraoṭ ahurō mazdā āi ašāum zaraθuštra.

4. aštram mairīm kāšayeiti anaiwyāstō daēnām diwžaṭ haca āθrava saṅhaite, mā dim mruyā āθravanēm uiti mraoṭ ahurō mazdā āi ašāum zaraθuštra.

5. yō saēte haurvām tarasca xšapanēm ayazəmnō asrāvayō amarō əvərəzyō asixšō asācayō jayāi cinvaṭ-uštānēm diwžaṭ haca āθrava saṅhaite, mā dim mruyā āθravanēm uiti mraoṭ ahurō mazdā āi ašāum zaraθuštra.

6. təm dim mruyā āθravanēm
uiti mraoṭ ahurō mazdā
āi ašāum zaraθuštra
yō haurvām tarasca xšapanēm
xratūm pərəsāt ašavanēm

ązō-būjim ravazdām cinvaṭ-pərətūm havahhō-dām ahu-nāsəm aša-nāsəm vahišta-nāsəm vahištahe anjhəuš.

7. paiti mām ərəzvō pərəsaṅuha
yim daðvāṅhəm spəništəmca
vaēdištəmca paiti-vacištəmca parštəm avaθa tē anḡhaṭ vaṅhō
avaθa anḡhāi spanyā
yezi mām paiti-pərəsāṅhe.

8. pərəsaṭ zaraθuštrō ahurəm mazdām, ahura ... ašāum kā asti iθyejā maršaonō.

9. āaṭ mraoṭ ahurō mazdā, aya daēna disyāt spitama zaraθuštra yō θrizarəmaēm ratūm aiwyāṅhām nōiṭ aiwyāsti nōiṭ gāθā srāvayeiti nōiṭ āpō vaṅuhīš yazaiti.

10. yasca mē aētəm narəm ązō avi ava-gərəptəm ravōhu paiti uzbārayaṭ nōiṭ vaṅhō ahmāṭ šyaoθnəm vərəzyeiti yaθa yaṭ hē pəstō-fraθaṅhəm kamərəðəm kərənuyāt.

11. aēvahe zī ašaoyahe ayahe anašaonō zānu-drājā asti āfritiš dvayā hizu-drājā θrayaṃ naēda-ciš caθwārō x^vatō zavaṃte.

12. yō aēvahe ašaoyahe ayahe anašaonō haomahe hutahe daḍāiti usəfritinaṃ vā myezdinaṃ nōiṭ vaṃhō ahmāṭ šyaonəm vərəzyeiti yaḍa yaṭ hazarō-aspaṃ haēnaṃ avazōiṭ māzdayasniš avi višō janyāṭ nərōš para gaṃ azōiṭ varōtaṃ.

13. paiti maṃ ərəzvō pərəsaṃuha yim dadvāṃhəm spōništəmca vaēdištəmca paiti-vacištəmca parštəm avaḍa tē aṃhaṭ vaṃhō avaḍa aṃhāi spanyā yezi maṃ paiti-pərəsāṃhe.

14. pərəsaṭ zaraθuštrō ahurəm mazdaṃ, ahura mazda mainyō spōništa dātārə gaēθanaṃ astvaitinaṃ ašāum kō asti sraošahe ašyehe taxmahe tanumaḍrahe darši-draoš āhūiryehē sraošāvarəzō.

15. āaṭ mraoṭ ahurō mazdā, mərəγō yō parō-darš naṃa spitama zaraθuštra yim mašyāka avi dužvacanḥō kahrkatās naṃa aojaite āaṭ hō mərəγō vācim baraiti upa ušāṃhəm yaṃ sūrāṃ,

16. usəhištata mašyāka staota ašəm yaṭ vahišṭəm nīsta daēva aēša vō dvaraiti būšyasta darəγō-gava hā višpəm ahūm astvaṃtəm hakaṭ raocanḥaṃ fraγrātō nix^vabdayeiti, x^vafsa darəγō mašyāka nōiṭ tē sacaite.

17. mā θrayaṃ vahišṭanaṃ aiwiθyō buyata humataheca mananḥō hūxtaheca vacanḥō hvarštaheca šyaonəhe θrayaṃ acištanaṃ aiwiθyō buyata dušmataheca mananḥō dužūxtaheca vacanḥō dužvarštaheca šyaonəhe.

18. āaṭ mē paoiryāi θrišvāi xšafne ātarš ahurahe mazdā nmānahe nmānō-paitim yāsaiti,

19. avaiṃhe nmānahe nmānō-paite usəhišta aiwi vastra yāṃhayaṃuha frā zasta snayaṃuha ā aēsmaṃ yāsaṃuha avi maṃ bara paiti maṃ raocaya aēsmanāṃ yaoždātanāṃ frasnātaēibya zastaēibya ava mē āziš daēvō-dātō parōiṭ pairiθnəm aṃhvaṃ ava-dərənāṃ sadayeiti.

20. āaṭ mē bityāi θrišvāi xšafne ātarš ahurahe mazdā vastrim fšuyaṃtəm yāsaiti,

21. avaiṃhe fšuya vāstrya usəhišta aiwi vastra yāṃhayaṃuha frā zasta snayaṃuha ā aēsmaṃ yāsaṃuha avi maṃ bara paiti maṃ raocaya aēsmanāṃ yaoždātanāṃ frasnātaēibya zastaēibya ava mē āziš daēvō-dātō parōiṭ pairiθnəm aṃhvaṃ ava-dərənāṃ sadayeiti.

22. āaṭ mē θrityāi θrišvāi xšafne ātarš ahurahe mazdā sraošəm ašim yasaiti, avaiṃhe āi sraoša ašya huraoḍa āaṭ maṃ kəmcit aṃhōuš astvatō aēsmanāṃ paiti baraiti yaoždātanāṃ frasnātaēibya zastaēibya ava mē āziš daēvō-dātō parōiṭ pairiθnəm aṃhvaṃ ava-dərənāṃ sadayeiti.

23. āaṭ hō sraoṣō aṣyō aom mərəṣəm fraṅrārayeiti parō-darš nāma spitama zaraθuštra yim mašyāka avi dužvacanḥō kahrkatās nāma aojaitē, āaṭ hō mərəṣō vācim baraiti upa ušāḥəm yaṃ sūrəm,

24. usəhištata mašyāka staota aṣəm yaṭ vahištəm nīsta daēva aēša vō dvaraiti bušyāsta darəṣō-gava hā vīspəm ahūm astvaṇtəm hakaṭ raocanḥəm fraṅrātō nix'abdayeiti, x'afsa darəṣō mašyāka nōiṭ tē sacaite.

25. mā θrayəm vahištanəm aiwiθyō buyata humataheca mananḥō hūxtaheca vacanḥō hvarštaheca šyaoθnahe θrayəm acištanəm aiwiθyō buyata dušmataheca mananḥō dužūxtaheca vacanḥō dužvarštaheca šyaoθnahe.

26. āaṭ aoṣete haxa haša ana barəziš sayamnanəm, usəhišta-tū vyārayeite məm yatārō paurvō usəhištaiti parāiti vahištahe anḥōuš yatārō paurvō āθre ahurahe mazdā aēsmanəm paiti-baraiti yaoždātanəm frasnātaēibya zastaēibya ahmāi ātarš āfrināṭ xšnūtō adbištō haṅdanḥum,

27. upa θwā haxšōiṭ gēuš vəθwa
 upa vīranəm pouru-tās
 upa θwā vərəzvaṭca manō
 vərəzvatica haxšōiṭ anuḥa
 urvāxš-anuḥa gaya jīyaēša
 tā xšapanō yā jvāhi,
 imaṭ āθrō āfrivanəm
 yō ahmāi aēsmanəm baraiti
 hikūš raocas-pairištəm
 ašahe bərəja yaoždātā.

28. yasca mē aēte mərəṣa spitama zaraθuštra miθwana strica nairyasca naire ašaone ašaya vanhuya para-daθaṭ nmānəm hō manyaēta para-daθō satō-stūnəm hazanrō-frasciḥbanəm baēvarə-mištəm baēvarə-vaēdayanəm.

29. yasca mē aētahe mərəṣahe yaṭ parō-daršahe tanumazō gēuš daθaṭ nōiṭ dim yava azəm yō ahurō mazdā bitīm vācim paiti-pərəsəmnō bva fraša fraṅrāi vahištəm ā ahūm ā.

30. sraoṣō aṣyō drujim apərəsaṭ
 apayūxtāṭ paiti vazrāṭ,
 druxš ax'āθre əvərəzike
 tūm zī aēva vīspahe anḥōuš astvatō anaiwyāstiš hunahi.

31. āaṭ hē hā paiti-davata yā daēvi druxš, sraoša ašya huraōða nava azəm vīspahe anḥōuš astvatō anaiwyāstiš hunāmi həṇti bāða māvayaciṭ caθwārō aršāna.

32. tē məm avaθa vərənəṇte
 yaθa anyāsciṭ aršānō
 avi xšudrā xšaθrišva ḥəm-vərənavaiṇti.

33. sraošō ašyō drujim apərəsaṭ apayūxtāt paiti vazrāt, druxš axʼāθre əvərəzike kō tē aētaēšam aršnam paoiryō.

34. āaṭ hē hā paiti-davata yā daēvi druxš, sraoša ašya huraoda hō bā mē aētaēšam aršnam paoiryō yaṭ nā kasvikamcina yāṅhuyanaṃ avarətanam naire ašaone jasta ašaya vaṅhuya nōiṭ dadāiti.

35. hō maṃ avaθa vərənūiti yaθa anyāsciṭ aršānō avi xšudrā xšaθrišva ḥam-vərənavaiṇti.

36. sraošō ašyō drujim apərəsaṭ apayūxtāt paiti vazrāt, druxš axʼāθre əvərəzike ciš aiṅhe asti uzvarəzəm.

37. āaṭ hē hā paiti-davata yā daēvi druxš, sraoša ašya huraoda aom aiṅhe asti uzvarəzəm yaṭ nā kasvikamciṭ yāṅhuyanaṃ avarətanam naire ašaone ajasta ašaya vaṅhuya dadāiti.

38. hō maṃ avaθa vərənən nijaiṇti yaθa vəhrkō caθwarə-zangrō barəθryāt haca puθrəm niždarə-dairyāt.

39. sraošō ašyō drujim apərəsaṭ apayūxtāt paiti vazrāt, druxš axʼāθre əvərəzike kō tē aētaēšam aršnam bityō.

40. āaṭ hē hā paiti-davata yā daēvi druxš, sraoša ašya huraoda hō bā mē aētaēšam aršnam bityō yaṭ nā paurva frabda frabdō-drājō framaēzaiti.

41. hō maṃ avaθa vərənūiti yaθa anyāsciṭ aršānō avi xšudrā xšaθrišva ḥam-vərənavaiṇti.

42. sraošō ašyō drujim apərəsaṭ apayūxtāt paiti vazrāt, druxš axʼāθre əvərəzike ciš aiṅhe asti uzvarəzəm.

43. āaṭ hē hā paiti-davata yā daēvi druxš, sraoša ašya huraoda aom aiṅhe asti uzvarəzəm yaṭ nā pasca yaṭ usəhištāt θrigāim θriš ašəm upa-stuyāt biš humatanam θriš huṅšaθrōtəmāi caθwārō adāt ahunəm vairim frasrāvayoiṭ yeyṅhe hātəm frāyazāite.

44. hō maṃ avaθa vərənən nijaiṇti yaθa vəhrkō caθwarə-zangrō barəθryāt haca puθrəm niždarə-dairyāt.

45. sraošō ašyō drujim apərəsaṭ apayūxtāt paiti vazrāt, druxš axʼāθre əvərəzike kō tē aētaēšam aršnam θrityō.

46. āaṭ hē hā paiti-davata yā daēvi druxš, sraoša ašya huraoda hō bā mē aētaēšam aršnam θrityō yaṭ nā xʼaptō xšudrā frāraodayeite.

47. hō maṃ avaθa vərənūiti yaθa anyāsciṭ aršānō avi xšudrā xšaθrišva ḥam-vərənavaiṇti.

48. sraošō ašyō drujim apərəsaṭ apayūxtāt paiti vazrāt, druxš axʼāθre əvərəzike ciš aiṅhe asti uzvarəzəm.

49. āaṭ hē hā paiti-davata yā daēvi druxš, sraoša ašya huraoda aom aiṅhe asti uzvarəzəm yaṭ nā pasca yaṭ xʼafnāda frabūidyamnō θriš ašəm upa-stuyāt

biš humatanam θriš huxšaθrōtēmāi caθwārō adāt ahunəm vairīm frasrāvayōit yeyjhe hātām frāyazāite.

50. hō maṃm avaθa vərənaṃ nijaiṃti yaθa vəhrkō caθwarə-zangrō barəθryāt haca puθrəm niždarə-dairyāt.

51. āaṭ aošete spəntayāi ārmatāe, spənta ārmaite iməm tē narəm nisrinaomi iməm mē narəm nisrārayā upa sūrām frašō-kərətīm vīduš-gāθəm vīduš-yasnəm paiti-parštō-sravanhəm maždrəm haða-hunarəm tanu-maθrəm.

52. āaṭ hē nāma fradaiθyā ātrə-dātəm vā ātrə-ciθrəm vā ātrə-zaṃtūm vā ātrə-dahyūm vā kəmcit vā ātrə-dātahe nāma.

53. sraošō ašyō drujim apərəsaṭ apayūxtāt paiti vazrāt, druxš ax^vāθre əvərəzike kō tē aētaēšam aršnaṃ tūiryō.

54. āaṭ hē hā paiti-davata yā daēvi druxš, sraoša ašya huraoða hō bā mē aētaēšam aršnaṃ tūiryō yaṭ nā jahika pasca paṃcadasīm sarəðəm frapataiti anaiwyāsta vā anabdātō vā.

55. pasca tūirim gāmō-bərətīm išarə pascaēta vaēm yōi daēva hakaṭ vaēm ava-mivāmahi hizvasca pivasca, [xšayamna pascaēta mərəγənte gaēθā astvaitiš ašahe yaθa zaṇḁa yātumənta mərəṇcīta gaēθā ašahe.]

56. sraošō ašyō drujim apərəsaṭ apayūxtāt paiti vazrāt, druxš ax^vāθre əvərəzike ciš aiṃjhe asti uzvarəzəm.

57. āaṭ hē hā paiti-davata yā daēvi druxš, sraoša ašya huraoða naēciš aiṃj he asti urvarəzəm

58. yaṭ nā jahika pasca paṃcadasīm sarəðəm frapataiti anaiwyāsta vā anabdātō vā.

59. pasca tūirim gāmō-bərətīm išarə pascaēta vaēm yōi daēva hakaṭ vaēm ava-mivāmahi hizvasca pivasca, [xšayamna pascaēta mərəγənte gaēθā astvaitiš ašahe yaθa zaṇḁa yātumənta mərəṇcīta gaēθā ašahe.]

60. paiti maṃm ərəzvō pərəsaṃjuha yim dadvānhəm spēništəmca vaēdištəmca paiti-vacištəmca parštəm avaθa tē aṃhaṭ vanhō avaθa aṃhāi spanyā yezi maṃm paiti-pərəsāṃjhe.

61. pərəsaṭ zaraθuštrō ... ašāum kō θwam yim ahurəm mazdām mazištayanti inaoiti kō mazišta tbaēšaṃha tbaēšayeiti.

62. āaṭ mraoṭ ahurō mazdā, jahi bā ašāum zaraθuštra yō xšudrā ham-raēθwayeiti dahmanam adahmanamca daēvayasnəm adaēvayasnəmca tanu-pərəθanəm atanu-pərəθanəmca.

63. θrišum apam θraotō-stācam taxmanam pairištayeiti paiti-dīti zaraθuštra θrišum urvaranam uzuxšyēntinam srīranam zairi-gaonanam vaxšā apayasaite paiti-dīti zaraθuštra.

64. θrišum spəntayā ārmatōiš varəną apayasaitē paiti-dīti zaraθuštra θrišum narš ašaonō frāyō-humatahe frāyō-hūxtahe frāyō-hvarštahe amaheca vərəθraγnaheca ašavastahēca apayasaitē paiti-pasti zaraθuštra.

65. tāsca tē mraomi spitama zaraθuštra jaθwō-tara yaθa ažayō xšvaēwānhō yaθa vā vəhrkānhō sravanhavō yaθa vā vəhrkām azrō-daidīm gaēθām avi frapataiti yaθa vā vazayām hazarjō-hunām āpəm avi frapataiti.

66. paiti mām ərəzvō pərəsaŋuha yim dadvānhəm spəništəmca vaēdištəmca paiti-vačištəmca parštəm avaθa tē anhaṭ vaŋhō avaθa anhāi spanyā yezi mām paiti-pərəsāŋhe.

67. pərəsaṭ zaraθuštrō ... ašāum yō nāirikām ciθravaitīm daxštavaitīm vohunavaitīm baoḍō vīḍvā cikiθwā baoḍaŋuhaitīm vīθušīm avi-ciciθušīm xšudrā avi fraŋharəzaiti

68. kaṭ aiŋhe asti paititiš kaṭ aiŋhe asti āpərətiš kaṭ aētahe paiti varšta šyaθna ciciθwā azaēta.

69. āaṭ mraoṭ ahurō mazdā, yō nāirikām ciθravaitīm daxštavaitīm vohunavaitīm baoḍō vīḍvā cikiθwā baoḍaŋuhaitīm vīθušīm avi-ciciθušīm xšudrā avi fraŋharəzaiti

70. hazarjəm anumayanām frāvinuyāt vīspanāmca aētaēšām pasvām asmanivā zaoθra āθre ašaya vaŋhuya frabarōiṭ bāzva aiwyō vaŋuhibyō frabarōiṭ.

71. hazarjəm vazyanām aēsmanām xraoždvanām hušatām pairištanām āθre ašaya vaŋhuya frabarōiṭ hazarjəm vazyanām aēsmanām varədvānām urvāsnayā vā vohu-gaonahe vā vohu-kərətōiš vā haḍānaēpatayā vā kāmciṭ vā hubaoiḍtəmanām urvaranām āθre ašaya vaŋhuya frabarōiṭ,

72. hazarjəm frastərətanām barəsmaine frastairyāt hazarjəm zaoθranām haomavaitinām gaomavaitinām yaoždātanām pairianharštanām dahmō-yaoždātanām dahmō-pairianharštanām ham-irista aētayā urvarayā yā vaoce haḍānaēpāta aiwyō vaŋuhibyō ašaya vaŋhuya frabarōiṭ,

73. hazarjəm ažinām udarō-θrašanām ava-janyāt duye hazarjə anyaešāmciṭ hazarjəm vazayanām dāḍmainyanām ava-janyāt duye hazarjə upāpanām hazarjəm maoirinām dānō-karšanām ava-janyāt duye hazarjə anyaešāmciṭ,

74. θrisatəm frascimbananām frasciŋbayōiṭ tarasca āpō nāvayā hazarjəm upāzanānām upāzōiṭ aspāhe aštraya duye hazarjə sraošō-caranaya.

75. taṭ aiŋhe asti paititiš taṭ aiŋhe asti āpərətiš taṭ aētahe paiti varšta šyaθna ciciθwā azaēta.

76. yezi azāite tēm ahūm paiθyāite yim ašaonəm yezi nōiθ azāite tēm ahūm paiθyāite yim drvatəm tēmaṅhaēnəm tēmasciθrēm tēmaṅhəm. ašəm vohū.....

19.

1. apāxtaraṭ haca naēmāt apāxtaraēibyō haca naēmaēibyō fradvaraṭ aṅrō mainyuš pouru-mahrkō daēvanəm daēvō, uiti davata hō yō duždā aṅrō mainyuš pouru-mahrkō, druxš upa-dvāra mərəṅcaṅuha ašaum zaraθuštra, druxš hē paiiri-dvaraṭ būiti daēvō iθyejō maršaonəm davažā.

2. zaraθuštrō ahunəm vairīm frasrāvayaṭ, yaθā ahū vairyō ... vastārəm, āpō vaṅuhīš frāyazaēta vaṅhuyā dāityayā daēnəm māzdayasnīm fraorənaēta, druxš hē stərətō apa dvaraṭ būiti daēvō iθyejō maršaonəm davažā.

3. druxš hē paiti-davata, skutara aṅra mainyō nōiθ hē aošō paiiri-vaēnāmi spitamāi zaraθuštrāi pouru-xʿarənaṅhō ašava zaraθuštrō, zaraθuštrō manaṅhō paiiri-vaēnāt, daēva mē drvaṅtō duždāṅhō aošəm ḥəm-pərəsəṅte.

4. usəhištaṭ zaraθuštrō frašusaṭ zaraθuštrō asarətō aka manaṅha xruždya tbaēšō-parštanəm asənō zasta dražimnō katō-masaṅhō həṅti ašava zaraθuštrō viṅdəmnō daθušō ahurāi mazdāi, kva hē dražahe aiṅhā zəmə yaṭ paθanayā skarənayā dūraēpərayā drəjya paiti zbarahi nmānahe pourušaṣpahe.

5. uzvaēdayaṭ zaraθuštrō aṅrəm mainyūm, dužda aṅra mainyō janāni dāma daēvō-dātəm janāni nasuš daēvō-dātəm janāni pairikəm yəm xnaθaiti yahmāi us-zayāite saošyəs vərəθraja haca apaṭ kšaoyāṭ ušastaraṭ haca naēmāt ušastaraēibyō haca naēmaēibyō.

6. paiti ahmāi adavata duždāmō aṅrō mainyuš, mā mē dāma mərəṅcaṅuha ašaum zaraθuštra, tūm ahi pourušaṣpahe puθrō barəθryāt haca zāviši apa-stavaṅuha vaṅuhīm daēnəm māzdayasnīm viṅdāi yānəm yaθa viṅdaṭ vadaṅanō daiṅhupaitiš.

7. paiti ahmāi avašata yō spitāmō zaraθuštrō, nōiθ hē apa-stavāne vaṅuhīm daēnəm māzdayasnīm nōiθ astaca nōiθ uštānəmca nōiθ baodasca vīurvisyāt.

8. paiti ahmāi adavata duždāmō aṅrō mainyuš, kahe vaca vanāi kahe vaca apa-yasāi kana zaya hukərətāṅhō mana dāma aṅrō-mainyuš.

9. paiti ahmāi avašata yō spitāmō zaraθuštrō, hāvanaca taštaca haomaca vaca mazdō-fraoxta mana zaya asti vahištəm ana vaca vanāni ana vaca apayasāne ana zaya hukərətāṅhō āi dužda aṅra mainyō, daθaṭ spəntō mainyuš daθaṭ zrūne akarane fradaθən aməšā spənta huxšaθra huδāṅhō.

10. zaraθuštrō ahunəm vairīm frasrāvayaṭ, yaθā ahū vairyō ... vastārəm, frāmraoṭ ašava zaraθuštrō, taṭ θwā pərəsā arš mē vaoca ahura.

11. pərəsaṭ zaraθuštrō ... ašaum drəjya paiti zbarahe ahurāi mazdāi vaṅhave vohu-maite aṅhānō ašāi vahištāi xšaθrāi vairyāi spəntayāi ārmatōe.

12. kuθa hiš azəm kərənavāni haca avanḥāt drujaṭ haca dužda aṅra mainyō kuθa ḥam-raēθwəm kuθa paiti-raēθwəm kuθa nasuš apayasāne haca avanḥāt višaṭ yaṭ māzdayasnōiṭ kuθa narəm ašavanəm yaoždaθāni kuθa nāirikəm ašaonīm yaoždāθrəm barāni.

13. āaṭ mraoṭ ahurō mazdā, nizbayaṅuha tū zaraθuštra vaṅuhīm daēnaṃ māzdayasnīm nizbayaṅuha tū zaraθuštra avaēn aməšā spənta avi haptō-karšvairīm zəm nizbayaṅuha tū zaraθuštra θwāšahe xʷadātahe zrvānahe akaranahe vayoš uparō-kairyehe nizbayaṅuha tū zaraθuštra vātō taxmō mazdađātō spənta srīra duγda ahurahe mazdā,

14. nizbayaṅuha tū zaraθuštra fravašiš mana yaṭ ahurahe mazdā avəṃ yəṃ mazištəmca vahištəmca sraēštəmca xraoždištəmca xraθwištəmca hukərəptəməmca ašāt apantəməmca yeṅhe urva məθrō spəntō, xʷatō nizbayaṅuha zaraθuštra imaṭ dāma yaṭ ahurahe mazdā.

15. vaxšəm mē asəsaṭ zaraθuštrō, nizbayemi ahurō mazdā ašava dāma dātəm nizbayemi miθrəm vouru-gaoyaoitīm huzaēnəm xʷarənaṅuhastəməm zayanəm vərəθravastəməm zayanəm nizbayemi sraošəm ašīm huraođəm snaiθiš zastaya dražimnō kamərəde paiti daēvanəm.

16. nizbayemi məθrō spəntō yō aš-xʷarəná nizbayemi θwāšahe xʷadātahe zrvānahe akaranahe vayoš uparō-kairyehe nizbayemi vātō taxmō mazdađātō spənta srīra duγda ahurahe mazdā nizbayemi vaṅuhīm daēnaṃ māzdayasnīm dātəm vīdōyūm zaraθuštra.

17. pərəsaṭ zaraθuštrō ahurəm mazdəm, dātō vaṅhən ahura mazda kana yasna yazāne kana yasna frāyazāne imaṭ dāma yaṭ ahurahe mazdā.

18. āaṭ mraoṭ ahurō mazdā, urvaranəm uruθmyanəm ava-jasāhi spitama zaraθuštra srīra urusta amavaiti imaṭ vacō framrū, nəmō urvaire vaṅuhi mazdađāte ašaone ašəm vohū vahištəm asti...(1).

19. barəsma hē uzbārayaṭ aēšō-drājō yavō-fraθō mā hē barəsma pairi-kərətəm pairi-kərəntiš narō aṅhən ašavanō hāvōya zasta nyāsəmnō yazəmnō ahurəm mazdəm yazəmnō aməšā spəntā haomasca zāiriš bərəzō srīrāasca vohu manō rātaca vaṅuhi mazdađāta ašaone vahištō.

20. pərəsaṭ zaraθuštrō ahurəm mazdəm, vīspō-vīdvā ahura mazda axʷafnō ahi abanḥō tūm yō ahurō mazdā, vohu manō ḥam-raēθwayeiti vohu manō paiti-raēθwayeiti haca avanḥāt tanvaṭ yaṭ daēvō-jatayā daēva ḥam-raēθwayeiti bvaṭ vohu manō yaoždātō.

21. āaṭ mraoṭ ahurō mazdā, gaomaēzəm ayasoṭiṭ zaraθuštra gaom pairi uxšānəm bixədrəm dāityō-kərətəm yaoždāta frabarōiš zəm paiti ahurađātəm pairi-karšəm pairi-karšōiṭ aēšō nā yō yaoždāθryō.

22. satəm ašō-stūitinəm upastvōiš bižvaṭ ahunəm vairīm frasrāvayōiš, catura frasnana frasnayōiṭ gaomaēzəm gava dātayā biš āpəm mazdađātayā.

23. yaoždāta bun vohu manō yaoždāta bun mašyō uzgaurvayāt vohu manō hāvōya bāzvō dašinaca dašina bāzvō hāvayaca, āaṭ vohu manō nidaiđiš sūrō-θwarštanam raocanham yaṭ hē stāram bayō-dātanam aiwi raocayānte vīspəm ā ahmāt yaṭ hē nava xšafna sacānte.

24. āaṭ pasca nava-xšaparāt āθre zaoθrā frabarōiš xruždranam aēsmanam āθre frabarōiš vohu-gaonanam baoidinam āθre frabarōiš vohu manō ā-baodayaēta.

25. yaoždāta bun vohu manō yaoždāta bun mašyō uzgaurvayāt vohu manō hāvōya bāzvō dašinaca dašina bāzvō haoyaca fravaocaṭ vohu manō, nēmō ahurāi mazdāi nēmō aməšaēibyō spəntaēibyō nēmō anyaešam ašanonam.

26. pərəsaṭ zaraθuštrō ahurəm mazdam, vīspō-vīdvā ahura mazda haxšāne narəm ašavanəm haxšāne nāirikam ašonīm haxšāne drvatam daēvayasnanam mərəzujitīm mašyānam zam ahurađātām nipārayanta āpəm taciṅtam yavanam uruθmam anyam hē avarətam nipārayanta, āaṭ mraoṭ ahurō mazdā, haxšāēša ašaum zaraθuštra.

27. dātārē ... dva tā dāθra bavaiṅti dva tā dāθra pārayeṅti dva tā dāθra pairi-bavaiṅti dva tā dāθra paiti hanjasəṅti mašyō astvaiṅti aṅhvō havāi urune para-daiḍyāt.

28. āaṭ mraoṭ ahurō mazdā, pasca para-iristahe mašyehe pasca frasaxtahe mašyehe pasca pairiθnəm dərəniṅti daēva drvaṅtō duždāṅhō, θrityā xšapō vīusaiti uši raocaiti bāmya gairinam ašax'āθranam āsənoiti miθrəm huzaēnəm hvarəxšāētəm uzyōraitī,

29. vīzarəšō daēvō nāma spitama zaraθuštra urvānəm bastəm vādayeiti drvatam daēvayasnanam mərəzujitīm mašyānam, paθam zrvō-dātanam jasaiti yasca drvaite yasca ašaone cinvaṭ-pərətūm mazdađātām baodasca urvānəmca yātəm gaēθanam paiti-jaiḍyeṅti dātəm astvaiṅti aṅhvō.

30. hāu srīra kərəta taxma huraoḍa jasaiti spānavaiti nivavaiti pasvaiti yaoxštavaiti hunaravaiti, [hā drvatam aḡəm urvānō tēmō-hva nizaršaitē,] hā ašāunam urvānō tarasca haram bərəzaitīm āsənoiti tarō cinvatō pərətūm vīđārayeiti haētō mainyavanam yazatanam.

31. usəhištaṭ vohu manō haca gātvō zaranyō-kərətō fravaocaṭ vohu manō, kaḍa-nō ida ašaum agatō iθyejanhataṭ haca aṅhaoṭ aiθyajanham ahūm ā.

32. xšnūtō ašonam urvānō pārayeṅti avi ahurahe mazdā avi aməšanam spəntanam avi gātvō zaranyō-kərətō avi garō nmānəm maēθanəm ahurahe mazdā maēθanəm aməšanam spəntanam maēθanəm anyaešam ašonam.

33. yaoždāθryō ašava pasca para-iristīm daēva drvaṅtō duždāṅhō baodəm avaθa fratərəsəṅti yaθa maēši vəhrkavaiti vəhrkaṭ haca fratərəsaiti.

34. narō ašavanō ham-bavaiṅti nairyō saṅhō ham-bavaiti aštō mazdā ahurahe mrūiḍi nairyō saṅhō, xʷatō nizbayanuḥa zaraθuštra imaṭ daṃa yaṭ ahurahe mazdā.

35. vaxšəm mē ašaṣaṭ zaraθuštrō, nizbayemi ahurō mazdā ašava dāmi-dātəm nizbayemi zaṃ ahuraḍātəm āpəm mazdaḍātəm urvarəm ašaonīm nizbayemi zrayō vourukašəm nizbayemi asmanəm xʷanvaṅtəm nizbayemi anaṅra raocā xʷadātā.

36. nizbayemi vahištəm ahūm ašaonəm raocanḥəm vispō-xʷāθrəm nizbayemi garō nmānəm maēθanəm ahurahe mazdā maēθanəm aməšanəm spəntanəm maēθanəm anyaešəm ašaonəm nizbayemi misvānahe gātvahe xʷadātahe cinvaṭ-pəṛətūm mazdaḍātəm.

37. nizbayemi saokəm vaṅuhīm vouru-dōiθrəm nizbayemi uṅrā ašāunəm fravašayō vīspā dāmaṅ savaṅuhaitiš nizbayemi vərəθraṅnəm ahuraḍātəm barō-xʷarənō mazdaḍātəm nizbayemi tištrīm stārəm raēvaṅtəm xʷarənaṅuhaṅtəm gōuš kəhrpa zaranyō-sravahe.

38. nizbayemi gāθabyō spəntābyō ratuxšaθrābyō ašaonibyō nizbayemi ahunavaityā gāθayā nizbayemi uštavaityā gāθayā nizbayemi spəntā-mainyōuš gāθayā nizbayemi vohuxšaθrayā gāθayā nizbayemi vahištōištoiš gāθayā.

39. nizbayemi avaṭ karšvarə yaṭ arəzahe savahe nizbayemi avaṭ karšvarə yaṭ fradaḍafšu vīdaḍafšu nizbayemi avaṭ karšvarə yaṭ vouru-barəšti vouru-jarəšti nizbayemi imaṭ karšvarə yaṭ xʷaniraθəm bāmīm nizbayemi haētuməṅtəm raēvaṅtəm xʷarənaṅuhaṅtəm nizbayemi ašōiš vaṅhuyā [cistōiš vaṅhuyā] nizbayemi razištayā cistayā nizbayemi xʷarənō airyanəm dahyunəm nizbayemi xʷarənō yimāi xšaētāi hvəθwāi.

40. yaštō xšnūtō friθō paiti-zaṅtō sraošō ašyō huraoḍō vərəθraja sraošō ašyō, āθre zaoθrā frabarōiš xrūzdranəm aēsmanəm āθre frabarōiš vohugaonanəm baoiḍinəm āθre frabarōiš ātrəm vāzištəm frāyazaēša daēum janəm spəṅjaṅrīm, xʷāsta xʷarəθā frabarōiš pəṛənəm viṅzārayeīntīm.

41. sraošō ašyō frāyazaēša, sraošō ašyō daēum kuṅdəm baṅhəm vībaṅhəm ava-janyāt drujaskanəm ham-pataiti drvatəm daēvayasnanəm mərəzujitīm mašyānəm [nazdištā daiṅhāvō yaozdāθryāt haca frakaire frakərənaoṭ vāstre vərəzyōiṭ pasuš-xʷarəθəm gave xʷarəθəm].

42. nizbayemi karō masyō upāpō būne jafranəm vairyanəm nizbayemi mərəzu pourvō-xʷadātō yūiḍištō mainivā dāmaṅ nizbayemi hapta srayō bāmya hvāṅhō puθrāṅhō pusāṅhō bavaiṅti.

43. fradavata vidavata
framanyata vimanyata
aṅrō mainyōuš pouru-mahrkō

daēvanam daēvō iṅdrō daēvō saoru daēvō nāṅhaiθəm daēvō taurvi zairica aēšəməm xrvī-drūm akatašəm daēum zyam daēvō-dātəm iθyejō maršaonəm zaurva duždāfədrō kərənaoiti, būiti daēvō driwiš daēvō daiwiš daēvō kasviš daēvō paitišō daēvō daēvanam daēvōtəmō.

44. daēvō uiti davata hō yō duždā anrō mainyuš pouru-mahrkō, cim ham-bərəθa ham-bārayama daēva drvaṅtō duždāṅhō arəzūrahe paiti kamərəðəm.

45. advarəṅta adāuṅta
daēva drvaṅtō duždāṅhō
uruθəṅta adāuṅta
daēva drvaṅtō duždāṅhō
aṅam daoθrīm dāuṅta
daēva drvaṅtō duždāṅhō,
iməm nō ham-bərəθa ham-bārayama arəzūrahe paiti kamərəðəm.

46. zātō bē yō ašava zaraθuštrō nmānahe pourušašpahe kva hē aošō viṅdāma hāu daēvanam snaθō hāu daēvanam paityārō hāu druxš vidruxš, nyāṅcō daēvayāzō nasuš daēvō-dātō draogō miθaoxtō.

47. adāuṅta advarəṅta daēva drvaṅtō duždāṅhō būnəm aṅhəuš təmaṅhahe yaṅ ərəyatō daozaṅuhahe.

ašəm vohū.....

20.

1. pərəsaṅ zaraθuštrō ... ašāum kō paoiryō mašyānam θamnaṅuhatam varəcaṅuhatam yaoxštivatam yātumatam raēvatam taxmanam parađātam yaskəm yaskāi dārayaṅ mahrkəm mahrkāi dārayaṅ vazəmnō-aršti dārayaṅ āθrō tafnuš dārayaṅ tanaoṅ haca mašyehe.

2. āaṅ mraoṅ ahurō mazdā, θritō paoiryō spitama zaraθuštra mašyānam θamnaṅuhatam varəcaṅuhatam yaoxštivatam yātumatam raēvatam taxmanam parađātam yaskəm yaskāi dārayaṅ mahrkəm mahrkāi dārayaṅ vazəmnō-aršti dārayaṅ āθrō tafnuš dārayaṅ tanaoṅ haca mašyehe.

3. višciθrəm dim ayasata āyapta xšaθra vairya paitištātē yaskahe paitištātē mahrkahe paitištātē dāzu paitištātē tafnu paitištātē sāranahe paitištātē sārastyche paitištātē azanahe paitištātē azaḥvahe paitištātē kuruyāhe paitištātē aživākahe paitištātē drukahe paitištātē astairyche paitištātē ayašyā pūityā ahityā yā anrō mainyuš frākərəṅtaṅ avi imam tanum yam mašyānam.

4. ada azəm yō ahurō mazdā urvarā baēšazyā uzbarəm paoiriš pouru-satā paoiriš pouru-hazaṅrā paoiriš pouru-baēvanō ōyum gaokərənəm pairi.

5. taṭ vīspəm frīnāmahi taṭ vīspəm fraēšyāmahi taṭ vīspəm nōmahyāmahi avi imāṃ tanūm yaṃ mašyānaṃ

6. paitišātāe yaskahe paitišātāe mahrkahe paitišātāe dāžu paitišātāe tafnu paitišātāe sāranahe paitišātāe sārastyehē paitišātāe ažanahe paitišātāe ažahvahe paitišātāe kuruyahe paitišātāe aživākahe paitišātāe drukahe paitišātāe astairyehē paitišātāe ayašyā pūityā āhityā yā anrō mainyuš frākərəntaṭ avi imāṃ tanūm yaṃ mašyānaṃ.

7. yaskəm θwāṃ paiti-saṅhāmi mahrkəm θwāṃ paiti-saṅhāmi dāžu θwāṃ paiti-saṅhāmi tafnu θwāṃ paiti-saṅhāmi sāranahe θwāṃ paiti-saṅhāmi sārastyehē θwāṃ paiti-saṅhāmi ažanahe θwāṃ paiti-saṅhāmi ažahvahe θwāṃ paiti-saṅhāmi kuruyahe θwāṃ paiti-saṅhāmi aživākahe θwāṃ paiti-saṅhāmi drukahe θwāṃ paiti-saṅhāmi astairyehē θwāṃ paiti-saṅhāmi ayašē θwāṃ paiti-saṅhāmi.

8. yeṅhe varəda vanaēma drujim druje varəda vanaēma yeṅhe xšaθrəm aojoṅhvaṭ maibyō ahura.

9. paiti-pərəne ašire paiti-pərəne ayūire paiti-pərəne ayraṃ paiti-pərəne uyrāṃ paiti-pərəne yaskahe paiti-pərəne mahrkahe paiti-pərəne dāžu paiti-pərəne tafnu paiti-pərəne sāranahe paiti-pərəne sārastyehē paiti-pərəne ažanahe paiti-pərəne ažahvahe paiti-pərəne kuruyahe paiti-pərəne aživākahe paiti-pərəne drukahe paiti-pərəne astairyehē paiti-pərəne ayašyā pūityā āhityā yā anrō mainyuš frākərəntaṭ avi imāṃ tanūm yaṃ mašyānaṃ.

10. paiti-pərəne vīspəm yaskəmca mahrkəmca vīspe yatavō pairikāsca vīspā janyō yā drvaitiš.

11. ā airyōmā išyō rafədrāi jaṅtu nərəbyascā nāiribyascā zaraθuštrahe vaṅhəuš rafədrāi manəṅhō yā daēnā vairim hanāt miždəm ašahyā yāsā ašim yaṃ išyāṃ ahurō masatā mazdā.

12. jaṅtu ā-airyōmā-išyō vīspəm yaskəmca mahrkəmca vīspe yatavō pairikāsca vīspā janyō yā drvaitiš.

13-14. yaθā ahū vairyō ... māmərəncainiš gaēθā astvaitiš ašahe.

ašəm vohū....

21.

1. nōmasə-tē gaospənta nōmasə-tē gaoš hudā nōmasə-tē frādənte nōmasə-tē varədənte nōmasə-tē dāθrō baxtəm vahištai ašaone anazaθāi ašaone yā jahi mərəncāite ašəmaoγō anašava mašyasca drvā sāsta.

2. yayata dunma yayata frā-āpəm nyāpəm upa-āpəm hazanrō-vārayō baēvarə-vārasciṭ mruyā ašāum zaraθuštra, yaskahe apanaštahe mahrkahe apanaštahe jaini-yaskahe apanaštahe jaini-mahrkahe apanaštahe gaḍahe apa-gaḍahe apanaštahe.

3. yezi uzīrō-hva mərəncaite arəzahva bišazyāt yezi arəzahva mərəncaite xšapō-hva bišazyāt yezi xšapō-hva mərəncaite ušahva bišazyāt vī-vārənti vī-vārāhu nava āfš nava zā nava urvarā nava baēšazā navata baēšaza-kəša.

4. yaθa zrayō vouru-kašəm apō asti hanjaγmanəm usihišta həm-yaētāṅhō yaonəmca avi zəmca zəmca avi yaonəmca usihišta pāiri-haēzajuha yehe zəθaēca vaxšaēca yaonəm dadāt ahurō mazdā.

5. uzayara uzīra hvarəxšaēta aurvaṭ-aspā tarasca harəm bərəzaitīm raoxšnəm kərənavāhi dāmahva təmcit uzīra

yezi ahi garō dərətəm
mazdaδātəm paiti paṅtəm
baγō-baxtəm paiti yaonəm
fraθwarštəm paiti āfəntəm.

6. [āat ana parō duš-kərəta] āat ana parō məθrō spəntō, frā-tē zəθəmca vaxšaθəmca azəm ida frasnayeni frā tē kəhrəmca təvišimca yaoždaθāni kərənaomi θwəm hacat-puθrəm hacat-paēmanyəm.

7. kāravaiti paēmavaiti xšvīptavaiti raoγnavaiti mazgavaiti frazaintivaiti frā-tē hazaṅrəm xəm azəm ida frasnayeni gaodanəm avi haṅtacinā yaṭ asti puθrahe θrimō.

8. yaθa zrayō ... yehe zəθaēca vaxšaēca zəm dadāt ahurō mazdā.

9. uzayara uzīra māṅha gaociθra tarasca harəm bərəzaitīm raoxšnəm kərənavāhi dāmahva təmcit uzīra yezi ahi garō dərətəm mazdaδātəm paiti paṅtəm baγō-baxtəm paiti yaonəm fraθwarštəm paiti āfəntəm.

10. [āat ana parō duš-kərəta] āat ana parō məθrō spəntō, frā-tē zəθəmca vaxšaθəmca azəm ida frasnayeni frā-tē kəhrəmca təvišimca yaoždaθāni kərənaomi θwəm hacat-puθrəm hacat-paēmanyəm.

11. kāravaiti paēmavaiti xšvīptavaiti raoγnavaiti mazgavaiti frazaintivaiti frā-tē hazaṅrəm xəm azəm ida frasnayeni gaodanəm avi haṅtacinā yaṭ asti puθrahe θrimō.

12. yaθa zrayō vourukašəm apō asti hanjaγmanəm usihišta həm-yaētāṅhō yaonəmca avi zəmca zəmca avi yaonəmca usihišta pāiri-haēzajuha yehe zəθaēca vaxšaēca vaxšəm dadāt ahurō mazdā.

13. uzayara uzīra stāra gufra afšciθrāṅhō tarasca harəm bərəzaitīm raoxšnəm kərənavāhi dāmahva təmcit uzīra yezi ahi garō dərətəm mazdaδātəm paiti paṅtəm baγō-baxtəm paiti yaonəm fraθwarštəm paiti āfəntəm.

14. [āaṭ ana parō duš-kərəta] āaṭ ana parō maθrō spəntō, frā-tē zaθəmca vaχšaθəmca azəm ida frasnayeni frā-tē kəhrpəmca təvišimca yaoždaθāni kərənaomi θwəm hacat-puθrəm hacat-paēmanyəm.

15. kāravaiti paēmavaiti xšvīptavaiti raoynavaiti mazgavaiti fraziṭivaiti frā-tē hazarəm xəm azəm ida frasnayeni gaodanəm avi haṭacinā yaṭ asti puθrahe θrimō.

16. yaθa zrayō vourukašəm apō asti haṅjaγmanəm usihišta həm-yaētāṅhō yaonəmca avi zəmca zəmca avi yaonəmca usihišta pāiri-haēzaṅuha yehe zaθaēca vaχšaēca uzayarəm daḍāt ahurō mazdā.

17. uzayara uzīra paxrušta hī kaxuži paxrušta hī ayehye paxrušta hī yātumaiti jahi.

18-23. paiti-pərəne ašire ... astvaitiš ašahe.

ašəm vohū.....

22.

1. mraoṭ ahurō mazdā spitamāi zaraθuštrāi,
azəm yō ahurō mazdā
azəm yō dāta vaṅhvəm
yasə-taṭ nmānəm ākərənəm srīrəm raoxšnəm frādərəsrəm
uzayeni pārayeri.

2. āaṭ məm mairyō ākasat
āaṭ məm mairyō frākərənaoṭ
aṅrō mainyuš pouru-mahrkō

navaca yaskē navaitišca navaca sata navaca hazarəra navasōsca baēvəṅ
āaṭ məm tūm bišazyōiš maθrō spəntō yō aš-xʻarənā.

3. daθāni tē aētahe paiti hakaṭ hazarəm aspanəm aurvatō dərəzi-takanəm
yazāi saoka vaṅuhi mazdadāta ašaoni, daθāni tē aētahe paiti hakaṭ hazarəm
uštranəm urvatō saēni-kaofanəm yazāi saoka vaṅuhi mazdadāta ašaoni.

4. daθāni tē aētahe paiti hakaṭ hazarəm gavəm axšaēnanəm apərətō-
tanunəm yazāi saoka vaṅuhi mazdadāta ašaoni, daθāni tē aētahe paiti hakaṭ
hazarəm anumayanəm harətō vīspō-gaonanəm yazāi saoka vaṅuhi
mazdadāta ašaoni.

5. uta tē azəm āfrīnāni srīra dahma āfriti friθa dahma āfriti
yā ūnəm pərənəm kərənaoiti
pərənəmciṭ vīγžārayeiti
avaṅtəmciṭ baṅdayeiti
baṅtəmca drūm kərənaoiti.

6. paiti ahmāi avašata
 maθrō spəntō yō aš-xʷarəṇā,
 kuθa tē azəm bišazāni kuθa tē azəm apa-varāni navaca yaskē navaitišca
 navaca sata navaca hazanra navasōsca baēvən.

7. nairyō saṅhō aocayata
 yō daδvā ahurō mazdā,
 nairya saṅha vyāxana
 para-āiði upa-vazanuha
 avi nmānəm airyamaini
 imaṭ saṅhōiš airyamanāi,

8. imaṭ tē saṅhaṭ ahurō mazdā ašava, azəm yō ahurō mazdā azəm yō dāta
 vanhvəm yasə-taṭ nmānəm ākərənəm srīrəm raoxšnəm frādərəsrəm uzayeni
 pārayeni,

9. āaṭ maṃm mairyō ākasaṭ āaṭ maṃm mairyō frākərənaoṭ aṅrō mainyuš
 pouuru-mahrkō navaca yaskē navaitišca navaca sata navaca hazanra
 navasōsca baēvən āaṭ maṃm tūm bišazyōiš airyama yō išyō.

10-12. daθāni ... kərənaoiti.

13. ahe vacō paityesti
 para-āiði upa-vazata
 nairyō saṅhō vyāxanō
 avi nmānəm airyamaini
 imaṭ saṅhaṭ airyamanāi,

14-18. imaṭ tē saṅhaṭ ahurō mazdā ašava, azəm yō ahurō mazdā ...
 kərənaoiti.

19. mošu taṭ ās nōiṭ darəṅəm yaṭ frāyatayaṭ θwaxšəmnō airyama yō išyō
 gairīm avi spəntō-frasnā
 varəšəm avi spəntō-frasnā.

20. navanəm aspanəm aršnəm gaonəm baraṭ airyama yō išyō navanəm
 uštranəm aršnəm gaonəm baraṭ airyama yō išyō navanəm gavəm aršnəm
 gaonəm baraṭ airyama yō išyō navanəm anumayanəm aršnəm gaonəm baraṭ
 airyama yō išyō nava vaētayō baraṭ nava karšā frakārayaṭ.

21-26. paiti-pərəne ašire ... ašahe.

ašəm vohū.....

.....

nāismī daēvō, aēvō panṭā yō ašahe vīspe anyaešəm apəntəm.

..

.